

A Is K'anej Dios Bay Cham

ISAÍAS

A Jehová chi alon el mul eb aj Judá

- 1** ¹ A yul jun libro ti' tz'ibbilcan is k'anej Jehová max yal bay Isaías, is c'ajol Amoz, yuj yalon el yin Judá, c'al yin Jerusalén, a ton yet max occ'al eb cham ti' yin reyal bay Judá, a ton Uzías, Jotam, Acáz c'al Ezequías.
- ² Ex aj satcanlak abek, cax abxalwanek ex aj sat tx'otx', yujtol caytu' chi yun k'anjab Jehová axca ti': A eb unin max wil ch'ibok, max caktzaj oc eb win.
- ³ A no wacax, yojtak no' yajaw; axa no burro, yojtak no' lobar yuj is yajaw. A pax Israel xin, c'am chi nachaj el yuj. C'am tzet yojtak in conob, xi Cham.
- ⁴ Ex anima yobtakwom, caw miman e mul. K'ajan ex e yunen yobtakil axca eb e yichmam. Max e bekcan Jehová, Cham Asanxanej Oco, Cham co Diosal ayon Israel on ti'. Max e tx'em caktzajok. Max ex meltzaj e yintak.
- ⁵ ¿Tzet xan to wal che yochej chi oc yailal? ¿Ok toc'al mi ex ec' yiban? Tol yasjinak masanil e jolom, cax ayoc masanil e yanimail yin yailal.
- ⁶ Chi chatek yin e yakan, masantac'al bay e chumuc, yel wal c'am watx'il yili, yas yayji, sululi mali, cax lanan k'atok masanil. C'am ambal ayoc yin. C'am is pichil yas ayoc yin. C'am aceite ayoc yin yet chi pakchaji.
- ⁷ Max uchlaycantok e tx'otx'. Max alay oc k'ak'al e conobal, tx'okxa anima chi loon sat yawojal e tx'otx' e satak, tz'ininixac'al chi yuncan yuj eb tx'ok conobal.
- ⁸ Max beklaycan conob Sión, axca chi yun cancan is lanchu nak ilom uva, ma nak ilom melón yet mayal aj an, ma axca junok conob oybil aj yuj eb ajc'ul.

- 9 Tolok wal maj el yin c'ul Jehová, Cham Yajaw yin Masanil, on yak'oncan jun botzan on ti', axca mi wal max yun c'aylay el conob Sodoma, c'al Gomorra max juncanok.

A caw ayilal

- 10 Ex aj Jerusalén, lajan e yajawil c'al e conob tu' axca yet Sodoma c'al Gomorra. Abek cuybanil c'al k'anej Jehová co Diosal xin.
- 11 Chi yal Jehová axca ti': A e xajanbal caw wal miman, ¿tzet chi oc wuj? Mayal ispay el wuj. Max ispay el no calnel, c'al seboal no bak'ech no'. C'am chi wochej chiq'uul wacax, tamwal chiq'uul calnel, tamwal yet no mam chiwo.
- 12 ¿Mactxel chi alon ayex, xan chex jay in satak? ¿Mactxel max aloni, xan chi ul e tec'ay wamak'?
- 13 Manchakxa e yitek e yofrenda tol nabac'al ayin. Caw wal chin yaj e yincienso tu'. A e k'in yet unin xajaw, c'al yet c'ual xewilal yet che wajban e ba bay e wajayil, c'amxa chi wochej. Yob juntzan e k'in tu' yul in sat.
- 14 A e k'in yet unin xajaw, c'al e k'in tol miman yelapnok yul e sat, mayal ispay el wuj. C'amxa chi techaj wuj wikleni. Mayal in c'unbi el yuj.
- 15 A yet che mojbán aj e k'ab ayin, ok in c'ubaj el in sat ayex. Ac'ala' yet ok aj can e txajli, man ok wab jun e txaj tu', yujtol bonbil e k'ab yuj chiq'uul anima.
- 16 Iek el yobtakil e yin, cax che watx'nen e ba. Bekek e yunen yobc'ulalil, c'ayek el e yobal yul in sat.
- 17 Cuyek e ba e yunen watx'ilal. Watx'nejek el watx' beyc'ulal, iek aj wan eb cannak can yalan, ak'ek e watx'c'ulalil bay eb unin c'amxa mam, c'amxa txutx. Man e bek ilnej eb xal ix camnakxa yetbi, xi Cham.
- 18 Chi yal Jehová: Titanek yin ayman, cax co watx'nejek yayji. Caxc'al caw wal yob yili e mul, ok ex sakbok can el axca wal sakbacom. Caxc'al c'am chi je' yel e yobtakil e yin, axca cak k'apej tol c'am chi el yanil, axca wal sak lana ok e yuncan elok.
- 19 Ta wal chi yochej e c'ul che yabej, ok e lo masanil tzet yetal watx' chi yak' tx'otx'.
- 20 Ta c'am chi yochej e c'ul xin, cax tenomtak exc'al, ok ex lajwokcan el yuj ch'en espada. Tol ayin Jehová in chi wala', xi Cham.

A Dios ok sakbanen Jerusalén

- 21 Ex in conob ¿tzet yuj xan max occan conob Jerusalén axca junok ajmul ix? A yet yalantok a tojolal chi beybalnej eb, axa wal tinani' mak'om cam anima eb.

- 22 Ex aj Jerusalén, a yet yalantok axca plata ex, axa tinani' axca tz'ilal ch'en. A yet yalantok axca vino ex, axa tinani' axca tol sombilxa yetok aej.
- 23 A eb e yajawil max pitbi el eb, yetbixa ba eb yetok eb elk'om. Chi yochej eb sabal yin yobal. C'am watx'c'ulalil eb bay eb c'amxa mam, c'amxa txutx. C'am chi watx'nej eb is k'anej eb xal camnakxa yichamil.
- 24 Yuj wal tu xin, axca ti' yalon cham Jehová Yajaw yin Masanil, a Cham co Diosal tec'an waayi. E... ok wak' in nabal yin eb ajc'ul oc win, ok in pak in ba bay eb c'am chin ocheni.
- 25 Axa ex wak'on cuenta tu', cax watx' ok wut wion el masanil e yobalil.
- 26 Ok wacan oc eb e yajawil c'al eb ak'om nabalej tol watx', axca wal yet yichbanil. Axa wal ekon aj Conobal yet tojolal tu', c'al Conobal eb yikem.
- 27 Yuj in tojolal ok in colcan el eb cajyom bay Sión, eb tol chi na ba c'ul.
- 28 A pax eb chi ec' yiban, c'al eb yobtakwom xin, junnej ok yun yetax el eb. A eb chin bekoncanok, ok lajwok ay eb.
- 29 Catawal tu' ok ex q'uixwok aj yuj max e yak' ayilal bay yechelej bay te ji' xol awojtelak.
- 30 Yujtol axca wal puk xak te ji' ok e yuncan elok, axca wal awojlak c'am chi ay nab yiban.
- 31 Axa nak tec'an waayi, ok el yip, axca wal te c'ax ok yuncanok. Axa yechelej max watx'nej nak tu', axca mamas ayoc k'ak'al, ok yunej. Cax jun lajan ok yun yoc k'ak'al ca makanil, c'am mactxel ok ak'on tanok, xi Jehová.

A junc'ulal yet lajub c'ual

(Mi 4.1-3)

- 2 ¹A tzet max tx'oxlay yil Isaías c'ajol Amoz yin Judá c'al yin Jerusalén:
- ²A yet yajtok tu' a witzal Sión bay ay is templo Jehová, can ok yuncan is tel, c'al is mimanbilal yintak juntzanxa witzlak, axa masanil conoblak ok apnok oc bululok bay.
- ³Cax ok yalon eb: Sebaxek, tonek ajtok bay witz bay ay yatut Jehová Diosal Jacob. Cax ok on cuyon Cham yin is cuybej, cax ok on beytok yin is beybal Cham tu', xi mi eb. Yujtol a bay Sión ok eltek ley, chi yal elapnok tol a bay Jerusalén ok eltek k'anej Jehová.
- ⁴Axa Jehová ok beyc'ulnej is yowal eb mimek conoblak. Axa yespada eb ok occan yin asaronal, axa txam is lanza eb ok occan yin polbal trigo. Majxa yak' eb owal. Majxa c'apax k'aytzej ba eb yin owal.
- ⁵Sebaxek ex yinatil Jacob, ok on beytok yin sakilk'inal chi yak' Jehová.

Chi ak'lay cuenta eb chi ec' yiban yuj Jehová

- ⁶ Mamin Jehová, yel wali max ton a bekcan a conob, a ton eb yinatil Jacob, yujtol nojnak el is conob eb yuj eb ajtxum chi tit bay yetc'ulal bay chi ajol c'u, c'al yetok eb aj nabal, axca yet eb filisteo, cax chi yak'on eb trato yetok eb tx'ok conobal.
- ⁷ A is tx'otx' eb, nojnak el yuj oro c'al yuj plata. C'am bisil is beyomal eb. Nojnak c'apax el is conob eb yuj chej, cax c'amxa chi bischaj is carruaje eb.
- ⁸ Nojnak el tx'otx' eb yuj yechelej, cax chi ay jajan eb bay tzet yetal max watx'nej eb.
- ⁹ Yuj tu' xan yaynakil animaxac'al max yuncan eb. Manchak ak' mimanc'ulal yin eb.
- ¹⁰ Ocanek yul ch'en nach'en, c'ubajek el e ba yul c'ul tx'otx' tx'otx', yujtol chex xiw bay Jehová, tol ay is may Cham miman yikbej.
- ¹¹ A eb lues ok ay moc'an eb. A eb chi yiaj can ba, ok ilay ay eb. Asannej Jehová ok ilay aj can yet jun c'ual tu'.
- ¹² Yujtol ok jay c'ual yowal c'ul Jehová Cham Yajaw yin Masanil, yuj yilay ay masanil eb lues, eb chi mimanej ba, c'al eb chi maynej ba.
- ¹³ Catatu' ok c'ayon el Cham masanil te c'ute' can is tel bay Líbano, c'al masanil te ji bay Basán.
- ¹⁴ Cax ok yioncan ay masanil witzlak, c'al tzanlanlak can ayaj is tel.
- ¹⁵ Ok yioncan ay masanil torre can ayaj is tel, c'al masanil muralla watx' cawxi.
- ¹⁶ Cax ok yak'on paxay masanil barco yet Tarsis yich a', c'al masanil barco watx' yili.
- ¹⁷ Ok lajwok ay masanil tzet yetal chi maynej ba eb anima yuj. A luesalil eb anima, ok ilay ayok. Asannej ton Jehová ok ilay aj can yet jun c'ual tu'.
- ¹⁸ Ok yican el masanil yechelej; c'amxa junok chi cani.
- ¹⁹ A yet ok aj wan Jehová ul yak'on bil tx'otx' tx'otx' ti', ok octok eb anima yulak nach'enlak, c'al yulak jatilal tx'otx' tx'otx', yin c'uban el ba yuj xiwilal bay Cham tol ay is may, tol miman yikbej.
- ²⁰ A yet jun c'ual tu', ok k'okcantok eb anima bay ay no tx'ow, c'al bay ay no sotz', juntzan yechelej tol plata, c'al oro tol max watx'nej eb, yet chi oc eb yin ayilal bay.
- ²¹ Axa yet ok aj wan Jehová ul yak'on bil tx'otx' tx'otx' ti', ok octok eb anima yulak jatilal nach'enlak, c'al yulak jatilal ch'en mimek ch'en, yuj xiwilal bay Cham tol ay is may, tol miman yikbej.
- ²² Bekek e yaon oc eb jet animail yipok e c'ul, yujtol cambejal yayji eb, cax c'am yelapnok eb.

A yailal Judá c'al Jerusalén

- 3** ¹ Ilab xin, tol a Jehová Cham Yajaw yin Masanil, toxa ok yican el bay Jerusalén, c'al bay Judá masanil mac ayoc yipok c'ul eb conob, c'al masanil tzet chi loji c'al masanil a' aej.
- ² Ok yican el Cham eb yajawil eb soldado, c'al eb soldado ak'om owal, c'al cham juez, c'al cham chekbej Dios, c'al eb aj nabal, c'al yicham winakil conob.
- ³ Ok ilay el eb capitán yin 50, c'al eb anima ay yelapnok, eb ak'om nabalej, eb watx'nem tzet yetal tol watx', c'al eb jalan k'anjabi.
- ⁴ Axa pax Jehová ok aon oc eb nak ach'ej yin yajawil.
- ⁵ Axa eb conob ok aj uchnaj eb, ok yak'len eb owal. Junjun mactxel ok yak' owal yetok eb cajan cawilal. A eb nak ach'ej ok yak' owal yetok eb icham winak. Axa eb comonal, ok yak' eb owal yetok eb ay yelapnok.
- ⁶ A yet tu', ok oc mitx'an junok nak yin is k'ab junok yet conob ayto yuj ba yetok is mam, cax ok yalon bay: Ay wal a pichil ach ti', ok ach occan co yajawilok yet ayoc jun yatakilal ti' co xol, xi mi eb.
- ⁷ A yet jun c'ual tu', yel wal maj yal c'ul nak bian. C'am chin oc yin jun opiso tu', yujtol c'am loj bay in na, tamwal ay an pichilej, manchak quin e yacan oc yajawilok conob, xi mi nak.
- ⁸ Manxa watx'ilok yayji Jerusalén, axa Judá mayal ayc'ayi, yujtol a is k'anej eb, c'al is yunben eb, ajc'ulal yak'on yin Jehová, yuj tx'emlay Cham yuj eb.
- ⁹ A yili sat eb chi tx'oxon el is luesal. Chi tx'oxxac'al el eb is mul axca eb aj Sodoma. Ok'bal c'ul yanimail eb, ac'al oc eb max iontek yailal yiban.
- ¹⁰ Al bay eb anima watx' nabal tol watx' ok yun yeloc eb, yujtol ok tzalojbok eb yuj paktzil is watx' unben.
- ¹¹ Ok'bal c'ul eb anima yob nabal. Yobc'al ok chaloj yuj eb, yujtol atac'ala' yunben eb, caytu' ok yun chaon eb tojol.
- ¹² Ach'ejc'al el eb nak chi etnen in conob ti', ix eb chi yajawbi yiban. Ex in conob, a eb chex ikbani, a eb chi ion aytek e sat, cax chex yikban c'aytok eb.
- ¹³ A Jehová ayic' bay is despacho, yet chi beyc'ulnelay eb conoblak yuj,
- ¹⁴ cax ok yalon bay eb yicham winakil is conob, c'al bay is yajawil eb: A ton ayex ti' max e loaytok yawoj eb meba', cax ay wal ec' e yelk'an bay e na max bet e yelk'anej bay eb tu'.
- ¹⁵ ¿Tzet che na' mac ex che yetnej in conob ti', cax chex aj can e yetnen eb meba'? xi Jehová Cham Yajaw yin Masanil.

Is yailal eb ix ix bay Jerusalén

16 Chi yal c'apax Jehová yuj eb ix ix bay Sión, tol chi luesnej ba eb; chi tx'emwaj eb yet chi bey eb, c'am chi q'uixwi eb jabok, tol chi canalwi eb, toxac'al chi tzinlabi tzet ayoc yin yakan eb yet chi bey eb.

17 Yuj wal tu xin, a Jehová ok ak'on pukil xil jolom eb yuj yabil, ok txecloj el is q'uixwiltakil eb yuj Cham.

18 A yet jun c'ual tu' ok yican el cham Yajaw yin eb ix aj Jerusalén masanil yelbub is mimanil, c'al yet yakan eb, yet jolom eb, c'al yet nuk' eb,

19 c'al ch'enal nuk' k'abej, c'al mak satej.

20 Ok yican el makil jolom eb, c'al c'alil nan eb, c'al pokok perfume eb, yetok yutxiquin eb,

21 c'al colk'ab eb, c'al ch'enal txam eb,

22 c'al an watx' pichil eb, c'al an camiñ eb, c'al k'util eb, c'al an tx'uy eb,

23 ch'en espejo, an lababi camiñ eb, c'al an txeq'ueq'ui k'apej, c'al mitx'banil xil eb.

24 A q'uexel is perfume eb tol watx' yoc jab, a ton tzet yak ok jayok.

Axa lasu ok oc q'uexelok c'alilej, axa xil jolomej watx' yili yet yalantok, ok pukilok; a an el pichilej ok oc q'uexelok an pichilej watx' yili, ok etaxtok yili satej watx' yili yuj tzipinal tz'ayil.

25 A eb soldado aj Jerusalén ok ayc'ay eb yuj espada xol owal.

26 A conob ok ok'can ajok, ok occan yin cusc'ulalil, cax ok cancan yin tx'oklil.

4 1 A yet tu', majil winak ok yuncan ajok, yuj tu' xan ok tewok oc ukwan eb ix ix yin jun winak, ok yalon eb bay jun winak tu' axca ti': Chaokab a c'ul on eoni, co cuenta co lowi c'al co pichayi, asan tol checan el q'uixwil ayoc jin, yujtol c'am jetbi, xi mi eb.

A Jerusalén ok watx'jok ajok

2 A yet tu' ok yiaj wan Jehová jun mac axca wolej xol eb Israel, tol ok binaj eb yuj, axa eb okto cancan bay Israel tu', toxac'al ok tzalobjok aj eb yuj. Ok tzalaj c'apax aj c'ul eb yuj sat yawojal is tx'otx'al tu' tol ayxa may watx'il.

3 A wal ok yunej, a mactxel okto cancan cajan bay Sión, a ton eb iquisto bay Jerusalén, ok al-layok tol yetc'al Jehová eb.

4 A yet ok yak'on Cham Yajaw lowbanilej cax ok yaon oc yailal, ok yican el chic' ayoc yin k'ab eb aj Jerusalén yuj is mak'on cam animail eb, cax ok sakbanej eb aj Sión yin is yobtakil.

5 A yet c'ualil ok yesnej aj Jehová asun yiban masanil makbej witzal Sión, c'al yiban masanil eb chi waj ba bay tu'; axa yet ak'balil, ay mub c'al k'ak'ej ay is sakk'inalil. A tzekekial Dios tu' ok oc yenelok masanil conob,

⁶ yet chi oc yenelok eb yuj k'ak' yet c'ualil, cax chi oc pax yenelok eb yuj nab c'al yuj caxxuchum.

Bital yawoj uva

5 ¹ Abek xin, ok in bitnej jun bit yuj jun in watx'il anima c'al yuj is yawoj uva. A jun in watx'il anima tu', ay jun yawoj uva bay jun tx'otx' k'ean caw wal yax sat.

² Max sic'can el is ch'enal, cax max watx'nen corralil, cax max yawon ay uva watx'. Max watx'nej aj jun ilbal awoj nan xol yawoj tu', max watx'nen cajonal bay chi tec'lay el an. Cax watx' uva ok yak' yaloni, axa max yunej, paj uva max yak'a'.

³ Xan max yal jun aj awoj axca ti': Ilab xin, ex aj Jerusalén, c'al ex winak yul yet Judá, alek ayin mac ay is faltail, ¿ayin mi ma a wawoj?

⁴ ¿Tzetto wal watx' ok wut wawoj, tol tz'akan max yun wak'on serbil? A waloni tol watx' sat ok yak'a', axa max yunej, paj uva max yak'a'.

⁵ Ok in tx'ox ayex xin, tzet ok wut wawoj ti': Ok wican el is corralil, cax ok lajwok ay an. Ok in jakcan elok, axa tec'lay ay an tu'.

⁶ Ok can wal can yin tz'inanil wuj, man ok el is takinal an, cax man ok el yak'inal an. Axa ch'ibaj an ac'un, c'al te q'uix xol an tu'. Ayin ok wal bay asun tu', tol c'am chi yak' nabil yiban an, xi cham aj awoj tu'.

⁷ Yel ton wali, a yinatil Israel, axca is yawoj Jehová yayji, Cham Yajaw yin Masanil. Axa pax eb anima aj Judá xin, axca moc'anil uva awbil yuj Cham caytu' yayji eb. A watx'c'ulal max yochej c'ul Jehová, axa max yun xin, mak'oj cam anima chi yun eb. Max yochej Cham tojolal, axa max yunej, tol chi el yaw anima mul yailok eb.

Yailal eb yobtakwom

⁸ Ok'bal c'ul eb xiwil na chi yi', cax chi yionc'al eb xiwil tx'otx' masantac'al chi yi' eb masanil. ¿Ok ex mi cajay e tx'oklil nan xol jun conob ti'?

⁹ Tol max wab k'umal yuj Jehová Cham Yajaw yin Masanil, tol yowalil ok cancan tz'inan nalak, c'amxa mactxel ok cajay bay mimek nalak tu', caxc'al mi watx' yili.

¹⁰ Asannej oyebe galón vino ok yak' yin 50 tx'anil uva. Axa wakeb quintal ixim inat, asan wak almu ok yak'a'.

¹¹ Ok'bal c'ul eb chi pet aj wan yet k'inibalil cax chi c'oli yuc'wi an junelxa; ac'ala' eb tol a yin an chi k'ekbi ayok, masantac'al chi c'ayil c'ul eb yuj.

¹² Axa yet chi watx'ji mimek loj yuj eb, ayoc sonal eb, sonal arpa, c'al sonal violín, c'al sonal pandereta, c'al sonal ch'en flauta, cax chi uc'wi vino eb c'apaxok; palta c'am chi na eb tzet chi yun Jehová.

- 13 A wal yuj tu xin, ok ilaytok in conob yin mosejal, yuj is c'am nabalil eb. Masanil is yajawil eb, c'al eb conob ok cam eb yuj wajil, c'al yuj takintial.
- 14 Yuj wal tu xin, axca wal tol xiwil is wajil camich, cax miman chi yun jakon is ti' yuj turon aytok eb yajawil Jerusalén, c'al eb comon anima tol yelxac'al chi el yaw.
- 15 A eb anima ok ilay el luesal eb, cax ok ilay el q'uixwil eb chi mimanej ba.
- 16 Axa Jehová Cham Yajaw yin Masanil, ok ilay can yin is beyc'ulal; axa Cham Dios tol yelxac'al watx', ok tx'ox is c'ulbal tol watx' yin yunen tojola.
- 17 A bay max ec'lej nalak eb beyom, a tu' ok low no calnel, c'al no chiwo.
- 18 Ok'bal c'ul eb c'alan yin is mul yuj ioj aytek satej, axca no wacax c'alan oc carreta caw wal al yin, axca tu' yayji eb.
- 19 A ton eb chi alon axca ti': Watx'nejokab co Diosal ayon Israel on ti' tzet chi na', cax ok jiloni. Yunokab yin aymanil tzet t'inan watx'nen Cham Asanxanej Ocok, yet watx' chi jabcan el on, xi eb.
- 20 Ok'bal c'ul eb chi aloni tol watx' yobal, axa yobal chi yal eb tol watx', axa sakk'inal, tol k'ekk'inal yalon eb, axa pax k'ekk'inal, sakk'inal yalon eb. A tzet yetal tol c'a', tol chi' yalon eb, axa tzet chi', c'a' yalon eb.
- 21 Ok'bal c'ul eb aj nabal yul yet yaloni, c'al eb tol bak' sat chi yut ba yul yet.
- 22 Ok'bal c'ul eb caw wal jalan yuc'wi an, a ton eb juez tec'an waay yin somon an an.
- 23 Tol a yuj tumin chi yalon aj eb, tol c'am is mul eb ay mul; axa anima watx' beybal, chi ak'laycan low yin yuj eb.
- 24 Yuj wal tu xin, xan axca wal k'ak'ej chi yak' tz'a an ch'im, cax chi lajwi ay tz'atok xak an, cay wal tu' ok yun lajwok eb, axca wal yet chi k'atok an ac'un yetokc'al is xe', axa is xumaquil chi yut cantok ba axca pokok. Yujtol max bekcan eb beybal Jehová Cham Yajaw yin Masanil, cax max yajon el eb k'anej Cham Asanxanej Ocok, a ton co Diosal ayon Israel on ti'.
- 25 Tix wal mul is conob Jehová ti', xan max caktzaj tit yowal yin eb, max ton yik is conob tu' tz'um yuj, max yasji cantok eb yuj. Axa witzlak xin, max bilcan ajok, axa eb camnak yet jun conob tu', max cancan telan yulak calle. Tokwal yuj tu' max ec'tok yowal c'ul Cham yin eb, tol a ti' yet, tol max ajc'al can yaon oc yailal eb.
- 26 Ok yiaj Cham jun bandera bay eb nacionlak najat ay, cax ok uxloktok Cham bay eb ay bay tilak el tx'otx', cax ayman ok jay eb yin anejbail.
- 27 C'am junok eb soldado ok c'unbok aj xol eb, tamwal ay mactxel ok telc'oj xol eb. C'am mactxel wayantak sat xol eb. C'am mactxel choyantak is c'alil, tamwal ay bay ok tukchaj el tx'anil is xanab eb.

- 28 A is julbal eb, nikbil ajtek ye; watx'xac'al yayji teal is julbal eb tu'. A yakan is chej eb axca wal ch'en suy, axa is carruaje eb jalan beyi.
- 29 A yul nuk' eb, axca wal yet no coj, ok el yaw eb axca wal tz'ibcoj tol chi moc' aj is chibej; watx' wal ok yun yiontok, cax c'am mactxel ok je' tok'on ec' bay.
- 30 A yet jun c'ual tu', ok el yaw jun nación tu' yin co conob axca wal bil a' mar. Axa eb ok tok t'anan yin co conob tu', ok yil eb tol ay k'ekk'inal c'al mimek yailal yiban, axa satcan ok tancan el is sakk'inalil yuj asun.

A yawtebal Isaías

6 1 A yet jun abil yet max cam cham rey Uzías, max wil cham Yajaw tol chotan ay bay is trono tol yelxac'al can ay ajok. Nojnak yul templo yuj jokanil is pichil. 2 A yiban Cham ay juntzan ángel axca k'ak'ej yili, wakeb is xic' junjun eb. Cab xic' eb chi makchen el sat, axa cabxa chi makchen el is yakan eb, axa yetok cabxa chi toj jupupok eb. 3 Cax chi aj yaw eb bay junjun, chi yalon eb axca ti':

Asanxanej ocok, caw wal asanxanej oc Cham Jehová, Cham Yajaw yin Masanil. Miman txequel is mimanbilal Cham bay masanil yulyibank'inal, xi eb.

4 Axa yet max oc jun aw tu', max bilaj puertalakil templo tu', cax max nojcan el yuj mub. 5 Axa walon tu' bian: Ok'bal in c'ul. Ok in camok, yujtol max wil Cham Rey, a ton Jehová Cham Yajaw yin Masanil, ti' pax yobc'al in k'anjabi, cax cajan in ec' nan xol conob yobc'al k'anjabi, quin chi.

6 Axa tit jupupok jun ángel xol eb tu' ayin, ibil aj jun tzak'ak' cak xayinak max yiaj bay altar yetok tenaza. 7 Axa lapon oc yin in ti' tu', max yaloni:

A jun tzak'ak' ti' max oc yin a ti ti', xan mayal el a mul tinani', max yican el a yobtakil, xi jun ángel tu'.

8 Axa waben yul nuk' Cham Yajaw tu', tol chi yal axca ti':
¿Mactxel ok in cheka'? ¿Mactxel chi toj co chekbejok? xi Cham.

Axa in tak'wi aj tu' bian:
Tix in ti' Mamin, chekintok, quin chi.

9 Max yalon Cham ayin:

Asi' xin, cax chalon bay jun conob ti: Wal yel ok e yabc'al, palta man ok nachaj el e yuj. Wal yel ok e yilc'al, palta man ok nachaj el e yuj tzet ok e yil tu', cachi bay eb.

10 Etnejtok nabal jun conob ti', makchej el txiquin eb, cha makchej el sat eb, yet watx' c'am chi yab eb c'al yilwi eb, tamwal nachaj el yuj eb, yet watx' c'am chi jay eb ayin, tamwal ok wantej eb, xi Cham.

11 Axa in k'anlen bay Cham tu' axca ti':

¿Jantactoc'al tiempool ok walil jun ti', Mamin? quin chi bay.

Axa yalon Cham ayin tu':

Oktoc'al alilok, masantac'al chi uchlay ay conoblak, cax c'amxa mactxel cajneni. Masantac'al yet c'amxa junok anima chi cancan yulak na tu', cax c'amxa tzet bay c'ultakbal.

12 Masantac'al ok watok anima ti' najat, cax ok can tz'inan yulak conob.

13 Ta wal ayto jaywanokxa anima chito can yul conob, ok uchlay c'apax ay jun conob tu' junelxa. Palta ilab te ji', c'al te c'olol, a yet chi k'aklay te', chi tit wol is k'ojal, caywal tu' ok yun jaywanokxa eb sic'bil el wuj yet chi lajwi ay in conob, xi Cham.

Babel k'anej Isaías bay cham Acaz

7 1 A cham Rezín reyal Siria, yetok cham Peka, c'ajol Remalías, reyal Israel, max yak' eb owal yetok Jerusalén, max yochej eb tol max ayc'ayi; palta maj je' yuj eb. Max yun jun ti' yet ayoc cham Acaz, c'ajol Jotam reyal bay Judá. Uzías bi is mam icham. 2 A ton wal yet tu' max al-lay yab cham rey Acaz, c'al eb ayoc yin opiso yetok, tol a eb aj Siria ipan junanen ba eb yetok eb aj Israel, yuj yak'on eb owal yetok Judá. Axa eb conob yetok cham rey max c'oli bilaj eb yuj xiwilal, axca wal bil te te' yuj cak'ek'.

3 Axa yalon Jehová bay Isaías tu': Asi', cax ok a chalen a ba yetok Acaz tu'. Chetok a c'ajol Sear-jasub etok. Ok a chalej a ba yetok Acaz tu' bay chi el a' aej bay a' miman najab ayoc bay yiban be, bay chi tx'ajlay k'apej.

4 Tix chot alon bay ti':

Xelc'al a ba, cax c'am chach xiwi, tamwal chach aj q'uitnajok.

Manchak ach oc il yuj yowal cham Rezín, yetok eb aj Siria, yetok c'apax cham c'ajol Remalías tu', manchak ex oc il. Lajan eb axca cabok cux chi el mubal.

5 A eb aj Siria, yetok eb conob Efraín, c'al cham c'ajol Remalías, lanan naon eb jun yobal en. Chi yal eb axca ti':

6 Tonek, co tok'can ec' Judá, ok jaoc xiwilal yin eb. Ok co pojcan ec' jun conob tu' jin, axa cham c'ajol Tabeel ok jacan oc yin reyalil bay tu', xi eb.

7 Axa Jehová Cham Jajawil chi alon axca ti': C'am bak'in ok yuncan el jun nabal eb nak tu'.

8 Yujtol a yipalil Siria, a ton conob Damasco, miman conob toni, axa yipomal Damasco, a ton Rezín. Axa Efraín xin, a yet 65 abil tinani', ok lajwok ayok xan manxa nacionok ok yuncanok.

9 A yipalil Efraín, a ton conob Samaria; axa yipomal Samaria, a ton c'ajol Remalías tu'. Ta c'am chin e yaoc yin e c'ul, maj ex mayjok ayex ti' c'apaxok, xi Jehová, cachi bay, xi Cham.

Yabixal Emanuel

¹⁰Max chek pax Jehová Isaías yalon bay Acaz axca ti': ¹¹K'an bay Jehová co Diosal junok tx'oxbanil is colwal, caxc'al atac'al bay najatil yul c'ul tx'otx' tx'otx' ma bay yibantac'al satcan, xi Isaías bay.

¹²Axa tak'wi Acaz tu': Majc'al xin, maj je' waon oc cham Jehová yin porobalil yin in k'anon tx'oxbanil bay, xi Acaz.

¹³Axa yalon Isaías tu' axca ti':

Abek, ayex yinatil ex David ti'. C'am wal yelapnok yul e sat e yetnen eb anima. ¿Tom lanan c'apax yec' yul e c'ul e yetnen in Diosal?

¹⁴A wal caw cham Yajaw ok yak' junok tx'oxbanil ayex: A jun ix k'opoj ix ok oc unin yin, ok jay jun is winak unin, Emanuel ok yik yuj ix.

¹⁵A yet yaliŕto, ok lo nak queso yetok yal cab.

¹⁶A yet c'amto chi jay nabal jun unin tu', a cab conob yetok cawan rey bay chach xiw ti', ok can tz'inanok.

¹⁷Ok yitek Jehová eban, c'al yiban a conob, c'al xol eb yinatil David etok, c'ual yet yatakilal tol c'am bay max uji, yecheltax max yiel ba Efraín bay Judá, xi Isaías. (Chi yal elapnok tol a ton yatakilal yuj reyal Asiria.)

¹⁸A yet jun c'ual tu', ok awjok Jehová, cax ok yawten eb aj Egipto, cax ok tit eb axca no catx, ok tit eb bay najatil tilak a' Nilo, c'al eb aj Asiria ok jay eb axca noal cab.

¹⁹Cax ok ayjok eb bay masanil jobelak, c'al yulak nach'en, c'al bay eltzab, c'al bay yulak potrero.

²⁰Cayton tu' ok yun yiontek Jehová cham reyal Asiria bay k'axepaltok a' miman Éufrates, cax pilan ok yitok cham masanil e tzet yetal, axca chi yun yion el junok tzukom xilej masanil xil jolomej, c'al xil tiej, yetok xil mimanilej.

²¹A yet jun tiempo tu', a mactxel ok job junok is txutx wacax, ma jun cac'onok is chiwo, xiwil queso ok lo'. ²²Yujtol xiwil leche ok yak' no', xan a eb ok colchaj xol jun owal tu', ok ton lo eb queso, c'al yuqu'en eb yal cab.

²³A yet tu', a bay awbejalben uva, eltzab q'uixxa ok yuncantok, cax ac'unlak ok yunej. A yet yalantok, mil moc'an an uva ay bay tu', cax mil siclo plata is tojol. ²⁴Axa ok yunej, asan eb uktem no' ok je' yoc bay tu' yetok is julbal; masanilxac'al bay ok aj an ac'un, c'al eltzab q'uix. ²⁵Xiwil eltzab q'uix ok ch'ibaj bay tzalanlak, tol a yet yalantok chi ec' asarón sat tx'otx' yet chi ay awoj. C'am mactxel ok mulnaj bay tu', asan loba wacax c'al loba calnel ok yuncanok.

A reyal Asiria chi jayi

8 ¹A Cham Jehová max alon ayin: Say junok miman litx'an un cax chach tz'ibli yin tx'an. Yin mimek letrail chot a tz'ibeni: Maher-salal-hasbaz.

²Ok watok cawanok in testigo watx', yuj yalon eb tol ach max a tz'ibej, a ton sacerdote Urías, c'al Zacarías, c'ajol Jeberequías, xi Cham ayin.

³Lanan wal tu', max in way yetok xal wetbi tol chekbej Dios yayji, max oc unin yin xal, cax max jay jun winak unin. Axa yalon Jehová ayin: Ak'ek yik Maher-salal-hasbaz. ⁴Yujtol a yet manto je' yalon jun unin tu' mam c'al txutx, cax ok tok masanil is beyomalil eb aj Damasco, c'al eb aj Samaria yuj cham reyal Asiria, xi Cham. ⁵Max yalon Cham Jehová ayin yet cayelal:

⁶Yujtol chi tzaløj jun conob ti' yuj tzet max utlay Rezín, c'al is c'ajol Remalías tu', cax c'am chi yochej eb a' aej Siloé, tol c'ojanc'ulal bey a', ⁷⁻⁸yuj tu' ok witek a' miman aej Éufrates yiban eb. Ok elcan a' yul is be a', ok pulcan el a' is tilakil, ok apnoktac'al bay Judá, cax ok yak'on noj masanil sat tx'otx'. Ok ajapnok a' tac'al bay tel nuk'ej. (A jun aej chi binaj ti', a reyal Asiria yetok masanil is soldado chi yala'.) A' ok tokxac'al jenan yiban masanil a tx'otx' ach Emanuel, xi Cham.

⁹Wajek e ba ex mimek conoblak cax chex tit yin owal; palta ok ex ayc'ayok. Abek jun k'anej ti', ex conoblak tol najat ayex. Tzetc'al e yion e mitx'k'ab yet owal, toc'alta ok ex ayc'ayok.

¹⁰Ok ton e na' tzet ok e yunej; palta ok uchlay c'ay ayex, caxc'al ay tzet che wajan alnej, palta man ok yunej, yujtol a Dios ayic' jetok.

Asan bay Cham Yajaw chon xiwi

¹¹Yin wal ipejal max oc mitx'an Jehová win, max yalon ayin: Manchak a beybalnej is beybal juntzan anima ti'. ¹²Manchak a waj alnej yetok eb et conob ti' yin e k'anon is colwal Asiria, tamwal chach xiw bay chi xiw eb. ¹³Ayin Jehová Yajaw in yin Masanil, a yul a sat Asanxanej inokab Oco. A ayin moj chach xiwi. Watx' tatol ay welapnok yul a sat. ¹⁴Axa ayin ok in oc a cajlobalok bay chi je' a colon a ba. Palta a bay eb aj Israel, c'al eb aj Judá, axca wal ch'en chipbal akanej wayji. Axca wal wayji, a tu' ok michchaj el eb aj Jerusalén ti'. ¹⁵Xiwil eb ok chipil yakan, ok ayc'ay eb, c'al k'ajtok eb, xiwil eb ok oc yul yal, cax ok michchajok, xi Cham.

Is cuyoj Isaiás bay eb is cuywom

¹⁶Ex in cuywom, a jun in cuyoj ti', watx'okab chi yun cancan e yuj, yet watx' c'am chi toj c'ayc'ulal.

- 17 Caxc'al mi chi yebaj el ba Jehová ayon, mac on yinatil Jacob on ti', palta chi waoc Cham yin in c'ul, tol asan wal Cham ayoc yipok in c'ul.
- 18 Tix in ti', yetok eb in c'ajol max yak' Jehová ayin. A ton Cham Yajaw yin Masanil, tol cajan ec' Cham bay witz Sión, max yak' co bi yin cuybanilejal bay eb jet israelal.
- 19 Ok mi laj yal eb anima ayex axca ti': K'anlej e yabix bay eb tz'akan c'ul yaloni, c'al bay eb chi k'umej camnak, a ton juntzan eb chi sajsoni cax chi c'ununi eb, xi mi eb ayex. Tokwal man ok k'anlej junok conob is nabal bay is Diosal. ¿Watx' mi tol chi k'an eb iquis nabalej bay eb camnak yin tzet chi yun eb?
- 20 Ilek tzet xi ley, c'al cuybej yet Dios. Ta man lajanok chi yun yalon juntzan anima ti', ti tol ayto oc eb xol k'ekk'inal chi yal tu'.
- 21 A eb anima ti', ok ec' c'ac'on eb yuj witz'anil, c'al yuj wajil. Yuj wal wajil tu', ok caktzaj aj eb, ok bajoncan el eb is reyal, c'al is Diosal. Catawal tu' ok aj t'anan eb satcan,
- 22 c'al yay t'anan eb sat tx'otx', palta asan cusc'ulal, c'al k'ekk'inal ok ilchaj yuj eb, axca tol a k'ekk'inal makchenen ay eb yin junelnej.

Cham Yajawil junc'ulal

- 9 ¹ Palta man tojbalk'inalok ok ayjok eb xol k'ekk'inal, a ton eb lanan yetnen c'ul tinani'. A yet yichbanil max ilay ay Galilea, is tx'otx'al Zabulón c'al yet Neftalí ay bay tilak a' Jordán, c'al bay tilak a' mar, junej ay yetok eb man israelok. Axa ok yunej, ok ilay aj can eb yuj Cham.
- 2 A jun conob cajan ec' nan xol k'ekk'inal tu', ok yil jun miman sakk'inal. Ok chaw jun sakk'inal tu' bay eb cajan ec' xol k'ekk'inal tol ay is may.
- 3 Mamin, max e aj can bisil anima bay co conob, yel miman jun tzalojc'ulalil max ak'a'. Chon tzaloj co masanil a satak. Axca wal tzalojc'ulal yet wajoj sat awoj, ma axca wal tzalojc'ulal yet eb soldado chi pojcan ec' mimek beyomal xol eb, axca tu' jun tzalojc'ulal max ak' ayon ti'.
- 4 Yujtol ach max a c'aycan el jun conob anej oc a conob yin mosejal, c'al yin yatakilal. Max a c'aycan el eb axca max ot a c'ayon el conob Madián yet yalantok.
- 5 A is xanab eb soldado, c'al an pichilej bonbil yuj chic', ok tz'acan ayok, ok lajwok ay yuj k'ak'ej.
- 6 Yujtol winak unin max alji ayon. A Dios max ak'on jun unin ti' ayon; a jun unin ti', ok ak'lay yikbej yoc yajawil. Tixtakc'al is bi ok yik ti': Cham C'ayubtakxac'al yin ak'oj nabalej, Cham Dios tol miman is mayk'ak'al, Cham Mamej c'am yichbanil cax c'am lajubal, Cham Yajaw ak'om junc'ulal.

7 Ok yak' Cham reyalil q'uexelok cham rey David. Ok yak' cuenta bay masanil lugar, cax man ok tancan el junc'ulal yin tojbalk'inal. Ok yi yip is yajawil tu' sic'libil, yuj beyc'ulnen yin watx'c'ulal, c'al yin tojolal. A jun ti' ok yunej, yujtol nabil yuj Jehová Cham Yajaw yin Masanil.

Yowal c'ul Jehová yin conob Israel

- 8 Max yal Jehová yuj tzet ok jay yiban Israel, is conobal Jacob.
- 9 Xan masanil eb conob yul yet Efraín cajan bay Samaria, ok nachaj el yuj eb, tol yet Cham jun ok uj tu'. Yuj is maynejbail, c'al ch'aanil eb, xan chi yal eb axca ti':
- 10 Ta mayal ay bulnaj xan na, ayon ok co ca watx'nej aj yetok ch'en ch'en josbil. Ta mayal tzoc'lay coj te patzab sicómoro, axa te c'ute' ok jaoc q'uexelok, xi eb.
- 11 Palta a Jehová ok yitek juntzan yajc'ul cham Rezín yin eb, ac'al oc Cham ok ak'on yun eb yin yak'on eb owal yin Israel.
- 12 A bay yichcan ok tit eb aj Siria, axa bay yayubc'u ok tit eb filisteo. Junxanej ok yun c'aylay el Israel yuj eb. Caxc'al mi axca tu' ok yunej, palta c'amtoc'al chi oc wanaj yowal c'ul Jehová, lanantoc'al yaon oc yailal yin is conob.
- 13 Palta a eb conob tu xin, maj wal meltzoy eb bay Dios caxc'al max alay oc yailal eb yuj Cham. Majc'al yaoc ba eb yul k'ab Jehová, Cham Yajaw yin Masanil.
- 14 Yuj tu' xan a Cham ok yut wal Israel axca junok no no' chi tzoc'lay el ne c'al jolom yuj junok mactxel, axca bay chi k'aklay aj an palma, c'al te aj yin junnej c'ual.
- 15 (A jun jolomej tu', a ton eb yicham winakil conob, c'al eb ayoc yin yajawilal chi yala'; axa neej tu', a ton eb chekbej Dios chi yala', a ton eb chi cuywaj yin lek'tial.)
- 16 A eb ikbajwom bay jun conob ti', lek'ti eb. Axa eb conob ti', chi ikbelay c'aytok yuj eb.
- 17 Yuj wal tu' xan manxa ok ok' is c'ul Jehová yin eb ach'ej, tamwal okto cus c'ul yin eb unin c'amxa is mam, tamwal yin eb xal ix camnakxa yichamil. Yujtol a masanil eb anima ti', junelnej c'am Dios yul sat eb, cax yobxac'al elok, yobal k'anejxac'al chi yal eb masanil. Caxc'al mi axca tu' ok yunej, palta c'amtoc'al chi oc wanaj yowal c'ul Jehová. Lanantoc'al yaon oc yailal is conob.
- 18 A yobtakilal conob, caw wal miman tzet chi yetnejtok, axca wal junok bolob chi yak' tz'atok an sak q'uix c'al te q'uix, chi tz'a c'apaxtok mimek k'akte' yuj, cax chi yoyon ba caxxuchumal yaj xol mub.

- 19 A wal yuj yowal c'ul Jehová, Cham Yajaw yin Masanil, xan lanan lajwi ay conob, c'al lajwi ay eb anima, axca chi yun lajwi ay junok tzet yetal yuj k'ak'ej. C'am jabok ok na eb yin yet animail.
- 20 Yalxac'al tzet yetal jabok ok chaloj yuj eb, ok loon aytok eb. Caxc'al mi axca tu' ok yut ba eb, palta manxa ok ec'tok is wajil eb. Toltax ok chi aytok eb yuninal.
- 21 A Manasés yetok Efraín lanan yak'len lajwok ay ba eb, ac'ala' is ca makanil eb chi toj eb yin Judá. Caxc'al mi axca tu' chi yun eb, palta c'amtoc'al chi oc wanaj yowal c'ul Jehová. Lanantoc'al yaon oc yailal yin is conob.
- 10** 1 Ok'bal ex c'ul ayex che watx'nej juntzan ley man tojolak ti', tol chi etax eb anima yuj.
- 2 C'am che watx'nej el is k'anej eb anima yaynakil, c'amxa jabok yelapnok eb mebatak anima xol in conob ti' yul e sat. Che yetnej eb xal camnakxa yichamil, cax che yelk'anen is tzet yetal eb c'amxa mam, c'amxa txutx.
- 3 ¿Tzet wal ok e yun ayex ti' yet ok e yak'on e cuenta, yet ok e yilon tit yailal bay najat? ¿Baytal ok e k'an colwal? ¿Baytal ok e yak'can e beyomal?
- 4 Tatol man ok ex mitx'lay yin e yilaytok preso, ok ex mak'lay cam chi yal tu'. Caxc'al mi axca tu', c'amtoc'al chi oc wanaj yowal c'ul Jehová; lanantoc'al yaon oc yailal yin is conob.

A eb aj Asiria mitx'k'ab Dios yuj yoc yailal

- 5 Chi yalon Jehová axca ti': ¡Ilek wal cham reyal Asiria! Lajan wal axca junok te c'ax chi wak'balnej yetok yowal in c'ul.
- 6 Chin chektok yin jun conob tol caw wal c'am welapnok yul sat, yob is nabal, a ton jun nación tol chi tx'emtek wowal. Chin chektok jun rey tu', yet watx' chi yelk'anej masanil is beyomal jun nación tu', yuj tec'lay ay eb axca tec'lay ay tx'otx' tz'otz'ew bay yulak be.
- 7 Palta a pax reyal Asiria xin, c'am chi na' axca tu', man yujok tu' xan chi yak' yip. Asan chi na' tol chi yak' lajwok xiwilok nación.
- 8 Chi yalon cham reyal Asiria axca ti': Masanil eb in comandante, rey ta' yayji eb.
- 9 Lajanc'al max wut conob Calno yetok conob Carquemis. Axca max wut Hamat, ca c'apax tu' max wut conob Arfad, lajan max yuncan Samaria yetok Damasco.
- 10 Wet max yuncan juntzan nacionlak tol xiwil is diosal. A wal is diosal eb tu', xiwil bisil yintak diosal eb aj Jerusalén c'al eb aj Samaria.
- 11 Yuj tu xin, a wal tzet max wun yin Samaria, c'al yin is diosal, ¿tom man ok in tzakay c'apax wunen yin Jerusalén, c'al yin is diosal? ¿xi cham reyal Asiria tu', xi Jehová.

- 12 A yet mayal yun Cham Yajaw masanil tzet yetal tol t'inanc'alta yunen bay jolom witz Sión, c'al yin Jerusalén, catatu' ok yaon

wal oc yailal yiban reyal Asiria yuj masanil tzet max yun yin maynejbail, yin tol ch'aanxac'al max yut ba.

13 Yujtol max yal cham reyal Asiria axca ti': Ayin wal max wun juntzan ti' yetok wal wipalil. Caw wal jalan in, watx' max wut in nabalnen elok. Max in q'uexwaltok is mojonail nacionlak ti'. Mayal wican is beyomalil eb, max in tec'ay eb rey yetok wipalil tu'.

14 Max wawal oc in k'ab yin is beyomal juntzan conob tu', mayal wican masanil tx'otx' tx'otx', axcac'al jion ajtek jos tz'iquin bekbilcan yul wayub, c'amxac'al junok mactxel max bili, c'am mac max jak ti' yel yaw, xi cham rey tu'.

15 Palta xin, tokwal miman yelapnok ch'en echej yintak mac chi k'anoni. Tokwal miman c'apax yelapnok ch'en sierra yintak mac chi k'anoni. Tokwal a te k'okoch chi ak'on bil junok anima. C'amak. A junok anima tu' chi ak'on bil te'.

16 Yuj wal tu', a Jehová Cham Yajaw yin Masanil, a ok ion el yip juntzan soldado tec'an waay tu', ok lajwok ay is maynejbail cham reyal Asiria axca tz'atok junok tzet yetal yuj owal k'ak'ej.

17 A Dios Asanxanej Oco, sakk'inal yayji bay Israel, yin junnej c'ual ok yak' lajwok eb aj Asiria axca chi yun tz'aay te q'uix yuj k'ak'ej.

18 Ok lajwok ay masanil eb mimek winak, axca chi yun lajwi ay watx'il yili k'aktelak, c'al awojtalak. Axcaxac'al junok ya'ay tol c'amxa yip, caytu' ok yuncan Asiria.

19 Jaywanxanej eb mimek yajaw ok canok. Axcaxac'al jayebokxa te te' chi can yuj k'ak'ej, toltax junok unin chi je' bisoni.

20 A yet jun tiempoal yet yajtok tu', a jaywanxa eb yinatil Jacob ok cancan bay Israel, ok colchajcanok. Manxa ok yaoc eb yipok c'ul jun nación ijan max ak'on lajwok ay tu', palta tol yin masanil is c'ul eb ok yaoc eb nabal yin Jehová is Diosal eb, tol Asanxanej Oco.

21 A jaywan eb yinatil Jacob ok meltzajok. Ok meltzajok eb bay Dios tol miman yipalil.

22 Ex wet conob Israel, caxc'al tol c'amxa chex bischaji axca yarenail ti a' mar, palta jaywanxanej ex ok ex meltzajte. Nabilxa tol ok jay oc c'aybanilal e yiban axca wal is mojalil.

23 Yujtol a Jehová Cham Yajaw yin Masanil ok yak' lajwok masanil yul makbej co nación, axca max yun yaloni.

24 A Jehová Cham Yajaw yin Masanil chi yal axca ti': Ex in conob cajan bay Sión, caxc'al mi ok ex mak' eb aj Asiria yetok c'ax, ma ok yiaj eb k'okoch e yin, axca max e yun bay Egipto, c'am chex xiw bay eb.

- 25 Yujtol yet-xac'al jayeb c'ual ti' ok jayoc yailal yiban eb, cax ok wak'on lajwok ay eb yetok yowal in c'ul, xi Cham.
- 26 A Jehová, Cham Yajaw yin Masanil, ok aon oc yailal yiban eb, axca wal max yun yak'on lajwok ay conob Madián bay ch'en miman ch'en yet Oreb. Caywal tu' ok yun tx'oxon yipalil yin Asiria tu', axca wal max yun tx'oxon yin Egipto bay a' Cakyin Mar.
- 27 A ton wal yet jun c'ual tu' ok ilay el ikatz ayoc e yiban yuj eb. Ok ex bekchajcan el axca chi yun yel junok no wacax yet chi k'ajtok te yugo ayoc yin.

Chi tit eb aj Asiria

- 28 Lanan yapni oc eb aj Asiria bay Ajat, chi ec'tok eb bay Migrón, a tu' chi cancan ikatz yuj eb bay Micmas.
- 29 Chi k'axpoj ec'tok eb bay miman jobe, chi watx'nej aj eb is campamento bay Geba. Chi xiwcan aj eb aj Ramá. A eb aj Gabaa is conobal Saúl, chi toj eb elajok.
- 30 Elokab e yaw, ex aj Galim. Abek yel aw tu' ex aj Laisa. Ok'bal ex c'ul ex aj Anatot.
- 31 Chi toj eb aj Madmena elajok, a eb cajyom bay Gebim chi toj c'ubaj el ba eb.
- 32 A tinani' chi oc wanaj eb soldado tu' bay Nob. Chi tx'ox eb yowal c'ul yin tzalan Sión bay conob Jerusalén.
- 33 Ilek wali, a Jehová Cham Yajaw yin Masanil ok yak' lajwok ay eb ajc'ul oc yin axca chi yun k'aklay coj te te' bay Líbano ayxamay bil yayc'ayi. Chi tzoc'lay aj te', a te' yelxac'al can ayajok, c'al te' yelxac'al watx' yili, chi ayc'ay te' bay sat tx'otx'.
- 34 Yetok echej chi k'aklay aj te pim k'aktelak, chi k'aklay c'apax aj te te' manxa watx'ilok bay Líbano.

A yikbej cham Mesías

- 11** ¹ Axca wal yeltekwol junok te k'oj, axca tu' ok yun jay jun yinatil Isaí.
- ² Ok ayjok ec' Yespíritu Jehová yiban. A' ok ak'on jelanilal, c'al bak'satilal, c'al aj nabalil, c'al ipejal, c'al ojtakbilal c'al ay yelapnok Jehová yuj.
- ³ Ok cha c'ul yiken bay Jehová. Man ok watx'nej yayji k'anej eb anima yin tzetbil yili eb, tamwal yuj tzet chi al-lay yin eb.
- ⁴ Yin tojolal ok watx'nej el k'anej bay eb meba', c'al bay eb anima yaynakil chi yut ba. A yuj k'anej Cham xan ok yaoc yailal eb chi ec' yiban, cax ok ak'lay cam eb unem yobal.
- ⁵ A tojolal c'al k'anej yel ok yixac'al yip yul k'ab Cham.

- ⁶ A yet tu', a no ok c'al no calnel, c'am owal ok yun no'. A no tz'ibcoj, c'al no chiwo, junnej ok xew no'. A no ach'ej wacax, c'al no coj, lajanc'al ok yun ch'ib no' bay c'atan junjun. Axa junok unin ok ilon low no'.
- ⁷ Ok yamigonej ba no txutx wacax yetok no txutx oso, axa yune' no', junnej ok ay cupan no' xewi. A an ac'un ok lo' no coj, axca low no wacax.
- ⁸ A eb unin chito txutxwi ok je' sakchi yetok no txutx labaj bay ay yolani' no', ok yatok eb k'ab bay wayub no'; palta c'am tzet ok utlay eb yuj no'.
- ⁹ C'amxa yailal bay Sión, jun tzalan tol sic'bil el yuj Jehová. Axca wal tol tz'akan chi yun nojil bay ay a' mar, caywal tu' tz'akanil ok yun yojtaknelay el Cham bay masanil yulyibank'inal.
- ¹⁰ A yet jun tiempoal tu', ay jun rey ok tx'oxaj ba xol yinatil Isaí, axca chi yun yajol junok wolej. Ok aj jun tu' axca wal junok bandera bay xol conob. Masanil nacionlak ok wajbaj oc ba bay ayic' Cham. A bay ok ayjok ec' tu', yelxac'al mimanbil ok yunej.

Chi meltzoy eb ibiltok yin presoal

- ¹¹ A yet jun tiempoal tu', ok tx'ox Jehová is mayk'ak'al junelxa, catatu' ok wajbantek masanil eb is conob sakleminak yayjicantok. Ok tit eb ay bay Asiria bay Egipto, bay Patros, bay Etiopía, bay Elam, bay Sinar, bay Hamat c'al bay juntzan conoblak ay bay tilak a' mar.
- ¹² Ok aj junok bandera yuj tx'oxlayi, tol lanan wajlaytek eb Israel aytok yin mosejal bay juntzan nacionlak tu'. Lanan wajlay c'apaxtek eb anima yet Judá tol sakleminak yayji bay masanil yulyibank'inal ti'.
- ¹³ Ok lajwok is chichonc'ulal Efraín yin Judá; c'amxa c'apax is yobc'ulalil Judá yetok Efraín.
- ¹⁴ Ca makanil eb ok tok bay yayub c'u, yin yak'on owal yin eb filisteo, cax ok ayc'ay eb tu' yuj eb. Junnej chi yun yion ec' eb beyomal eb cajan bay yichcan. Ok apnoctac'al oc yikbej eb bay Edom, c'al bay Moab, cax ok can eb amonita yul k'ab eb.
- ¹⁵ Ok yak' tanaj Jehová jun is k'ab a' Cakyin Mar. Ok yaontok is k'ab yiban a' Éufrates, ok tit jun owal cak'ek' yuj yiban a', xan ok tanaj a'. Ukeb makan ok yuncantok a', axa yec'tok eb yul a' yin tol manxa ok yiel eb is xanab.
- ¹⁶ A yet ok meltzoytek eb conob Jehová bay Asiria, caw wal miman be ok chaloj yuj eb, axca wal max yun tit eb conob Israel bay Egipto.

Bit yuj aloj yuj diosalil

12 ¹ A yet tu' ok e yal axca ti': Chi jal yuj diosalil ayach Mamin Jehová, caxc'al max tit wal owal jin; palta mayal ec'tok yowal a c'ul, lanan con a mimanc'ulnen yuj jantak a watx'c'ulal chak' ayon.

- ² Yel wali, a ton Dios co Colomal yayji, a' ayoc yipok co c'ul tinani', cax c'amxa chon xiwi. Chon bitni bay Jehová, yujtol a chi ak'on jip, max on is col c'apaxok, quex chi.
- ³ A mactxel ay is takintial, yinxac'al tzalojc'ulal chi yuc' a' aej chi ajol nuk'; caywal tu' ok yun tzaloj e c'ul yet chex col-lay el yuj Dios.
- ⁴ A yet tu xin, ok jalek axca ti'. Jalek yuj diosalil bay Jehová, jalek watx' k'anej bay. Jalek el bay xolak masanil conob tzet yetal max yun Cham, yet watx' chi natek eb, tol a Jehová, Cham Axac'al Oco, cax c'am junokxa axca.
- ⁵ Bitnokonek bay Jehová yujtol yelxac'al miman yelapnok tzet max yunej, tol yowalil chi ojtaknelay el bay masanil yulyibank'inal ti'.
- ⁶ Ayon cajiym on bay Sión, elokab jaw yin tzalojc'ulal, yujtol a co Diosal ayon Israel on ti', Asanxanej ocok. Caw wal ay is may, ay c'apax ec' co xol, quex chi.

Chi al-lay el k'anej yin Babilonia

13 ¹ A ton jun k'anej max al-lay yin conob Babilonia ti', tol max cha' Isaías c'ajol Amoz bay Dios:

- ² Iek aj bandera bay jolom junok witz tol c'am is teal. Al-layokabi tol chi oc eb soldado yin owal. Iek aj e k'ab yuj e tx'oxoni, tol chi oc eb bay puertalak eb mimek winak.
- ³ Mayal wawtej eb nak soldado, mayal wak' chekbanilej bay eb nak ak'om owal sic'bilxa el wuj, a ton eb ok tzaloj yet ok wak'on ayc'ay eb wajc'ul yuj yowal in c'ul, xi Jehová.
- ⁴ Abek wal yoc aw bay jolomlak witz, axca wal tol xiwil anima chi el yaw. Abek wal bil xolak nación, tol mayal wajbaj oc ba. Lanan yawji lista yuj Jehová Cham Yajaw yin Masanil, a ton listail eb is soldado watx'xa yayji, yet chi toj eb yin owal.
- ⁵ Chi tit eb bay juntzan nación puch najat, a ton bay lajubal tx'otx' tx'otx'. Ajun Jehová, yetok mitx'k'abej yet yowal c'ul lanan jayoc ul yak'on lajwok masanil yul nación ti'.
- ⁶ C'uyuyanek, yujtol cawilxa chi jayoc jun c'ual yet yowal c'ul Jehová, a jun c'ual c'aybanilal tu' ok yatek Cham chi je' yuj masanil.
- ⁷ Yuj tu xin, a masanil anima ok pax yip yuj xiwc'ulal.
- ⁸ Caw wal ok xiwaj eb; ok jay wal oc jun miman bilc'ulal, c'al yailal yiban eb. Toxac'al ok ec' tx'umumok eb yuj yail, axca chi yun eb ix ix yet chi watx'ji c'ul eb yuj yune'. Toxac'al ok c'ayaj c'ul eb soldado yet Babilonia tu' yil-len oc sat, caxxac'al ok yun sat eb yuj q'uixwilal.

- 9 Lanan yapni oc c'ual Jehová, jun c'ual tol ay is may yuj yowal c'ul, toxac'al ok cancan jun tx'otx' ti' yin tz'inanil yuj, cay wal tu' ok yun lajwok el eb yobtakwom ay bay.
- 10 A yet tu xin, a masanil waycan chi joplabi bay satcan, manxa ok yak' is sakk'inalil. Ok k'ekk'olil c'apax el yakan c'u yet lanan yajolok, c'amxa c'apax yakan xajaw.
- 11 Axa yalon Jehová axca ti': Ok waoc yailal yiban eb aj yulyibank'inal ti' yuj yobtakilal, c'al yiban eb yobtakwom yuj tzet man watx'ok chi yunej. Ok wiay eb chi maynej ba, ok waoc yailal yin eb ch'aan, tol c'am jabok is yabenc'ulal.
- 12 Puralxac'al ok ilchaj eb anima, axca ch'en oro yet Ofir tol yelxac'al watx'.
- 13 Ok in tzicobtanej satcan, axa tx'otx' tx'otx', ok el bay ayic'ok yuj wak'on bilok, a ton yuj yowal in c'ul ayin Jehová in ti', Yajaw in yin Masanil. Caw wal ok k'ak'bok tit wowal yet jun c'ual tu'.
- 14 A eb anima, lajanxac'al ok yun eb axca no tx'ucchej tol uktebil, ma lajanxac'al ok yun eb axca junok bulan no calnel chi saklemtok, c'amxa mactxel chi wajban ocok. Junjunxac'al ok tokcan bay is conobal, c'al bay is tx'otx'al.
- 15 Tzanc'al mactxel ok michchajok, ok teklay camok, tzanc'al mactxel ok yak' ba mitx'layok, ok mak'lay camok.
- 16 T'anan wal oc eb cax ok mak'lay cam yuninal eb bay sat tx'otx'. Ok uchlay eltek eb yulak yatut masanil, cax ok etnelay eb ix yistzil eb.
- 17 Ok watek eb aj Media yin eb. A juntzan anima tu', c'am jabok yopiso ch'en plata yuj, tamwal ch'en oro, c'am yelapnok yul sat eb.
- 18 A yetok is julbal eb, ok yak'cam eb eb ach'ej. C'amxa cusc'ulal eb yin eb ato yalji, tamwal chi cusc'ul eb yin eb unin.
- 19 A wal conob Babilonia, asannej oc watx' yili xol juntzanxa nación, tol is maynejbail eb caldeo yayji ocok, axca ch'en ch'en watx' yili; palta lajanxac'al ok yuncan axca Sodoma c'al Gomorra, yet max wak'on lajwok.
- 20 C'amxa bak'in ok cajay pax anima bay junelxa. C'amxa mac ok meltzotek cajay bay, tamwal eb árabe ok ec' cajan yuj is jobbejal no'. C'amxa bak'in ok ay bulan calnel xew bay tu'.
- 21 A bay tu' ok cajay ec' no ok, toxac'al ok nojil yulak na yuj no ton ton. Axac'al no aveztruz ok ayjok ec' bay tu'; yetok c'apax no xolakteal chiwo ok ec' txec'labok no' bay tu'.
- 22 A no ok, ok ok' yulak mimek cuartel. A bay yulak mimek despacho watx' yili, a tu' ok cajay ec' no mimek ok. Lanan yapni oc c'ual yet ok c'aycan el Babilonia, cax manxa ok najtilbok, xi Jehová.

Ok meltzotjek eb israel yin presoal

14 ¹Ok tx'ox Jehová is camc'ulal yin eb israel junelxa, xan ok sic'lay pax el eb, yuj yoccan is conobok; yuj tu' xan ok tok cajan eb bay is tx'otx'al junelxa. A eb tx'ok conobal ok jayoc cajan xol eb yinatil Jacob tu'.
²Xiwilxa nacionlak ok colwaj yiontek eb israel; a c'apax jun eb yetok eb yet chi titcan eb israel tu' bay is conobal. Axca mosejal ok yun yoc eb yuj eb israel bay tx'otx' is tx'otx' Jehová. Ok yaoc eb israel tu' yul preso eb max aon c'apax oc eb yin presoal yet yalantok, cax ok yajawbok eb yin eb max etnen eb.

Chi buchlay reyal Babilonia

³Ex conob Israel, a yet ok ex yak'on xew Jehová yin e bilc'ulal, c'al yin e yailal bay ayex oc yin mosejal, ⁴ok e yalubtanej jun poesía ti' yin is buchbanilok reyal Babilonia:

Ila wal tzet max yuncantok jun etnewom tu', ila wal max yuncantok is maynejbail.

⁵Mayal pojtok yipalil nak yobtakwom yuj Jehová, mayal k'ajtok k'okochal is yikbej,

⁶A ton jun tu' chi aon oc yailal nacionlak yetok yowal c'ul, c'amxa chi oc wanaj mak'waji. Ok'bal c'ulxac'al max yun eb conob yuj yowal c'ul jun tu'. C'amc'al chi bek yetnen eb.

⁷Masanil anima watx'xac'al yayji ec' yin junc'ulalil, caw wal chi bitni eb yuj tzalojc'ulal.

⁸Toltax te q'uisis, c'al te c'ute' bay Líbano, axq'uijanxac'al tol chi tzaloj te', yujtol max lajwi ay jun tu'. Cochwal tol chi yal te' axca ti': Yettax max ach ayc'ayi, tok ayto mac chon k'akon ajok, xi mi te'.

⁹A bay ayic' eb camnak, toxac'al chi bul-lajbi eb ul chaon jun rey tu'. Chi iquisbi aj pixan eb camnak tu'; a eb yajaw yet payxa bay sat tx'otx' ti', chi aj wan eb yin ul chaonok, chi aj wan eb yulak is trono is satak.

¹⁰Masanilxac'al juntzan eb tu' chi k'anjab eb bay, chi yalon eb axca ti': ¿Tom ach jun c'apax ach ach ti' tol c'amxa jabok epalil? ¿tom lajan achxac'al jetok?

¹¹A yet payxa tol chach ilay can yetok sonal te cítara. Axa tinani', ayachxa ec' co xol ayon camnak on ti'. Telan ach ay bay a wayub xol no patz, axa tzet ayaj eban, patzxac'al elok, xi eb camnak tu' bay.

¹²Ila wal xin, max ach tite'ay bay satcan, ach puj tol chach tzekeki yet k'inibalil. Atac'al bay sat tx'otx' ti' max ach k'oklay ayok, ach ton ti' max ak' ayc'ay juntzan nacionlak.

- 13 Ach ton ti' max a na' axca ti': Ok in ajtok bay satcan. A bay tu' ok in watx'nej ay in trono bay yiban waycanlak yet Dios. A wal bay tu' ok in ay chotan bay tzalan yet wajayil bay norte.
- 14 Atac'al yiban asun can ayajok ok in ajtok. Yelxac'al lajan ok wun yetok Cham Axac'al Ocoq, cachi wali.
- 15 Palta xin, wal yel, mayal ach aytok bay makbej camich, atac'al bay najatil yich xab olan max ach ayapnok.
- 16 A wal eb chach iloni, toxac'al chi occan t'anan eb en, chi cam wal ach yilon oc eb, cax chi yalon eb en axca ti': Mantok tol a jun winak ti' toxac'al chi ak'on bilaj tx'otx' tx'otx', cax masanilxac'al nacionlak chi yak' lajwok.
- 17 Tz'ininixac'al max yutcan bay yulyibank'inal, q'uisisixac'al max yut conoblak, c'amxa junok eb aj preso max beklay el yuj, xi mi eb camnak tu'.
- 18 Masanilxac'al eb rey lanan xew eb, oyanxac'al oc is beyomal eb yinlak, junjunxac'al max yun tojcan eb bay is mukbanil.
- 19 Axa ach ti', najattac'al max ach k'oklaycan el axcaxac'al k'alem tol c'amxa yopiso. A a mimanil, a tu' max k'oklaycantok xol is mimanil eb tekbilcamok, cax tec'bil aytok yul xab olan xolak ch'en.
- 20 Maj ach muklay axca max yun juntzanxa eb rey, yujtol max etnejtok a conob, yujtol max a mak'cam eb anima bay yul a conobal tu'. A yinatil jun yobtakwom ti', c'amxa bay ok ak'lay binajok.
- 21 Watx'nejek bay chi mak'lay cam eb is c'ajol cham, yujc'al jantak is yobtakil max yun eb yichmam eb, yet watx' c'amxa chi yak' ayc'ay eb masanil yulyibank'inal, tamwal yak'on noj eb bay yulyibank'inal ti' yetok yinatil, xi jun poesía tu'.
- 22 A wal Jehová Cham Yajaw yin Masanil chi aloni: Ok in oc wal yin eb tinani'. A Babilonia ok wak' c'ayilok, cax c'amxa yechel ok binajok, c'amxa mac ok canok, tamwal eb yuninal, tamwal eb yitxiquin.
- 23 Ok wutcantok Babilonia tu' yin chic'ail, axac'al no tonton ok ayjok bay tu', q'uisisi wal ok wut wak'oncan lajwok, xi Cham.

Ok lajwok ay conob Asiria

- 24 A Jehová Cham Yajaw yin Masanil mayal yak' is ti', max yalon axca ti': A masanil tzet yetal tol max in na' wuneni, yowalil ok wunej.
- 25 Ok wak' lajwok el eb aj Asiria bay yul in conobal, ok wak'on ayc'ay eb bay jolomlak witz yul in makbej, cax ok wion el yailal ayoc yiban eb in conob yuj eb, cax c'amxa bay ok etax in conob yuj.
- 26 Cay wal ti' max in na' yin masanil yulyibank'inal. Watx'xa wayji yetok yipal in k'ab yuj wak'on lajwok masanil nacionlak, xi Jehová.
- 27 Ta axca tu' max na' Jehová Cham Yajaw yin Masanil, ¿mactowal txel ok je' tenon oc wanajok? Ta watx'xa yayji yuj Cham, c'am junokxa mactxel ok je' q'uexoni.

K'anej max al-lay can el yin eb filisteo

28 A wal yet jun abil yet max cam cham rey Acaz, a yet tu' max yaloncan el Isaías juntzan k'anej ti':

- 29 Manchakto ex tzalojbi ex filisteo yuj mayal k'ajtok te c'ax max aon oc yailal e yiban. A yin yinatil junok no comon labaj, a yin tu' ok pitzc'oj aj junok no bakne, a ton no' caw wal ow, jun bek chi toj jululok.
- 30 A eb yaynakil xol conob Israel caw wal ok ilchaj is lobej eb; axa eb ay is majilal, ok way eb yin tzalojc'ulal. Axa e yiban ayex filisteo ex ti', ok yatok Jehová wajil e xol, xan a jaywanokxa ex chex can tu', wajil ok on e cami.
- 31 C'uyuyanek ex conob filisteo, elokab e yaw yuj yail; bilanek aj yuj xiwc'ulal, yujtol a bay norte chi tit jun bulan ejército. Lajanxac'al tit axca mub. C'am junok soldado chi elcan xol eb.
- 32 ¿Tzet ok yun co tak'wi bay eb chekbiltek ayon yuj nacionlak? Alek bay eb tol a Jehová max ak'on tec'anilal bay conob Sión; a eb ayoc yin bilc'ulal xol is conob Cham chi toj eb col ba bay tu'.

Max al-laycan el k'anej yin Moab

15 1 A ton k'anej max al-lay yin Moab ti': Yin junnej ak'bal ok lajwok ay conob Ar yul yet Moab. Tz'ininixac'al ok yuncanok. Yin junnej ak'bal ok yun lajwok c'apax ay conob Kir yul yet Moab. Tz'ininixac'al ok yuncanok.

- 2 A eb anima cajan bay Dibón, ok ajtok eb ok' bay jun templo ay bay tztalan. Caw wal ya' ok yab eb aj Moab yet ok ayc'ay conob Nebo, yetokc'al Medeba. Masanil eb winak ok tzukil eb xil jolom, c'al xil ti' yuj cusc'ulal.
- 3 A el pichilej ayoc yuj eb yet ok ec' eb yulak be. A bay yibanlak na ok el yaw eb yuj yailal. Masanilxac'al anima ok oc yin cusc'ulal bay txonbal-lak. Ok tanxac'al yal sat eb yuj ok'il.
- 4 A eb aj Hesbón, yetok eb aj Eleale, ok k'an eb colwal. Oktac'al apnok oc yel yaw eb bay Jahaza. Yuj tu' xan a masanil eb soldado bay Moab ok el yaw eb, ok pax yip eb yuj xiwilal.
- 5 Caw wal chi cus in c'ul yuj eb aj Moab. A masanil anima ay bay tu' ok tokcan eb elaj bay Zoar, cax ok apnitac'al oc eb bay Eglat-selisiya. Ok ajtok eb ok' bay witzal Luhit, c'al bay chi toj beal Horonaim. Caw wal ok el wek'ek'ok yaw eb yuj yailal ok jayoc yiban eb.
- 6 Ok tanaj a' uc'bala' yet Nimrim, ok takaj masanil an ac'un, c'amxa junok xak ac'un yaxto.
- 7 Axa eb anima ok wajtok is beyomal, atac'al bay sataktok jobeal Te Sauces ok yitok eb.

- ⁸ A ton bay masanil tilak makbej Moab ok ablay yel aw yet cusc'ulal, ok apnoktac'al oc bay Eglaim yetokc'al bay Beer-elim.
- ⁹ Caxc'al a juntzan uc'bala' yet Dimón, caxxac'al yili yuj chic', toltax oktoc'al tit mimek yailal yiban eb yuj Dios. A junok no coj ok chion ayto eb okto el bay Moab, yetokc'al eb okto iquisbok can bay sat tx'otx' tx'otx' tu'.

Ok tok col ba eb Moab bay Judá

- 16** ¹ Ex aj Sela bay tz'lnan tx'otx', aektek no e calnel bay yajaw conob bay tzalan Sión.
- ² A eb cajiyo bay Moab, bay chon ec'tok bay Arnón, lajanxac'al ok yun eb axca no tz'iquin xiwnakxac'al yet chi elaj bay is wayub.
- ³ Ok yalon eb bay eb aj Sión axca ti': Naek wali, tzet ok yun e colwaj jetok. Colwajanek jetok xin, axca yenel junok te' yet chuman c'u; axa yenel tu' k'ekk'olinakokab yili, axca yet ak'balil. C'ubajek on el ayon lanan jelaj ti', manchak on e tx'oxo'.
- ⁴ Chaek on apnok cajan e xol, c'ubajek on el bay eb lanan jayoc jin on, xi eb aj Moab tu'.
- A yet ok lajwok ec' yailal tu', a yet ok el jun chi ak'on lajwok ay nación ti',
- ⁵ axa jun yinatil David ok oc yin reyalil, ok yak' yajawilal xol anima yetok came'ulal, c'al yin bayc'al ijanilal. Ayman ok watx'nej tojolal, cax ok yiloni tol tojolc'al ok yun eb juez.
- ⁶ Jojtak wali, tzetbil yayji oc is maynejbail eb aj Moab, ch'aan eb, ayxa may k'anjab eb, palta c'am yelapnok tzet chi yal eb tu'.
- ⁷ Yuj wal tu' xan a masanil eb cajiyo bay Moab, ok ok' eb yuj is nación. Masanilxac'al eb ok oc yin cusc'ulal yuj loj manxa watx'ilok chi tit yet yalantok bay Kir-hareset, cax toxac'al ok taccan aj c'ul eb yuj.
- ⁸ A masanil an uva bay Hesbón, yetokc'al bay Sibma ok etaxtok, masanil juntzan mimek winak bay nacionlak chi telc'ojtok eb yuj vinoal an uva tu'. A is k'ablak an, chi apnitac'al oc bay Jaser, cax chi tojtac'al bay tz'lnan tx'otx', chi apnitac'al oc bay ti a' mar.
- ⁹ Yuj tu' xan chin ok' yuj an uva ay bay Sibma, ac'ala' c'apax yuj an bay Jazer, cax chi el c'apaxtek yal in sat yuj an bay Hesbón, c'al bay Eleale. A bay xol yawoj eb tu', a wal tu' ok el aw yet owal.
- ¹⁰ A bay chi oc mulnajil, c'amxa aw yet tzalojc'ulal ok ujok, c'amxa mac ok awjok yuj tzalojc'ulal, c'amxa mac ok bitnok xol an uva, tok ayto mactxel ok tec'wok el yal an. Ok yak' lajwok Jehová masanil aw chi uji.
- ¹¹ Caw wal cusiltakxac'al in c'ul yuj Moab, c'al yuj Kir-hareset, axca cusiltakil yoc nuk' te arpa.

¹² Caxc'al mi chi toj eb aj Moab tu' bay jolomlak witz, cax chi oc eb yin tewilal bay tu', masantac'al chi yal c'unbi eb, caxc'al mi chi toj eb bay is templo txajlok, palta c'amxa tzet yetal ok yi' eb yin.

¹³ A ton wal juntzan k'anej ti' max yalcan el Jehová yin Moab yet yalantok. ¹⁴ Axa tinani' xin, chi yal Cham axca ti':

Yet wal oxeb abil tinani', axca wal chi yun bison junok mulnajwom is tiempo, axca wal tu' ok yun lajwok is beyomal Moab; axa eb aj Moab tu' tol xiwil, ok intaknelay elok. Yet jun tiempoal tu', junxanej yal botzan anima ok canok, cax caw c'amxa yip eb, xi Jehová.

K'anej max al-laycan el yin Damasco

17 ¹ A ton juntzan k'anej ti' max al-laycan el yin Damasco: A Damasco ok lajwok ayok, cax manxa conobok ok yuncanok. Asanxanej pojilal ok aj can bulanok.

² Ok cancan tz'inan yaldeailak Aroer yin junelnej, axac'al lobalok no no' ok occanok, yinxac'al junc'ulalil ok ec' no' low bay tu'.

³ A Israel ok cancan yin tol c'amxa is conob ayoc murallail, axa Damasco manxa yetok ba. Q'uixwiltakxac'al ok yuncan eb aj Siria, okto cancanok, axcaxac'al tu' ok yun c'apax can eb israel, xi Jehová Cham Yajaw yin Masanil.

Yailal yiban conob Israel

⁴ A ton conob Samaria is maynejbail eb yinatil Jacob yayji ocok, c'amxa yip yet jun c'ual tu', axa masanil is beyomal ok c'ayajok.

⁵ Lajanxac'al ok yuncan axca bay mayal el ixim trigo yuj eb joom trigo, axca chi yuncan bay jobeal yet Refaim yet chi ec' sic'lay aj ixim jolom trigo chi caní.

⁶ Asanxanej ixim chi tojcan c'ayc'ulal chi caní. Axca c'apax chi yuncan junok te olivo mayal mak'lay aytek sat, cab oxebxanej sat te' tu' chi can bay chonlak is k'ab, ma asanxanej caneb oyebokxa chi can yin junok te' tealej tu'. Caytu' ok yuncan Samaria, xi Jehová co Diosal ayon israel on ti'.

⁷ A wal yet jun c'ual tu', ok tok t'anan eb anima junelxa yin is Watx'nemal, a ton wal co Diosal Asanxanej Ocok ayon israel on ti'.

⁸ Manxac'al ok yaoc eb juntzan altar watx'nebil yuj eb yipok c'ul. C'amxa yelapnok juntzan te' ya yili yechel Asera yul sat eb, tamwal juntzan altar watx'nebil yuj eb bay chi yak' tz'a eb incienso.

⁹ A wal yet jun c'ual tu', a juntzan conob ayoc murallail ok cancan tz'lanok, eltzabxac'al ok yuncanok. Axca max yun cancan

juntzan conob yin tz'inanil yuj xiwc'ulalil bay eb jet israelal yet payxa, caytu' ok yuncanok.

- ¹⁰ Max tojcan c'ayc'ulal co Diosal e yuj a ton Cham max on colon elok. Tokwal maxto tit yul e c'ul, tatol asan yin Cham caw wal watx' bay chi co col co ba. Yuj tu', caxc'al che yaw juntzan awoj manxa watx'ilok, a ton uva titnak bay tx'ok conobal,
- ¹¹ caxc'al mi chi ch'ibaj juntzan awoj tu' yet jun c'ual tu', cax ac'al oc yet jun c'ual tu' chi elol is xumaquil, palta c'am wal jabok yelapnok sat ok yak'a' yet ok jay yailal e yiban tol c'amxa yanil.

- ¹² Ok'bal c'ul eb soldado yet nacionlak chi bil tita, axca wal bil a' mar. Caw wal chi el yaw eb nacionlak, axca wal bil a' mimek aej chi beyi.
- ¹³ Caxc'al mi ayxamay bil tit eb, palta a wal yet ok tzulay eb yuj Dios, ok tok eb elajok, axca chi yun yilaytok matz'il trigo chi xulay bay jolomlak witz yuj cak'ek'. Axca chi yun yilaytok pokok yuj caxxuchum, caytu' ok yun eb.
- ¹⁴ A yet yaye'ualil ayxa is may yili eb ajc'ul tu', axa yet ayto sakbi c'amxa bay txequel ay eb. Axca tu' chi yuncan mac chon elk'aneni, caytu' chi yun yelcan apnok eb chon etneni.

K'anej max al-laycan el yin Etiopía

18 ¹ Ok'bal c'ul jun nación bay caw wal chi bil xic' no coc'tak no', a ton jun nación ay bay tilak a' mimek aej yet Etiopía.

² Chi yatok eb is chekbej ay mimek yikbej bay yiban a' Nilo, chi toj eb yiban a' yetok juntzan axca aj c'albil topayok. Ex chekbej, meltzozanek yin aymanil bay eb e yet conob tol mimek is tel, tol c'am xil is mimanil eb, tol ay is may binaj eb bay masanil conob. Caw wal tec'an eb, chi ayc'ay nacionlak yuj eb, cax cajan eb bay jun tx'otx' tol pojquiltak yuj mimek aej.

³ E masanil ayex cajan ex bay yulyibank'inal ti', ok e yila' yet ok ilay aj bandera bay jolomlak witz, ok e yab yet ok xulay trompeta.

⁴ Max yal Jehová ayin axca ti': Atac'al bay in lugar, watx' wilontek eb, palta tz'inc'al quin chi, axca yowal yakan c'u yet waresma, axca yal ak'bal chi ay yet elnak wal wajoj sat awoj.

⁵ A ton yet mayal lajwi ec' xumaquil an uva, cax chi txecloj can aj sat, axa yet c'amto chi jay c'ual wajlay sat an, a eb ajc'ul ok ak'on lajwok el eb soldado yet Etiopía. Subojxac'al ok yun lajwi ay eb axca chi yun c'uplay el k'ablak an uva, ma axca chi yun yilay el coc'lak k'ab an.

⁶ A masanil is mimanil eb tu' ok cancan bay jolomlak witz, bay ay no ostoc yetokc'al no chiwajwom no'. A yet c'atxan ok jay no ostoc yin, axa yet sicnabil ok jay no chiwajwom no' yin, xi Jehová.

7 A yet tu', ok ilaytek ofrenda bay Jehová Cham Yajaw yin Masanil, yuj jun conobal anima mimek is tel, tol c'am xil is mimanil eb, a ton jun nación ay is may binaj bay masanil conob, caw wal tec'an eb, tol chi ayc'ay nacionlak yuj, cajan bay jun tx'otx' tol pojquiltak yuj mimek aej. A yofrenda eb tu', ok yitek eb bay tzalan Sión, bay chi oc ayilal bay Jehová Cham Yajaw yin Masanil.

K'anej max al-lay el yin Egipto

19 ¹ A juntzan k'anej max al-lay el yin Egipto: Ilabi chi jayoc Jehová yiban jun asun amanc'uan beyi chi toj bay Egipto. Caw wal chi bilaj juntzan comon dios bay tu' satak Cham, cax chi xiw c'apax aj eb anima aj Egipto tu'.

² Chi yalon Jehová axca ti': Ok wak' pojchajtok eb aj Egipto tu', cax ok yak'len aj eb owal yin junjun. A eb yamigo ba ok yak' eb owal, axa conoblak ok mitx'lej ba yin owal, yetok c'apax nacionlak ok yak'lej owal.

³ Ok wak' etax el nabal eb, cax ok etaxtok masanil tzet yetal nabil yuj eb, xan ok yal ba eb bay comon dios, c'al bay eb ajbal, yetok bay pixan camnak, c'al bay eb naom el k'anej.

⁴ Ayin ton Jehová Yajaw in yin Masanil chi wala', tol ok waoc junok rey bay Egipto tol yob is nabal, caw wal ok'bal c'ul ok yun eb anima yuj, xi Cham.

⁵ Ok lajwok a' aej Nilo, takinxac'al ok yuncan bay yul is be a' tu' masanil.

⁶ Toxac'al ok aj jabil bay be a' tu', yujtol a masanil a' chi el yakan bay Egipto, ok aytek a', masantac'al ok yal takajok. A te aj, c'al an junco ok takajok.

⁷ A masanil an junco ay bay tilak a' Nilo, yetokc'al masanil tzet awojal awbil bay tilak a' tu', ok takajok, ok c'ayajok.

⁸ A masanil eb mitx'om txay bay a' Nilo tu', ok c'uyuyok eb yuj cusc'ulal. Toxac'al ok cuscan aj eb chi yaytok is txim yul a'.

⁹ Cabtakxac'al ok yuncan aj c'ul eb chi xion an lino. Axa eb chi chemon an, toxac'al ok somchajcan el c'ul eb.

¹⁰ Toxac'al ok taccan el c'ul eb chi watx'nen an k'apej, cabtakxac'al ok yuncan aj c'ul eb mulnajwom.

¹¹ Yelxac'al c'am nabal eb yajaw yayji bay conob Zoán. A eb aom oc nabalej bay Egipto, c'amxa jabok yopiso nabal eb tu'. Tzet-xac'al yuj xan chi tec'baj ba eb yalon bay cham reyal Egipto: Ayon ti' yinatil on eb aj nabal, yinatil on eb rey yettaxc'al payxa, xinaj eb.

¹² Ach reyal Egipto, ¿baytal ay eb a aj nabal tinani', yet watx' chi tx'ox eb, c'al yalon el eb ayach tzet yetal nabil yin Egipto yuj Jehová, Cham Yajaw yin Masanil?

¹³ A eb yajaw bay conob Zoán, c'am is nabal eb; a eb yajaw yayji bay conob Menfis, max yak' ba eb ikbelay c'aytok. A eb yajaw tu' max ikbantok eb aj Egipto yul beal man watx'ok.

14 Max yaoc Jehová some'ulal xol eb, a ton eb chi iontok eb aj Egipto yul beal man mojok. A masanil tzet yetal chi yunej, lajan wal axca junok uq'uem an tol chi xabi, cax chi telc'oj aj xol is xaw tu'.

15 C'amxa eb aj Egipto chi je' colon is conob caxc'al beyom ma meba', caxc'al caw wal mimanbil, ma man ojtakbilok, c'amxa chi je' colwaj eb.

16A wal yet jun c'ual tu', a masanil eb aj Egipto, lajanxac'al ok yuncan el eb axca eb ix ix, caw wal ok bilaj eb yuj xiwc'ulal yet ok yilon eb yion aj Jehová is k'ab yin eb, a ton Cham Yajaw yin Masanil. 17Caw wal ok xiwaj eb aj Egipto tu' satak eb aj Judá. Asan yet ok naon eb aj Egipto tu' tzet ok yun k'anabax Judá yuj Jehová, Cham Yajaw yin Masanil yin eb, cax ok xiwaj eb. 18A yet jun c'ual tu', ay oyeb conob bay Egipto ok yal hebreo, cax ok locban eb bi Jehová Cham Yajaw yin Masanil. A junok juntzan conob tu' ok yik Conob C'u.

19A yet jun c'ual tu' ay junok altar tol yet Jehová yayji yul makbej Egipto tu'. A bay cawilal is mojonai is makbej, a tu' ok ilay aj wan junok ch'en ch'en yuj yibanilal aj can Jehová. 20A juntzan tu' ok oc yin tx'oxbanilejal tol a bay Egipto ay mac chi oc ayilal bay Jehová, Cham Yajaw yin Masanil. A yet ok el yaw eb k'anon colwal Cham yuj eb chi etnen eb, ok yatek Cham jun colwajwom bay eb, yet ok col-lay eb yuj. 21Ok tx'ox wal ba Jehová bay eb aj Egipto, ok ojtaknelay wal el Cham yuj eb, ok oc eb yin ayilal bay, cax ok yak'on tz'a eb xajanbal c'al ofrenda. Ok yak'on eb ti' bay Cham c'al yiken eb. 22Ok yatek Jehová junok miman yailal bay Egipto, ok lajwok tu', ok yak'on watx'jok ajok. Ok meltzotjek eb yul k'ab Jehová, cax ok yabenc'ulnelay eb yuj Cham.

23A yet jun c'ual tu', ay jun miman be ok toktac'al bay Egipto masantac'al ok apnok oc bay Asiria, xan a eb aj Asiria tu', ok je' yapni oc eb bay Egipto, ac'ala' eb aj Egipto, ok je' yapni oc eb bay Asiria, xan a cab conob tu' junnejxac'al ok yun yoc eb yin ayilal bay Jehová.

24A yet jun c'ual tu', a eb israel, ok yaoc ba eb yetok eb aj Egipto, c'al yetok eb aj Asiria. A yuj oxeb conob tu' xan ok yak' Jehová watx'c'ulal bay masanil yulyibank'inal. 25A Jehová, Cham Yajaw yin Masanil ok yak' watx'c'ulal yiban eb, cax ok yalon axca ti': Ayin chi wak' watx'c'ulalil yiban in conob Egipto, c'al yiban Asiria, a ton in mulnajbal, c'al yiban Israel, tol in satak yayji ocok, xi Cham.

Ok ayc'ay Egipto c'al Etiopía yuj Asiria

20 1A Sargón reyal Asiria, a max chektok is comandante yetok eb soldado bay conob Asdod, yuj yak'on eb owal yin, cax max ayc'ay yuj eb. 2A yet max oc owal tu', max yalon Jehová bay Isaías c'ajol Amoz axca ti': Iel jun el pichilej ayoc oj tu', c'al a xanab, xi Cham.

Max yiken Isaías yunen axca tu', max yion el is xanab c'al is pichil, asanxanej yul is pichil max can yin. 3Lajwi tu xin, max yalon Jehová: A

in chekbej Isafas, yin oxeb abil max ec'jab yin c'am oc is xanab, asan yul c'apax is pichil ayocok yuj tx'oxbanilal yin Egipto, c'al yin Etiopía. ⁴Yujtol a reyal Asiria ok iontok eb aj Egipto, yetokc'al eb aj Etiopía yin presoal, caxe'al icham anima ma ach'ej, ok ilaytok eb yin c'am xanab eb ayocok, c'al yin tol t'iran el eb, toltax is chop eb t'iran eltek yuj yel q'uixwil eb. ⁵A wal eb anima max yaoc Egipto, c'al Etiopía yipok is c'ul, ok xiwcan aj eb, c'al q'uixwi aj eb yuj tzet ok utlay cab conob tu'. ⁶A wal yet jun tiempoal tu', ok yal masanil eb cajan bay tilak a' mar ti': Ilek wal tzet max yuncan mactxel tol ayoc yipok co c'ul, mac bay chi jal co ba, cax chi co k'anon colwal jetok, yet ok on is col bay reyal Asiria jaloni: ¿Tzetto wal ok yun co colon co ba ayon ti'? Xi eb, Xi Cham.

K'anej max al-laycan el yuj yayc'aybal Babilonia

21 ¹Juntzan k'anej max al-laycan el yin tz'inan tx'otx' bay ti a' mar. Axca wal junok owal cak'ek' chi ec' bay tx'otx' Néguev, caytu' ok yun tit c'aybanilal bay tz'inan tx'otx' bay ay is may.

²Ayxa is may jun tzet yetal max tx'ox Dios wil ti': A mactxel yob is nabal yin yet animail, yobc'alta' chi yunej. A mactxel c'aywajwom, ayc'alta' tzet chi yak' lajwok. Asek yin owal ex soldado aj Elam. Ex aj Media, ocanek oyan yin conob Babilonia. A Jehová ok ak'on lajwok yailal max yaoc jun conob tu'.

³Caw ya' in mimanil chi wabej, toxac'al chin ec' tx'umumok yuj yail axca chi yun ix ix chi watx'ji c'ul yuj unin. Chin oc yin bilc'ulal yuj tzet chi wabej, chin xiwaj yuj tzet chi wila'.

⁴Sombinakxac'al ay in nabal, caw wal yobxac'al in c'ul chi wab yuj ay is may. Caw wal watx' chi wab yet junjun yayc'ualil; axa tinani', mayal yutcan aj ba yin xiwc'ulalil ayin.

⁵Max watx'nej ay eb meña, c'al yaon ay eb wixlubej; lanan low eb c'al yuq'uen a' eb, cax chi oc jun aw axca ti': Ajaneke wan ex yajawil soldado, watx'nejek e ba yetok e makbal julbalej, xi max wabej.

⁶Yujtol a Jehová max alon ayin axca ti': Ocokab junok makwajwom, yet watx' chi yal masanil tzet chi yila'.

⁷Tatol ok yil tit carruaje tok'bil yuj cac'onok chej, ma anima ayoc yiban no burro, ma yiban no camello, chi cam wal yiloni, tzetbil yili, xi Cham.

⁸A jun makwajwom tu' max el yaw max yaloni: A bay chin makwaj ti' Mamin, ayinc'al ec' junjun c'u, c'al junjun ak'bal yin in makwaji.

⁹Axa tinani', chi wil tit jun carruaje tok'bil yuj cac'on chej, xi jun makwajwom tu'. Ay jun mactxel chi aloni: Mayal ayc'ay Babilonia, mayal ayc'ayi. Masanil is diosal eb mayal pojtok, wekanxac'al tok sat tx'otx' xi, xi nak makwajwom tu'.

- 10 Abek ex wet conob, tol max ex tec'lay wal ay yuj eb aj Babilonia, axca chi yun tec'lay ixim trigo. Lanan walon ayex tzet yetal max wabej, tzet max yal Jehová, Cham Yajaw yin Masanil, a ton co Diosal ayon Israel on ti'.

K'anej max al-laycan el yin conob Edom

- 11 A k'anej ti' max al-laycan el yin conob Edom: Ay jun mactxel max awjitektac'al ayin bay Seir: ¿Jantakto sakbi tinani', ach makwajwom, jantakto sakbi? Xi.
- 12 Max in tak'wi axca ti': Toxa chi sakbi, palta ok jay pax ak'balil junelxa. Ta chochej cha k'anlej junelxa, meltzojan ul a k'anlej, quin chi bay.

K'anej max al-laycan el yin Arabia

- 13 A juntzan k'anej ti' max al-laycan el yin Arabia: Ex txonjom aj Dedán, tol chi ec' ak'bal e yuj bay xolak te' bay Arabia,
- 14 elanektok e chaon jun mac ay is takintial, cax che yak'on aej yuq'uej. A ayex cajan ex bay conob Tema, elanektok bay chi ec'tok eb chi toj elajok, cax che yalten loj bay eb.
- 15 Yujtol lanan yelaj eb bay ch'en espada, a ton bay ch'en espada caw wal el ye, bay julbalej tol watx'xa yayji yet chi jul-lay elok, a ton bay ow wal yak'on owal.
- 16 A Jehová max alon ayin axca ti': A wal yet jun abil tinani', axca chi yun bison junok mulnajwom is tiempo, mayal xam lajwi masanil is mimanbilal conob Cedar.
- 17 Jaywanxanej eb julwajwom, a ton eb ak'om owal bay Cedar tu' ok canok. Cay wal tu' chi yun walon ayin Jehová e Diosal in, ayex israel ex ti', Xi Cham.

K'anej max al-laycan el yin Jerusalén

22 1 A ton juntzan k'anej ti' max al-laycan el yin jobeal bay chi tx'oxlay el tzet nabil yuj Jehová: ¿Tzet chex oni, xan e masanilxac'al chex ajtok yibanlak na?

- 2 Toxac'al chex weklab yuj tzalojc'ulal, chi el e yaw yuj k'in. Manak yuj espada, tamwal xol owal max cam eb e camnak.
- 3 Masanil eb e yajaw, ok tok eb elajok, palta ok michchaj eb, yet c'amto chi julwaj eb. A wal eb soldado tol caw wal jelan, najattac'al ok tok eb elajok, palta ok michchajc'alta' eb.
- 4 Yuj tu' xan chi wala': Elanek in c'atan, tol chi wochej chin ok' sic'libil. C'amxa chin e mimanc'ulnej, yuj jantak yatakilal ok jayoc yiban in conob.
- 5 Yujtol a Jehová, Cham Yajaw yin Masanil, mayal yala' tol ok jay wal oc jun c'ual yet ay mimek xiwc'ulal, uchlejibail, c'al somec'ulalil

bay jobeal bay chi tx'oxlay el tzet nabil yuj Cham. Ok uchlay ay muralla, ok ablay yel yaw eb aj conob tac'al bay jolomlak witz.

⁶ A eb aj Elam, lanan watx'nen eb is julbal, ayxa oc eb yulak is carruaje tu', c'al yiban is chej. Axa eb aj Kir, lanan yion eltek eb is makbal julbalej.

⁷ A masanil juntzan jobe watx' yili e yinlak, nojnaxxac'al el yuj carruaje; axa eb ayoc yiban chej, lanan yoc eb yak'on owal bay puertail e conob.

⁸ A tzet ayoc yenelok Judá, mayal lajwi ayok.

A yet jun c'ual tu', max e yaoc e nabal yin juntzan mitx'k'abej yet owal wajan ec' bay Salón K'akte' yet Líbano. ⁹⁻¹⁰ Max e yiloni, tol xiwilxa bay ay pojilal is murallail conobal David, max c'oli e yilon nalak bay Jerusalén; max e yuchon ay juntzanok na tu', yuj e yaon oc yipomalok muralla tu'. Max e yak'on noj jun bay chi wajay a' aej bay yalan tu'. ¹¹ A bay nan xol cab muralla max e watx'nej jun wajbal aej, a tu' max tojcan a' aej ay yul jun wajbal aej tol payxataxi. Palta maj cam e naon yin Cham max iontek masanil juntzan ti', cax c'am yelapnok yul e sat Cham max naon juntzan ti' yettaxc'al payxa.

¹² A yet jun c'ual tu', a Jehová Cham Yajaw yin Masanil max ex awten yin e yok'i, c'al yin e c'uyuyi, yin e tzukon el xil e jolom, c'al e yaon oc el pichilej, yuj e tx'oxon el e cusc'ulal yuj e yobtakil, palta maj yal e c'ul.

¹³ A ti' e yet, asan tzalojc'ulal che yun yin e k'in. Che yak' cam no wacax c'al no calnel, chi oc loj c'al uq'uej vino e yuj. Che yaloni: Lowokonek, juq'uek an, yujtol talaj a yet yecal chon cami, quex chi.

¹⁴ Axa Jehová, Cham Yajaw yin Masanil max tx'ox ba ayin, cax max yalon wal ayin yin jichanil: A jun yobtakil chi yun eb ti', man ok c'ayil yul in sat yin cac'al tu', palta ok cam eb yuj, xi Cham.

K'anej yin jun mayordomo bay yatut cham rey

¹⁵ A Jehová, Cham Yajaw yin Masanil max alon ayin: Asi', il Sebna, mayordomo yayji bay yatut cham rey, cax chalon bay axca ti':

¹⁶ ¿Tzet yetal cha watx'nej cayti'? ¿Mactxel max ak'on ekbej yet cha watx'nej aj jun mukbal camnak cayti', c'al yet cha watx'nen jun olan bay jun tzalan ti', cax cholon octok jun olan bay satlak ch'en bay ok ach canok?

¹⁷ Caxc'al miman elapnok aloni, palta a Jehová ok ach k'okontok bay najat. Yetok wal masanil yip Cham ok ach mitx'a',

¹⁸ ok ach waj c'olayok. Axca junok pelota, najat ok ach k'oklaycantok yuj bay jun tx'otx' caw wal miman. Atac'al bay tu' ok ach camok,

ata bay tu' ok oc wanaj carruaje yet a mimanbilal, ach chak'
q'uixwan eb et mulnajwomal bay yatut cham a reyal.

19 Axca ti' yalon Jehová: Ayin ok ach wiel bay ayach oc ti', cax ok ach
in k'okon el yin opiso.

20 A yet jun c'ual tu' ok wawtej in chekbej Eliaquim, is c'ajol Hilcías;

21 ok waoc a pichil chaoc yin opiso tu' yin, c'al a cincho yet a
mimanbilal, axa wak'oncan ekbej tu' bay. Axca wal mamej ok yun
xol eb cajiym bay Jerusalén, yetokc'al bay xol conob Judá.

22 A bay yul is k'ab ok waoc llaveal yatut eb rey yin yinatil David;
c'am mac ok je' makchen puerta bay tol a' ok jakonok, tamwal ay
mactxel ok je' jakon bay tol a' ok makchenok.

23 Caw wal watx' ok yun waon ocok, axca wal chi yun mak'laycan oc junok
te' bay sat pared. Caw wal ok oc maynejbail yin masanil eb is yican yuj.

24 A masanil eb is yican is mam, yetokc'al yinatil, a ton juntzan tu' al
ok yun yoccan yiban, axca yoc locan vaso, c'al xij, c'al xalu yin
junok te' mak'bil octok sat pared.

25 A yet jun c'ual tu', a jun te' watx' mak'lay ocok, ok eltek ocnajok
cax ok ayc'ay yetok masanil tzet yetal locan aj yin tu'. A masanil
juntzan tu', ok pojtok, xi Jehová, cachi, xi Cham.

A ton Jehová max alon juntzan k'anej ti'.

K'anej max al-laycan el yin Tiro c'al Sidón

23 1 A juntzan k'anej ti' max al-lay yin conob Tiro: Elokab e yaw yuj bilc'ulal
ex iom bey barco chi tit bay Tarsis, yujtol mayal uchlay ay Tiro, c'amxa
na tamwal ayto bay chi oc c'alan barco. Atac'al bay Chipre max al-lay e yabej.

2 Tz'inc'al quex chi, ex cajiym bay tilak a' mar, ex txonjom aj Sidón, a
ton ex tol che chektok e manjom bay k'axepaltok a' mar.

3 Chi apni oc eb manjom tu' bay Egipto manon ixim trigo, chi el bay tilak a'
Nilo cax chi txonon eb bay nacionlak. A ton yin tu' che yieltek tzet che yi'.

4 Q'uixwanek aj ex aj Sidón, axcaxac'al tol chi yal a' mar tol miman
yip axca ti': Lajanxac'al max wuncan axca junok ix ix tol
manc'alta' yojtakok yail yalji unin, tol c'amc'alta' winak unin c'al
ix unin max yil ch'ibok, xi mi a' mar.

5 A wal yet ok apnok oc yabixal jun ti' bay Egipto, toxca wal ok oc eb
yin bilc'ulal yuj tzet max uj bay Tiro.

6 Ok yal eb: K'axpojanek ec'tok bay Tarsis. Elokab e yaw yuj cusc'ulal,
jantak ex cajan ex bay tilak a' mar, xi mi eb.

7 ¿A mi jun e conob ti' tol ayc'alta' yet payxa, tol chaom k'in c'alta'a?
¿A mi jun ti' max tojtac'al najat yin watx'nen ay conoblak?

- ⁸ ¿Mactxel max naon jun ti' yin Tiro, jun conob tol yet eb rey yayji ocok? A eb txonjom bay tu', mimek winac'e'al yayji oc eb, caw wal mimanbil eb txonjom bay tu' bay yulyibank'inal ti'.
- ⁹ A Jehová, Cham Yajaw yin Masanil max naoni, yuj yilay ay masanil eb chi maynej ba, yuj yayc'ay eb ay yipalil sat tx'otx'.
- ¹⁰ Ex aj conob Tarsis, saklemnejektok e ba bay sat tx'otx', axca chi yun yel a' Nilo yul is be. C'amxa mactxel ok ex tenchanenok.
- ¹¹ Mayal yatok Jehová is k'ab yiban a' mar, mayal yak' bilaj masanil nacionlak, max yala' tol chi lajwi ay masanil cuartel ay yul makbej Canaán.
- ¹² Max yalon Cham bay eb aj Sidón axca ti': Bekek e chaon k'in ex aj Sidón tol mayal ex etnelayi. Caxc'al mi chex tojcan bay Chipre, tamwal tol ok ex xew jabok bay tu', xi Cham.
- ¹³ Ilek wal tx'otx'al eb caldeo. A ton jun conob ti' ok yacan oc eb conob Tiro cajlobalok no xolakteal no'. Ok watx'nej aj eb torre bay yinlak conob Tiro, ok yuchon ay eb mimek na. Manak eb aj Asiria ok unen jun ti'.
- ¹⁴ Elokab e yaw yin bilc'ulal ex iom bey barco yet Tarsis, yujtol mayal uchchaj ay jun conob ayoc yipok e c'ul.
- ¹⁵ A yet jun tiempoal tu', a Tiro ok tokcan c'ayc'ulal yin 70 abil, axca ton is k'inal junok rey. A yet ok lajwok 70 abil tu xin, catatu' ok jay wal oc yiban Tiro axca tzet chi yal jun bit chi bitnelay yin jun xal ajmul ix, bay chi yal axca ti':
- ¹⁶ Ach ajmul ix, c'amxa mac chach naoni, itok a arpa, cax chach ec' xol conob ti', watx' chot aon oc a son, cax cha bitnen xiwilok bit, talaj c'uxan chach nalaytek, xi jun bit tu'.
- ¹⁷ A ton yet ok lajwok 70 abil tu', catatu' ok chaon txonjok Jehová eb aj Tiro junelxa, c'al yoc pax eb yin yak'on yochwan xolak nación ay bay masanil sat tx'otx' ti'. ¹⁸ A jantak ok yi' eb tu', yet Jehová ok yunej. C'amc'al tzet ok c'uaytok, palta tol ok ak'lay bay eb chi ak'on serbil Cham, yet watx' chi man eb mimanok is lobej, c'al manon eb pichilej watx'.

Yailal yiban tx'otx' tx'otx'

24 ¹ Ilek wali, a Jehová ok q'uis yiban tx'otx' tx'otx' ti', toxac'al ok can t'iran tx'otx', yujc'al pakon aj sat tx'otx', cax ok yuchon c'apax saklem masanil eb cajan bay.

² Lajanc'al ok yun eb sacerdote yetok eb conob, lajanc'al ok yun eb cham patronej yetok eb mosejal, lajanc'al ok yun eb xal patronej yetok eb ix mosejal, c'al eb chi manji, yetokc'al eb chi txonji, c'al

eb chi ak'on majanil, yetok eb chi oc majan, yetokc'al eb chi ak'on yin jecojal, c'al yetok eb chi oc jec.

3 Toxac'al ok el t'iran tx'otx' tx'otx' ti', yujtol ok ilaytok masanil tzet yetal watx' ay bay. A ton wal juntzan ti' max yal Jehová.

4 A tx'otx' tx'otx' ti' ok takajok, cax manxa watx'ok ok yun yili. Masanil yulyibank'inal ok takilok; masanil eb mimek winak sat tx'otx' ti', lanan lajwi ay eb.

5 Max etaxtok tx'otx' tx'otx' yuj eb cajiym, yujtol maj yun eb axca leyal, max ten eb chekbanil Dios, max yetnejtok eb trato yetok Cham, a ton trato watx'nebil tol ayc'al yin tojbalk'inal.

6 Yuj tu' xan max titcan jun catab yiban tx'otx' tx'otx' ti'. A masanil eb cajan sat tx'otx', chi yab eb yail yailal. Yuj tu' xan a eb cajiym, lanan c'ayaj eb, jaywanxanej mactxel ayic'ok.

7 C'amxa vino, mayal oc yabil an uva. Ay mactxel max ayji yin tzalojc'ulal, axa tinani', yinxac'al cusc'ulal ayic'ok.

8 C'amxa k'in bay chi oc tambor c'al arpa.

9 C'amxa mac chi uc'wi an yet chi oc son c'al bit. A an an tu', c'a'xa yuq'ui chi yab eb chi uc'wic'alta' an.

10 A conob tenomtak, uchquiltakxac'al yayji, c'amxa mac chi je' yoctok yul junok na.

11 A eb anima, toxac'al chi ok' eb yulak calle, yujtol c'amxa vino. Mayal lajwi tzalojc'ulal; a tzalojc'ulal tu', mayal c'ayaj bay tx'otx' tx'otx'.

12 A conob mayal etaxtok, axa is puertail mayal pojtok.

13 A bay masanil nacionlak ay bay sat tx'otx' tx'otx' ti', jaywanxanej anima ok canok. Axcaxac'al junjunokxa sat te' chi cancan yet mayal mak'lay aytek sat te olivo yet cayelal, axca c'apax chi yun cancan junjunxa an uva yet mayal ec' saylay yet cayelal, caytu' co yuncanok.

14 A eb okto can tu', ok el yaw eb yuj tzalojc'ulal, ok aj wal nuk' eb bay yayub c'u yin yalon el eb mayk'ak'al Jehová.

15 Yetok c'apax bay yichcan, yetokc'al juntzan nacionlak ay bay tilak a' mar, tol ok yal eb watx' k'anej yin Jehová is Diosal Israel.

16 Ok ablay bitni masanil bay tilak el tx'otx' tx'otx', yuj yilay aj can conob tol tojol yayji.

Palta ayin chi wala': ¡Ay, ok'bal in c'ul, lanan in lajwi ayok! ¡A eb yob is nabal tu', caw wal yob tzet chi yun eb!

17 A wal eb cajiym sat tx'otx' tx'otx', lajan wal ok yun eb yetok no no', tol uktebil oc yuj mac chi ukteni. Ay is may yayc'ay no' yul junok olan, ma yul junok yal.

- 18 A no' chi elcan yul k'ab mac chi ukten ec'ok, axa yul olan chi ayc'ayi; axa no' chi ajtek yul olan tu' junelxa, axa bay yul yal chi ayc'ayi. Ok ayc'ay jun miman yax nab, cax ok bilaj cimiental yich tx'otx' tx'otx'.
- 19 Yelxac'al miman ok yun bilaj tx'otx' tx'otx', ok tziclay wal sic'libil, cax ok pojtok.
- 20 Toxac'al ok ec' k'ek'on tx'otx' axca uq'uem an, toxac'al ok wacxok aj axca wacxi junok lanchu yuj cak'ek'. Yujtol a is mul eb anima, max ec'xac'al yiban, xan ok telc'ojxac'al, cax c'amxa bak'in ok ajwanok.
- 21 A yet jun c'ual tu', a Jehová ok aon oc yailal eb ay yikbej xol cak'ek' bay chi ec' eb, yetokc'al eb rey bay sat tx'otx' ti'. Ok alay oc yailal eb cayti'.
- 22 Ok wajlay oc eb axca chi yun wajay oc junok bulan aj preso yul junok olan. Ok makay eb mimanok tiempoal, catawal tu' ok alay oc yailal yiban eb.
- 23 A yet jun c'ual tu', ok yajawbok Jehová, Cham Yajaw yin Masanil bay tzalan Sión, a ton bay Jerusalén. A yet tu', toxac'al ok cakbok el xajaw c'al yetok c'u yuj q'uixwilal, yujtol yin wal mimek mayk'ak'al ok yajawbok Cham bay satak eb yicham winakil is conob.

Bit yin aloj watx' k'anej bay Dios

- 25** ¹Mamin Jehová, in Diosal ach. Ayin ti' ok wal watx' k'anej en, yujtol mayal ak' yun tzet yetal c'ayubtak nabil oj, tol watx' yayjican yettaxc'al payxa.
- ²Axcaxac'al junok bulan ch'en ch'en max yuncan juntzan conob oj. A conoblak tol caw wal tec'an yayji, mayal pojcantok. Mayal ak' lajwok ay is despacho eb ajc'ul oc jin, c'amxa yechel ok ca watx'nelay aj junelxa.
- ³Yuj tu xin, a eb anima yaxc'ayinak, ayxa elapnok yul sat eb, ok xiw eb anima yelxac'al ay yip ayach.
- ⁴Yujtol a ayach chi je' colon ba eb meba', tol is Colomal ach eb ayoc yin yailal yuj cawxinakil. A juntzan anima caw wal yob c'ul, lajan wal eb axca owal yax nab, lajan c'apax eb axca k'ak'al yakan c'u bay takin tx'otx'. Palta ach chon ebaj axca junok ch'en ch'en; chon eban bay junok owal yax nab, c'al bay yowal yakan c'u.
- ⁵Caywal tu' chi yun eon ay is maynejbail eb ajc'ul oc jin. Axca wal yoc numnaj yowal yakan c'u yet chi oc yewanil junok asun, caywal tu' chi yun bekon eb yob c'ul yel yaw oj.
- ⁶A bay tzalan Sión ti', a ok watx'nej Jehová Cham Yajaw yin Masanil junok miman loj bay masanil nacionlak, wal loj tol manxa chialok, c'al vino axac'al ocok.

- 7 A bay jun tzalan ti' ok yiel Jehová cusc'ulal ayoc yiban masanil nación, axca junok k'apej bac'an oc yin junok anima.
- 8 Ok yak' lajwok Jehová camich yin junelnej. Ok joc'ay Cham yal sat masanil anima, cax ok c'ayaj bay masanil yulyibank'inal is q'uixawc'ulal is conob yuj. Cay wal tu' yaloncan Cham.
- 9 A yet jun c'ual tu' ok jal axca ti': A ton wal Jehová co Diosal ti', asan wal Cham max jaoc yipok co c'ul, yujtol a' max on colon elok. Jak'ek wal tzalobjbok co c'ul, yujtol a Cham max on coloni, con chiek.
- 10 A wal Jehová ok taynen tzalan Sión ti'. Axa Moab, lanan tec'lay ay yuj Cham bay yul is conobal, axca chi yun tec'lay aytok an ch'im xol tza' no no' ay yul junok olan.
- 11 Chito wal el jaan is k'ab Moab tu', axca chi yun junok chi mak'on a' aej; caxc'al chito yak' yip, palta ok lajwok ay is maynejbail yuj Cham.
- 12 Ok ayc'ay mimek murallail conoblak eb yuj Jehová. Ok yuchayok, cax toxac'al ok aycan wekan sat tx'otx' yuj.

Bit yuj chi ayc'ay owal yuj

26

1 A yet jun c'ual tu', ok co bitnej jun bit ti' bay yul is makbej Judá:

- Ay wal jun co conobal caw wal tec'an yayji. Tol a wal caw Jehová chi coloni, yujtol axca muralla yayji Cham.
- 2 Jakek is puertail co conob ti' yet chi octok jun nación tojol cax yikem.
- 3 Mamin Jehová, ach chak' ayjok ec' is junc'ulal mac tol tec'anc'al yayji is nabal, yujtol asan ach ayach oc yipok c'ul.
- 4 Ayokabc'al oc Jehová yipok co c'ul, yujtol a Cham chi je' con is colon yin tojbalk'inal.
- 5 A' chi ak'on ayc'ay eb lues, cax chi yion ay eb conob tol ch'aan, atac'al bay sat tx'otx' chi ay weknaj yuj,
- 6 yet watx' chi tec'lay ay yuj eb yaynakil, c'al yuj eb meba', xi jun bit tu'.
- 7 A be eb watx' is nabal, tojol toni. Ac'alxác'al chotcantok be eb, Mamin.
- 8 Mamin Jehová, chi jechbanej a tx'oxon aj a ba, yin a beyc'ulnen eb conob. A yochwan co c'ul tol chi nalaytek tzet ayji ocok.
- 9 Asan en ayoc in nabal yet chi ec' ak'bal. Yetok wal masanil in c'ul chach wochej. A yet cha beyc'ulnej el tx'otx' tx'otx' ti', chi nachaj el juj ayon cajan on bay yulyibank'inal ti', tzetbil wal yayji oc a tojolal.
- 10 Caxc'al mi ay a watx'c'ulal yin eb yobtakwom, palta c'am chi yikej eb yunen tojolal. Caxc'al mi xol eb anima watx' nabal cajan eb, palta ac'ala' beybalnen eb yobtakil. Tok ay yelapnok a miman watx'c'ulal yul sat eb.

- 11 Mamin Jehová, ach ti' watx'xa yayji yailal eb oj, palta c'am chi nachaj el yuj eb. A yet ok yilon eb a camc'ulal yin a conob, a ton wal yet ok aon oc yailal yin eb ajc'ul tu', toxac'al ok q'uixwokcan aj c'ul eb. Lajwokokab el eb Mamin, yuj jun c'aybanil watx'xa yayji oj yuj eb ajc'ul oc en.
- 12 Mamin Jehová, oj wali xan watx' ok yun jayji ec'ok, yujtol oj xan chi yi ba masanil tzet chi junej.
- 13 Mamin Jehová co Diosal, ay juntzan eb cham anima max oc co yajawilalok on, palta asan ach chach jaloc co Yajawilok.
- 14 A eb tu' mayal cam eb, tokwal okto ictzoj aj eb. C'amxa yechel ok txecloj aj eb junelxa, yujtol mayal aoc yailal yiban eb, max ak' lajwok ay eb yin junelnej, c'amxa bay ok nalaytek eb.
- 15 Mamin, ach max ak' ch'ib a conob ti'. Max ak' ch'ibok, yet watx' chach ilay can, ach max a jitzc'altok mojonan is makbej.
- 16 Mamin, a wal nan xol co yailal max on txajli ayach yin c'ojan'ulal, a ton yet max aon oc yailal jiban yuj on ak'on cuenta.
- 17 Axca wal junok ix ix yobix tol lananxa yapni c'ual watx'ji c'ul, lananxa tacaj c'ul ix yuj yailal, caywal tu' max jun a satak Mamin.
- 18 Axca tol max oc unin jin, max jaben yail, axca yail unin max txecloj el jin, palta tok ay tzet max jayi. Tok ay jabok colbanil yulyibank'inal max yi ba juj, tok ay bisil anima max aj can juj.
- 19 Palta a pax eb co camnak ok ictzoj aj eb, ok ictzoj aj is mimanil eb. Ok el wayan eb ayic' xol pokok, cax ok aj yaw eb yin tzalojc'ulal. Axca wal chi yun yajol junok awoj yuj yal ak'bal chi ay bay yiban tx'otx' tx'otx', caywal tu' ok yun aontek a sakk'inal ach Jehová, yet ok aj wan eb camnak tu'.

20 Ex wet conob, ocanektok yul e na, cax che makchencan eltek e puerta e yintak. C'ubajek el e ba janic'ok, masantac'al ok yal yec'tok yowal c'ul Jehová.

21 Yujtol ok eltek Cham bay yul is despacho, yuj yaon oc yailal yiban masanil mactxel cajyom bay sat tx'otx' tx'otx' ti'. Manxa ok c'ubaj el tx'otx' tx'otx' eb mak'bilcamok, palta tol ok txecloj masanil jantak yobtakilal max uj yiban.

Bekbanilal Israel

27 1A wal yet jun c'ual tu', ok k'anbalnej Jehová yespada tol al ay is may, cax tol el ye, yin yaon oc yailal yiban no Leviatán, a ton no labaj jelan toj jululok, cax xoyquiřtak chi yut ba. Axca tu' ok yun mak'lay cam no dragón ay bay yul a' mar.

2 A yet jun c'ual tu' ok yal Jehová: Bitnejek an uva tol manxa watx'ilok.

3 Ayin Jehová in ti' chin taynej an, coc'takc'al chi waoc yal an. Chin taynej yet c'ualil, c'al yet ak'balil, yet watx' c'am tzet chi oni.

- 4 C'amtek wowal yin. Matawal ay q'uix, ma yobal ac'un ayaj in satak, chi mi in tec'ayok, chi wak'on tz'a yin junelnej.
- 5 Ta chi yochej eb ajc'ul oc yin in conob k'anon in colwal, ocokab eb yin junc'ulal wetok, xi Cham.
- 6 A yet yajtok tu', a eb conob yinatil Jacob, ok yi pax eb yip junelxa; a Israel ti', axca wal tol ok woljok, cax ok yak'on pax is xumaquil, ok yak'on pax nojil yulyibank'inal ti' junelxa yuj sat.
- 7 A Dios maj yak' yailal yiban Israel axca wal max yun yak'on yailal yiban eb yajc'ul eb. Yujtol man masanilok Israel max mak'cam Cham, man axcaok max yun mak'on cam masanil eb chi mak'on cam eb.
- 8 Max yaoc Cham yailal yiban is conob yin tojcan eb preso. Axca chi yun xulay bey matz'il trigo yuj owal cak'ek' chi tit bay yichcan, caytu' chi yun yilay bey is conob tu'.
- 9 Palta xin, ok ak'lay mimanc'ulal yiban is mul eb yinatil Jacob, asan tatol chi coc'axtok masanil yaltar eb comon dios yuj eb, axca chi yun pojtok ch'en tan yet chi pol-layi, c'amxac'al junok te te' yechel Asera chi cani, tamwal altar yet incienso yuj yilay can is comon diosal eb tu'. Ta axca tu' ok yunej, ok jolayc'ay is yobtakil eb.
- 10 A conob tol tec'an yayji, masanil chi lajwi ayok, axcaxac'al na tol c'amxa yajaw, axcaxac'al bay c'am anima, tz'ininixac'al. Lobal no' chi yuncanok bay chi xew no'. A ton bay tu' xililixac'al chi yutil no' xaklak te';
- 11 axa yet takinx te' chi jay eb ix ix wajon aj k'ablak te' maxax k'ajaytek, cax chi yaon oc eb is k'ak' yetok. A eb conob ti', caw wal c'am chi nachaj el yuj eb, yuj tu' xan a Cham max watx'nen eb, c'amxa chi cusoc c'ul yin eb, tamwal chito tx'ox is yabenc'ulal yin eb.
- 12 A yet jun c'ual yet yajtok tu', ay wal tzet ok yun Jehová, axca tol ok tec'wok trigo ok toktac'al bay a' Éufrates masantac'al bay a' elom aej bay Egipto. A pax ayex israel ex ti' xin, yin junjunal ok yun e sic'lay aj yuj Cham.
- 13 A yet jun c'ual tu', ok xulay jun miman trompeta can yul nuk'. A mactxel c'aynakcantok bay Asiria, yetokc'al eb ibilcantok bay Egipto, ok jayoc eb ul yaon ay ba bay Jehová bay Jerusalén, bay jun tzalan yet ayilal.

Yabixal conob Samaria

28 ¹Ok'bal c'ul Samaria, miman conob yul is sat eb uq'uem an yul yet Efraín. Yelbubal jun ac'al caw wal yax sat yayji Samaria; axa tinani', axca takin corona yili, yujtol a eb is conob, k'aynak eb yin uq'uej an.

- ² A Cham Yajaw max sic'on el jun winak xiwil yip, yet chi yak' owal yin Samaria. Ok jay nak tu', axca chi yun jay yax nabil sakbat, axca caxxuchum uchwajwom, axca wal yak'on yowal a' aej chi bey toji, cax chi el a' elom aej yul is be. Yuj is yipalil jun tu', xan ok uchajtok Samaria.
- ³ A jun conob miman yayji yul sat eb uq'uem an tu', ok tec'ay nak ay yip tu'.
- ⁴ A jun takin corona, yelbub jun ac'al yax sat tu', ok c'aylay elok, axca wal sat te higo chi pet lolok, tol ayman chi loaytok mactxel chi iloni.
- ⁵ A wal yet yajtok tu', a yin Jehová Cham Yajaw yin Masanil ok maynej ba eb is conob maxto cani, axca chi yun maynen ba junok yuj is corona.
- ⁶ A Cham ok ak'on yun eb juez tojolal bay meñail beyc'ulal, ok yak' c'apax yip eb soldado chi taynen conob.

K'anej chi al-lay yin conob Jerusalén

- ⁷ Ay juntzanxa eb chi ec' k'ek'on yuj an, cax chi quistalbi el eb yuj yowal an, a ton eb sacerdote c'al eb chekbej Dios. A yet uq'uem an eb, chi yil eb elaw; a yet max toj an jolom eb, yob chi yut watx'nen el eb is k'anej eb anima.
- ⁸ Yujtol nojnak masanil meña yuj is xaw eb, c'amxa bay colan yuj xaw eb tu'.
- ⁹ Chi yalon eb anima wuj ayin ti': ¿Mactxel chi yochej jun winak ti' chi cuyu'? ¿Ma a bay eb tolto chi el yin im?
- ¹⁰ ¿Tzet wal yuj xan yin jabjabil chi yun cuywaji, ac'ala' cuybej chi yala', ac'ala' beybalej chi yala', ac'ala' chekbanilej chi yala'? ñi eb.
- ¹¹ Xan a yin tx'ok k'anej al ok al-lay bay eb. A ti' yet eb, tol tx'ok conobal ok yak'balnej Dios k'anjab bay jun conob ti'.
- ¹² A ton bay eb ti' max yal Dios axca ti': Tix wal xewilal ti', yuj tu' ak'ek xew nak c'unbinak. A ton wal sicbanil c'ulej ti', ñi Cham. Palta maj yal c'ul eb max yabej.
- ¹³ Yuj wal tu', yak'ban max yal eb tol a is k'anej Jehová ac'ala'c'al tzet chi yalubtanej, ac'ala' beybalej chi yala', ac'ala' chekbanilej chi yala', yin jabjabil cuywaji. Yuj wal tu', pac'an ok yun yayc'ay eb sat tx'otx', ok yasjok eb, ok occan eb yul yal, cax ok ilaytok eb preso.
- ¹⁴ Yuj wal tu xin, ex buchwajwom, tol yajaw ex bay jun conob Jerusalén ti', abek wal k'anej Jehová ti'.
- ¹⁵ Yuj wal tol max e yal axca ti': Ay jun co laj k'anej yetok camich, xan a yet ok jay uchlejbail, c'am tzet ok jay jin; yujtol a k'anej man yelok max jaoc yipok co c'ul, ok co col co ba yuj co lek'tial, quex chi.
- ¹⁶ Yuj wal tu xin, xan chi yal Jehová axca ti': Ayin wal max wacan oc jun ch'en ch'en yet yichbanilej bay Sión, tol miman yelapnok, tol sic'bil

el ch'en wuj yet chi oc bay txiquin na. C'am bak'in chi c'ayil jun yich ayay tu': a mactxel chi yaoc yipok c'ul, c'ame'al tzet chi na'.

17 A bay jun na ok watx'jok tu', ok wak'balnej tojolal axca tx'uxubej, axa jichanil ok wak'balnej axca plomo, xi Cham.

Palta a sakbat ok c'ayon el jun ayoc yipok e c'ul, a ton lek'tial. Axa a' aej ok ec' ikoncan el e colbalba.

18 Ok lajwok ay e laj k'anej yetok camich. Ok jay jun uchlejbaile e yin, cax ok ex cancan yalan yuj.

19 Axa yet chi c'oli jayi, ok ex ilay bey yuj. Junjunc'al k'inibalil ok jay e yin. Axa yet c'ualil, c'al yet ak'balil, ok ex bilcan aj yuj, yet ok e yaben yabixal.

20 Ok e yuncan el axca nak chi way bay junok c'otxan tx'at yetok junok txowej txennej sat.

21 Axca max yut mulnaj ba Jehová bay witz Perazim, c'al bay yac'alil yul yet Gabaón, caytu' ok yut mulnaj ba yin tzet chi yochej c'ul, tol c'ayubtakxac'al ok yunej.

22 A tinani xin, manchak ex buchwaji, yet watx' c'am chi aj can yailal e yiban. Max wab tzet max yal Jehová Cham Yajaw yin Masanil. Mayal na' Cham tol ok yak' lajwok masanil is makbej jun conob ti'.

23 Taynejek e yab tzet yetal ok wala', chi cam wal e yaben in k'anej:

24 A yet chi toj junok mulnajwom yawon yawoj, man asanokc'al k'uoq tx'otx' chi yun yetok arado, ma rastrillo bay is tx'otx' tu'.

25 Manmitok tol a yet mayal watx'ji tx'otx' yuj, cax chi yawontok eneldo c'al comino, cax chi yawon c'apax ixim trigo yin txolilal; axa bay tilak chi awlay cebada c'al ch'im trigo, atac'ala' makquiltakil inat.

26 A Dios chi tx'oxon yin tzet chi yutej.

27 Yujtol a eneldo tu' c'am chi tec'layi, tamwal chi ec' junok carreta yiban comino. Toc'al chi tenlay el eneldo yetok junok te', axa an comino xin, chi mak'lay el yetok junok c'ax.

28 Yojtak nak munlajwom yion el bak' ixim trigo yetok junok carreta chi ec' yiban, palta c'am chi oxcac'al ijan yec'c'al yiban, talaj chi pojtok ixim bak'ej yuj.

29 A juntzan jelanil ti', a Jehová Cham Yajaw yin Masanil chi ak'oni. C'ayubtakxac'al yoc tzet yetal chi nabalnej el Cham, cax chic'al yun yetok is jelanil.

29 ¹Ay, a wal jun conob chi yik altar yet Dios, bay max ayji ec' David! A yet ok ec'tok junxa abil, yetokc'al juntzan k'in chi ec'c'alta' yet junjun abil,

²a Dios ok yaoc eb anima bay jun conob chi yik altar yet Dios yin bilc'ulal. Ay cusc'ulal, c'al k'akawilal ok ujok, axa jun conob tu', axca junok altar ok yuncan yul sat Dios.

- ³ Ok chektok Cham is soldado yet chi yoy ba eb yin Jerusalén tu',
 watx' ok yun yoc jun muralla bay yinlak, yuj makchen ajok, cax
 ok oc yin yet ok yak'on owal.
- ⁴ A Jerusalén ok ilay ayok. Atac'al bay sat tx'otx' tx'otx' ok k'anjabok,
 toxac'al ok numnon k'anjab ay xol pokok. Axa yul tx'otx' tx'otx' ok
 eltek is k'anej, axca is k'anej mac chi k'anjab yetok pixan camnak.
- ⁵⁻⁶ Axa wal ok yunaj xin, yin wal aymanil ok yaoc Jehová yailal yiban
 masanil eb ajc'ul oc e yin, ex aj Jerusalén. Ok mak'waj c'u, c'al
 yec' quixcab ayxamay bili. Caw wal ay mimek owal cak'ek',
 c'al owal yaxnab, c'al k'ak'ej c'aywajwom. A wal juntzan ajc'ul,
 c'amxa yalbanil bisil tu', lajanxac'al ok yuncan eb axca pokok tol
 coc'xac'al. A masanil eb chex etneni, toxac'al ok ilaycantok eb
 axca chi yun yilaytok matz'il trigo yuj cak'ek'.
- ⁷ Masanil juntzan conob c'amxa yalbanil bisil tu', tol chi yak' owal
 yin jun conob chi yik altar yet Dios, tol chi oxcac'al oyan yin, yin
 yuchon ay is murallail, lajanxac'al ok yut ba eb axca junok ay tzet
 chi wayichnej yet ak'balil.
- ⁸ Lajan wal axca junok tol ay wajil chi waycan ajok, axa yin is wayich chi
 yila' tol chi lowi, palta a yet chi el lenaj wayan, ac'ala' ay is wajil. Ma
 axca wal junok ay takintial chi waycan ajok, axa yin is wayich chi yila'
 tol chi yuc'a', palta a yet chi el lenaj wayan, caw wal ayc'al takintial,
 toxac'al c'unjabinak c'ul yuj. Cay wal tu' ok yun yeloc juntzan conob tol
 c'amxa yalbanil bisil tu', chi oc yin yak'on owal yin tzalan Sión.
- ⁹ Beyanekc'al tok yin e c'am nabalil ayex ti'. Beyanekc'al tok yin tol
 axca c'am chex ilwi jabok. Ec'aneck'al k'ek'on axca uq'uem an,
 caxc'al c'am an che yuq'uej.
- ¹⁰ Yujtol axca wayan max yatek Jehová e yiban. Axca bak' satej yayji oc
 eb chekbej Dios yuj eb conob, palta a Jehová max makchen el nabal
 eb, axca chi yun makchen sat junok chi wayi yetok junok k'ap.
- ¹¹ Yujtol a masanil is k'anej eb chekbej Dios, lajan ok yuncan ayex axca
 tzet yetal tz'ibbilcan yul jun un tol chulbil, cax ayoc selloal. Ta
 chi ak'lay bay junok tol chi je' yilon un, cax chi al-lay bay axca
 ti': Il jun un ti', ta xi bay, cax chi tak'wi axca ti': C'am chi je' wuj
 wiloni, yujtol ayoc is selloal, xi mi.
- ¹² Ta chi ak'lay bay junok mactxel tol c'am chi je' yilon un: Il jun un ti',
 ta xi bay, chi mi yal axca ti': C'am chi je' wuj wiloni, xi mi.
- ¹³ Max yalon Jehová ayin axca ti': A juntzan conob ti', yinc'al k'anejal
 chin yak' serbil eb, toc'al chi yal eb tol ay welapnok yul sat eb,
 palta a wal yanimail eb najat tx'uman el win, chi tz'ak yiay ba eb
 ayin, palta asan juntzan chekbanil anima chi yak' eb cuylayok.

- 14 Yuj tu' xan a tzet yetal tol c'ayubtak yoqui, c'al milagro ok wunc'al bay jun conob ti', toxac'al ok c'aycan aj c'ul eb yuj. A jelanilal eb jelan, c'al yetok is yaj nabalil eb aj nabal xol eb, toxac'al ok c'aycan ajok, xi Cham.
- 15 Ok'bal wal c'ul eb chi c'ubaj el ba satak Jehová yaloni, chi c'ubaj el eb tzet yetal chi na', c'al yin ewantakil chi yun eb cax chi yalon eb axca ti': Tok ay mac ok on ilonok, tok ay mactxel ok ojtaknen elok, xi eb.
- 16 Palta ayex ti', q'uexan che yutej. Tokwal lajan tx'otx' tz'akbejal tx'otx' yetok mac chi tz'akoni. A junok tx'otx' tol tz'akbil, xin ta chi je' yalon bay is tz'akomal axca ti': Manak ach max quin a tz'aka', xin ta xi bay? Tamwal junok bijan tx'otx' tz'akbejal tx'otx' chi je' yalon bay mac chi tz'akoni: Ach ti' man ojtakok tzet chonej, tokwal xi tx'otx' bay.

Chi al-lay tol ok col-lay el Israel

- 17 Toxawal ok oc tx'otx' k'aktelak ti' yin bay ok oc mulnajil, axa bay chi occ'alta' mulnajil, ok occan yin k'akteal.
- 18 A yet jun c'ual tu', a eb c'am chi je'c'alta' yabeni, ok yab eb, ta ok awtelay aj junok un yab eb. A eb c'am chi je' yilwani, axca tol xol k'ekk'inal ayic'ok, a eb tu' ok je' yilon eb.
- 19 A eb yaynakil caw wal ok tzalobjok aj eb yin Jehová. A eb caw wal meba', ok tzalobjok aj eb yin is Diosal Israel, tol Asanxanej Ocok.
- 20 Ok lajwok ay eb c'am yabenc'ulal yin yet animail; a eb ch'aan chi yut ba, c'amxa junok eb ok can yin yiquisal. Ok c'ayil masanil eb tol asan yobtakilal chi na',
- 21 a ton mactxel chi naaj k'anej yin yet animail, cax chi tenchanen eb juez yet chi alay oc yailal yiban eb yobtakwom, cax chi yak'on eb lek'tial yet watx' c'am chi yun eb tojolal yiban eb watx'.
- 22 Yuj tu' xan a Jehová Diosal Israel, Cham max coloncan el Abraham, a' chi alon axca ti': A tinani' ex in conob, ex yinatil Jacob, c'amxa bay ok ex q'uixwok ajok, c'amxa bay ok cakbok el e sat yuj q'uixwilal.
- 23 Yujtol a yet ok yilon eb e yinatil tzet yetal ok wun xol eb, ok yojtaknej el eb tol asanxanej in ocok, cax ay welapnok yul sat eb, ayin e Diosal in ex israel ex ti'.
- 24 A mactxel tol ayoc yin some'ulal, ok cuychaj el jelanilal yuj, a eb chi alxi ajok, ok cha yab eb cuybanilej, xi Jehová.

Tenchebal yin eb chi say colwal bay Egipto

30 ¹Max yal Jehová axca ti': Ok'bal c'ul eb anima ec'nakilwom, tol xiwil tzet chi na eb yul yet, c'am chi yal pax eb wabej, comonc'al chi watx'nej el eb junok trato yul yet, tok pax wal ayin chi wak' yun eb. Yuj tu' xan chi aj can is mul eb yiban.

- 2 Ayman chi toj eb bay Egipto, tok chi yal eb ayin. A yipalil reyal Egipto tu' chi yochej eb chi coloni, cax chi yaoc eb Egipto tu' yipok is c'ul.
- 3 Palta a is colwal jun reyal Egipto tu', ok yutcan aj ba yin q'uixwiltakil bay eb, axa pax colwal Egipto ok yutcan aj ba yin some'ulal.
- 4 Caxc'al ayxa tok eb is chekbej bay conob Zoán, c'al bay conob Hanes yul yet Egipto tu';
- 5 ok el q'uixwil eb masanil yuj jun conob tu', c'am tzet ok yi' eb yin, tamwal ay colwal ok yak' eb bay. A ti' yet eb, ok q'uixwok aj c'ul eb yuj eb, xi Jehová.
- 6 Tix yalon Cham ti' yuj no no' chi eq'uel bay yul tx'otx'al Néguév: Chi eq'uel no' bay jun beal yatakilal. A tu' cajan ec' no coj tol yayjic'al yel yaw, ay no owal labaj, c'al no' chi toj jululok can. A no chej, c'al no camello chi ikontok beyomal, c'al tumin conob Judá is sabalok bay Egipto, jun conob c'am chi colwaji.
- 7 Maj je' yuj, c'am yip, tok chi tzakay yak'on is colwal, a yuj tu' xan chi wak' yik axca ti': No' tol ay may yel yaw, palta c'am pax tzet chi je' yuj, quin chi, xi Cham.
- 8 Max yal Jehová ayin: Tz'ibej bay junok libro satak eb anima ti', yuj tzet lanan walon ayach ti', yet chi cancan yabixok eb yin tojbalk'inal, yuj naontek eb yet lajub c'ual.
- 9 Tol a jun conob ti', caw ec'nakilwom eb; naom aj k'anej eb, c'am chi yal c'ul eb chi cha yab in k'anej.
- 10 Chi yal eb bay eb in chekbej: Manchak e yal ayon tzet max e yil tu'. Manchak e yal k'anej yet tojolal ayon. A k'anej chi cha co c'ul che yal ayon, manchak e yican el jochwan on.
- 11 Elanek yul co be on. Manchakxa e yaltek ayon Cham co Diosal Asanxanej Ocok, ayon israel on ti', xi eb, xi Cham.
- 12 Yuj wal tu xin, a Cham Dios Asanxanej Ocok, is Diosal Israel chi alon axca ti': Ti wal ayex max e yintaknej el jun tenchebal ti'. Axa pax yaxc'ayinakil, c'al yobc'ulalil che yaoc yipok e c'ul.
- 13 Yuj wal tu xin, ayex caw ay e mul, xan lajan ok e yun axca junok muralla pojiltaxac'al, lem xixac'al ok ay bulnajok.
- 14 Ok ex c'aylay el axca jun miman xalu chi mak'lay poj yin c'am yabenc'ulalil. A juntzan pojilal tu', c'am junok bijan chito je' yoc letxbalil, tamwal yin iojtok tzak'ak' bay cocina, xi Cham.
- 15 Yujtol axca wal ti' yalon cham Jehová Diosal Israel tol Asanxanej Ocok: Meltzojanek ayin, cax chin e yaon oc yipok e c'ul, cax manchak ex oc il. Catawal tu' ok ex colchajok, quin chi, palta maj wal yal e c'ul.
- 16 A ti' e yet, max e yal axca ti': C'amak toni, tol ok on aj yiban chej, cax ok on tok elok, quex chi. Yel toni, ok ex el axca tu'. Max e

yal c'apaxok: Ok on oc yiban chej tol jalan beyi, quex chi. Palta yelxac'al jalan bey e yajc'ul tu' e yintak.

- ¹⁷ Mil wal e bisil ok ex tok elok, cax asan ch'an jun ajc'ul uktenej ex. Ok ex tok el e masanil yin asan owan ajc'ul uktenej ex. Jaywanxanej ex ok ex canok, axca cancan lecan junok te te' jolom witz, ma axca bandera chon tzalan, xi Cham.

Is yabenc'ulal Dios yin is conob

¹⁸ Palta xin, ti' wal chex echbanelay yuj Jehová. Ta che watx'nej e ba, ti wal chito ok' is c'ul e yin yin yak'on mimanc'ulal, yujtol a Jehová tojol ton Cham, cax watx' yet masanil anima chi yaoc Cham yipok is c'ul.

¹⁹ Ex conob aj Sión, tol cajan ex bay Jerusalén, majxa ex ok'ok; a Jehová ok ok' is c'ul e yin yet ok yaben yel e yaw. Yet ok e yalon e ba bay, ok ex tak'wej Cham yin ayman. ²⁰ Caxc'al chex eq'uel bay yatakilal yuj Jehová, palta acaw Cham ok ex cuyonok; manxa ok c'ubaj el ba ayex, palta ok e yil yin. ²¹ Ta ok ex el yul be, cax chex toj bay e watx' k'ab, ma bay e q'uexan, ok e yab yoc jun k'anej bay e yintak, xi: Manak tu' chex toji, tix be chi toj ti, xi. ²² Catatu' ok e yetnentok e yechelej tol plata, c'al e mentes ayoc oro yin, ok e k'okcan elok axca tz'il k'apej tol yajbejtak yili. ²³ Catawal tu' bian, ok yaontek Cham Yajaw nab yiban e yawoj. A yet ok e yawon e yawoj, caw wal ok je' awoj tu', watx' ok yunej. A no e wacax yet jun tiempoal tu', colanc'al bay ok il-lay low no'. ²⁴ Toltax a no e wacax, c'al no e burro chi mulnaji, watx' ixim cebada ok lo' no'. ²⁵ A wal yet ok ayc'ay cuartel yet soldado eb e yajc'ul, cax ok oc miman camich xol eb, xiwil mimek aej ok el yakan bay jolomlak witz, c'al bay chonlak tzalan. ²⁶ Axa yakan xajaw, ok yun axca yakan c'u; axa pax yakan c'u tu', ukel ok yun yowal yakan. Axca wal yakan ukeb c'ual ok yun jun c'ual. A wal yet tu', ok yantej Jehová is conob. Ok pichon is yas eb tol a' max ak'on yasjok.

Yailal Asiria

- ²⁷ Ilabi, najatac'al chi tit Jehová. Yuj yowal is c'ul chi aj k'ak'ej c'al mub. A yet chi k'anjabí, cax chi tz'atok tzet yetal.
- ²⁸ Yuj is k'anej Cham xan chi jay c'aybanilal, axca wal junok miman aej chi el yul is lobal, chi apni a' tac'al tel nuk'ej. Ok ilaytok eb ajc'ul oc yin Cham, axca k'alemal trigo chi letxlay aj can. Axca tol ok oc is frenoal eb conoblak tu', yet chi ilaytok eb bay c'aybanilal.
- ²⁹ Axa ayex ti xin, ok ex bitnok, axca yet k'inál Pascua yet ak'balil. Tzalojc'ulal e yet, axca wal chi yun eb chi xu' is flauta yet chi toj bay tzalanil is templo Jehová, Cham Colomal Israel.
- ³⁰ Ok yak' Jehová ablay is nuk' can yel yaw, cax ok yaben eb yipalil yowal is c'ul yetok yin xak k'ak'ej c'aywajwom, c'al caxxuchum, c'al bil c'u, c'al sakbat tol mimek ch'enxac'al.
- ³¹ A wal eb aj Asiria, ok xiwcan aj eb yet ok yaben eb yul nuk' Jehová cax ok mak'lay k'aj eb yuj Cham yetok is k'okoch.

- 32 A yet ok yaon oc cham yajaw junjun jichan k'okochej yin Asiria tu',
ok oc tambor c'al arpa yuj is conob, ay is may jun owal ok oc bay
Asiria yuj Cham.
- 33 Yujtol a tz'abal camnak yet is reyal Asiria, payxatax maxax watx'ji,
ay jun bulan si' tol miman sat cax najat yich. A Jehová ok ak'on
yowal is k'ak'al yuj is k'anej.

Ok'bal c'ul eb chi say colwal bay Egipto

31 ¹Ok'bal c'ul eb chi toj bay Egipto yin sayoj colwal. A eb soldado
yet Egipto, c'al is chej, c'al is carruaje tol miman bisil, chi yaoc
eb yipok is c'ul; palta c'am chi yaoc eb sat yin Jehová, Cham Diosal Israel
Asanxanej Ococ, tamwal chi k'an eb colwal bay Cham.

²Palta jelan c'apax Cham, ok yitek Cham uchlejibail yiban eb. C'am
chi ec'tok tzet chi yal Cham yin jun conob yob, c'al yin eb chi
colwaj bay eb unem yobal tu'.

³A eb aj Egipto animac'al eb, cax man Diosok eb. Axa is chej eb,
no'c'al wal no', tokwal espíritu no'. Yuj wal tu xin, a wal yet ok
yion aj Cham Jehová is k'ab, ok ayc'ay eb colwajwom, cax ok ay
c'apax c'ay eb chi col-layi, junnej ok yun cam eb.

⁴Yujtol a Jehová Cham Yajaw yin Masanil max alon ayin axca wal ti':
Axca wal yel yaw no coj yin junok calnel mayal yi', caxc'al xiwil
eb ilom calnel chi oymoj yin no', tokwal ok el no' yet chi el yaw
eb yin xibteni. Cayin wal tu', c'am mactxel chi je' in is tenon oc
wanaj yet chin ayol ul wak'on owal bay tzalan Sión.

⁵Axca wal no tz'iquin chi taynej yune', chi ec' jupupok yiban wayub,
caywal tu' ok wut in taynen conob Jerusalén, ok in taynej, ok in
colcan el eb, xi Cham.

⁶Ex conob Israel, meltzojanek bay Cham mac bay tenomtak max e yut e ba.

⁷Ok jay jun c'ual yet ok e k'okcan el e yechelej plata, c'al oro tol max
e watx'nej yuj e yec'nakilal.

⁸Ok ayc'ay Asiria yuj ch'en espada man animaok chi ak'balneni. Ok
elcan aj eb ach'ej yuj, axa yoccan eb yin mosejal tu'.

⁹Yuj wal xiwilal, xan ok tok elaj is reyalil eb, cax ok elcan aj is capitaniil
eb, ok bekcan eb is bandera. A Jehová chi alon jun ti', Cham ay
k'ak'al is yaltar bay tzalan Sión, a k'ak'al yowal is c'ul chi chaw bay
Jerusalén.

A cham rey yet tojolal

32 ¹Ay wal jun cham rey ok yak' yajawilal yin watx', ay eb yajaw
tol watx' ok yun yak'on yajawil yin tojolal.

- 2 Junjun eb, axca wal enelej yayji eb bay cak'ek', c'al enelej bay caxxuchum, axca sanjail a' aej bay takin tx'otx', axca wal yenel junok miman ch'en bay takin tx'otx'.
- 3 A eb axca tol c'amta chi je' yilwi c'al yabeni, ok cam yilon eb c'al yaben eb is k'anej Dios.
- 4 A mactxel sombinak ay is nabal, caw aj nabalxa ok yun eb. A mactxel man tx'ijanok k'anjabi yet yalantok, axa ok yunej, caw tx'ijan ok yun k'anjab eb.
- 5 A junok mitz'winak manxa ok al-layok tol watx', axa pax junok etnewom, manxa ok al-layok tol ay yelapnok.
- 6 Yujtol a eb mitz'winak tu', asan is mitz'winakil eb chi yala'. Axa nabal eb, asan yobal chi na', yet watx' chi yun eb tzet yetal ay yowalil. Chi yalon yobal k'anej yin Jehová, c'am chi colwaj bay eb ayoc yin majilal, cax chi yion ec' yuc'a' anima chi tak is ti'.
- 7 A eb etnewom tu', chi yi yip eb yuj is cuyoj tol yob, cax chi naon aj eb tzet yetal tol yob. Chi etax eb meba' yuj is lek'tial eb tu', a ton mac ayoc yin majilal tol chi k'an watx'jok el is k'anej.
- 8 Axa eb elbej yel yuj, a' elbejalil chi na', axa yuj elbej yel yuj eb tu', ok yi eb yip.

Tenchebal eb ix

- 9 Axa ayex ix ex ti', tol c'amtac'a tzet che na'. Abek wal tzet ok wal ayex.
- 10 C'am tzet che na' wal e yalon tinani'; palta xin, yetc'al junab tinani' ok ex bilajok, tol c'amxa jooj trigo, c'amxa sat an uva ok ajok.
- 11 A wal mac ex ix ex c'am tzet che na' ti', xiwanek xin, iek el juntzan e watx' pichil tu'. Aek oc an pichilej el, yuj e tx'oxon elok tol ayex oc yin yailal.
- 12 Tx'oxek el e yailal tu', yujtol max etax el e tx'otx' bay xiwil chi je' awoj.
- 13 Yujtol a te q'uix, c'al an ac'un ok aj socan bay tx'otx'al in conob, c'al yul juntzan mimek na yul conobal tol ayc'al k'in.
- 14 Yujtol a is mimek na eb yajaw, ok cancan tz'inanok, ok c'aycan el eb anima wajan bay yul conobal. A is cuartel eb ayoc yipomalok conob, ok occan wayubalok no no' yin tojbalk'inal. A bay tu' ok xew no' xolakteal burro, ok low no wacax.
- 15 Palta ok jay Yespíritu Dios jiban junelxa, axa jun tz'inan tx'otx' tu', ok yutcan aj ba yin yax tx'otx'al; axa jun yax tx'otx' tu', xiwil sat awoj ok yak' bay.
- 16 Axa bay masanil tx'otx' ok beybalnelay tojolal, c'al watx'c'ulal.
- 17 A yuj chi beybalnelay tojolal xan ay junc'ulal, tzalojc'ulal, c'al masanc'ulal yin tojbalk'inal.
- 18 Ok cajay in conob yin junc'ulalil, ok yak' tzalojbok eb c'ul yin masanc'ulalil.

19 (Palta ok ayc'ay te k'akte' yuj sakbat, cax ok c'aylay el conob.)

20 Watx' e yet mac ex chex awwi bay tilak a' aejlak, cax colan bay chi low e wacax, c'al e burro.

A Cham Yajaw ayoc yipok co c'ul

33 1 Ok'bal ach c'ul, ach c'aywajwom tol c'amto mac chach c'ayon elok, ach iom aytek satej, tol c'amto mac chi ion aytek a sat. A yet ok a bekon a c'aywaji, ok ach c'aylay elok. A yet ok a bek eon aytek satej, ok ilay c'apax aytek a sat.

2 Mamin Jehová, ok' wal a c'ul jin on, tol yip ach co c'ul. Ocan jetok yet junjun c'u. A yet ay yatakilal, colonc'al el xin.

3 A yet chi yaben eb conob tol chi tit owal, chi toj eb elok. A yet chach jay colwaj ayon, chi toj mimek conob elok.

4 Axca chi yun c'ayon el no chapulín awoj, caywal tu' ok yun sic'laytok is tzet yetal eb ajc'ul tu'.

5 A Jehová, Cham Axac'al Ocok, cajan Cham bay satcan, ok yikbaj Cham eb aj Sión yin yak'on eb watx'c'ulal c'al tojolar.

6 A Cham ok ak'on tec'anilal bay eb aj Sión tu'. A jelanilal c'al ojtakbilal ok yak' Dios, a' ok oc is colbanilok eb; axa ikemalil bay Jehová, a ton is miman beyomalil eb tu'.

7 Abek wal yel yaw eb soldado bay yina yuj xiwilal. Abek wal yok' eb chekbiltok yaon oc junc'ulal.

8 A belak max cancan tz'inanok, c'amxa mac chi ec'jab bay yuj xiwilal. Max etax el is lajti' eb. Max intaknelay el eb testigo, yujtol c'am mactxel tol ay yelapnok.

9 Max cuscan aj tx'otx' tx'otx', max etaxcantok yili. A Líbano max q'uixwi canajok, yujtol max k'aklay aj is teal. Axa Sarón max yutcantok ba yin tz'inan tx'otx'al, axa Basán, c'al witz Carmelo max el t'iranok.

10 Yuj tu xin, chi yal Jehová bay eb conoblak: A wal tinani' xin, ok in aj wanok, tol ok in tx'ox masanil in mimanbilal.

11 A tzet yetal max e nabalnej, c'al tzet yetal max e watx'nej, naba k'alemc'al elok. Ok in xutok in cak'ek', axa tz'acantok tu'.

12 Tan ok yuncantok conoblak, ok chawaj is k'ak'al axca chaw k'ak'al te takin q'uix.

13 Mac ex najat ayex, c'al ex cawil ayex, ilek wal xin, tzet yetal mayal wunej. Chi cam e yojtakneni tol chic'al je' wuj, xi Jehová.

14 A eb yobtakwom, max c'ayaj c'ul eb bay Sión, cax xiwilal max on eb c'am Dios yul sat. Chi yalon eb: A Jehová axca jun k'ak'ej c'aywajwom yayji, c'amc'al chi tani. ¿Mac on ok je' co cajay yetok? xi eb.

- 15 Watx' yet mac chi beybalnej tojolal cax k'anej yel chi yala', c'am chi yal c'ul chi oc beyomal yuj chaon tumin yin ewantakil, c'am chi yaltok yet yin mak'oj cam anima, tamwal chi yut ba yin tol c'am chi yil yobtakil.
- 16 A ton mac axca tu xin, c'am tzet ok onok, axca tol cuartel bay cajan, cax ayc'al lobej, c'al yuc'a'.
- 17 Ok e yil yin junok rey yetok is mimanbilal junelxa, ok apnok makbej conob ti' tac'al najat.
- 18 A yet ok e naontek e xiwilal yet yalantok ok mi e yal axca ti': ¿Baytal ay nak tx'ok conobal chi k'anon tojlalab? ¿Baytal ay nak chi bison ch'en torrelak yuj nalayi, jantak is beyomal co conob? quex chi mi.
- 19 Manxa ok e yil yin eb tx'ok conobal xiwil luesal tu', eb anima tx'ok k'anjabi, c'am chi nachaj el is ti' e yuj.
- 20 Ok e yil Sión, conobal yet co k'in, a ton Jerusalén, conob bay ok ayjok numumial. C'am bak'in ok q'uexlayok; axca junok mantiado tol man ok oclay ajtek is yestacail, tamwal ok t'inchaj junok is tx'anil.
- 21 A bay tu' ok tx'ox ba Jehová yetok is mayk'ak'al co xol. Xiwil aej tol mimek sat ok el yakan bay tu'. A bay juntzan aej tu', man ok je' yoc eb ajc'ul yetok is mimek barco yet owal.
- 22-23 A is tx'anil juntzan barco tu' man ok tok'lay cawbok yin yoyal, c'amxa bay ok yi yip tx'anil is k'apil. Ok pojlaycan ec' is tzet yetal eb ajc'ul tu', toltax ok tzakaytok eb chi ay beyi yion jabok yet, yujtol a Jehová ok on colon elok. A wal caw Cham ayoc co juezalok, co watx'nem ley, cax co reyal yayji.
- 24 C'am junok cajyom bay Jerusalén tu' ok alonok: Ya' in ay ayin ti', man xiok eb. A eb cajyom bay jun conob tu', ok ak'lay tan is mul eb.

Max oc yailal yiban Edom yuj Dios

34 ¹Ex conob, jitzektek e ba yuj e yabeni. Ex nacionlak, taynejek e yabej. Yabokab c'apax yulyibank'inal ti', yetokc'al masanil tzet yetal ay bay.

²Yujtol a Jehová, caw wal aytek yowal yin masanil nación, yetokc'al yin masanil is soldado. Mayal nabalnej elok tol ok yak' lajwok ayok, c'al yak'on cam eb masanil.

³Toxac'al ok beklaycan bulan juntzan eb ok cam tu', caw wal ok aj jabil juntzan mimanilej tu'. Toxac'al ok cakbok el jolomlak witz yuj chic'.

⁴Masanilxac'al tzet yetal ay bay satcan ok lajwok ayok, axa satcan ok c'ayajok, axca junok tzet yetal chi chul-lay ajok. Masanil tzeztebalej, ok tan is k'ak'al, axcaxac'al chi yun takaj xak an uva c'al te higo, cax chi pukayok.

- ⁵ Chic'takxac'al ok yuntok yespada Jehová bay satcan, cax ok jay c'apax yiban Edom, yujtol a jun conob tu', mayal low yin yuj Cham tol ok camok.
- ⁶ Ok oc chic', yetokc'al sebo yin yespada Jehová, axca chi yun yet chi cam no calnel, c'al no chiwo yin xajanbalil. A bay Bosra ok watx'nej Jehová junok xajanbal, caw wal miman eb aj Edom ok cam yuj.
- ⁷ Caw wal ok ayc'ay eb axca chi yun yayc'ay no xolakilteal wacax, no ach'ej wacax, c'al yetok no toro. Toxac'al ok chic'bokcan el yiban is tx'otx'al eb, ok tok c'apaxcan seboal eb bay xol pokokal tx'otx' tx'otx'.
- ⁸ A toni, a wal yet jun c'ual tu', ok yak' Jehová paktzebal, a ton wal yet jun abil tu' ok yican el Cham yowal c'ul yuj tzet max utlay conob Sión yuj eb.
- ⁹ A masanil a' aej bay Edom, ok yutcan aj ba a' yin alquitrán, axa masanil tx'otx' pokok, ok yutcan aj ba yin azufreal, toxac'al ok chaw k'ak'al tx'otx' tu' yuj alquitrán tu'.
- ¹⁰ Manxa ok tan k'ak'al yet chi ec' c'u, c'al yet chi ec' ak'bal. Caw wal tol ok ajc'al is mubal. Ok beklaycan yin tojbalk'inal, c'amxa junok mactxel ok ec' bay tu'.
- ¹¹ A bay tu' ok ayjok ec' no xotx', yetokc'al no utxum, ok watx'nej no joj is wayub bay tu', yetokc'al no tonton. Tz'ininixac'al ok yuncan jun conob tu' yuj Jehová.
- ¹² C'amxa bak'in ok oc junokxa rey yet chi yajawbi yiban. Masanil eb yajaw ok c'ayaj eb.
- ¹³ Axac'al te q'uix ok ch'ibaj bay despacho, asanxanej an sak q'uix ok ch'ibaj bay cuartel. Asanxanej no mimek ok ok ayjok bay tu' yetok c'apax no avestruz.
- ¹⁴ Junejxac'al ok ayjok no wax yetok no ok, yetok c'apax no xolakilteal chiwo; toxac'al ok yawtelej ba no' bay tu'. A bay tu' ok ayjok ec' eb yibank'inal chi xibtewi yet ak'balil, axac'al bay tu' ok xew eb.
- ¹⁵ A bay tu' ok watx'nej no xotx' is wayub, ok yay no jos, axa yelteq yune' no' tu'. Ok waj ba no' bay tu' yin taynen ba. A bay tu' ok waj c'apax ba no tx'acabaj, junjunxac'al no txutxex yetok junjun no mamej.
- ¹⁶ K'anlejek e yab tzet xi tx'an Libro Jehová, cax ilek tx'an: A masanil juntzan no no' chi binaj bay tu', c'am junok no' tol c'am bay tu'. C'am junok no' tol c'amic' junok no txutxex yetok; yujtol a Jehová max naoni tol caytu' ok yun axca tu'. A Yespíritu Cham ok wajban oc no' masanil.
- ¹⁷ Junjunc'al no', txequel bay ok ayjok; a wal caw Cham ok tx'oxoncan bay junjun no' bay ok ayjok. A bay tu' ok ayjok no' yin junelnej.

A Israel chi meltzoy bay Sión

35

¹ Tzalojokab aj tz'inan tx'otx'. Xumaclokokab takin tx'otx'.

² Ayokab is xumaquil axca yet an chochol, ayokab is tzalojc'ulal, elokab lenaj chi yila'. A Dios ok watx'nen oc

sic'libil, axca watx'il yili Lfíbano, tol yax tx'otx' wal sic'libil, axca witz Carmelo, axca c'apax yac'alil Sarón. Masanil anima ok ilon yin is mimanbilal, c'al yipalil Cham Jehová co Diosal.

³ Aek oc yip is k'ab eb c'unjabinak. A eb c'unbinak yakan, iptzejek eb.

⁴ Alek bay eb cabtak c'ul: Tec'bajek e ba, manchak ex xiwi, tix e Dios ok ex colon el ti'. Axa eb ajc'ul oc e yin xin, ok alay oc yailal eb axca wal is mojalil, quex chi.

⁵ Catawal tu' bian, ok ilwan eb c'am chi ilwi, axa eb chacan ok yab eb.

⁶ Axa eb chi ay beyi ok watx'jok oc bey eb axca bey no tx'ucchej. Axa bitni aj eb c'amc'alta' chi je' k'anjab tu', yujtol xiwil aej ok ajol bay tz'inan tx'otx'.

⁷ A bay takin tx'otx', najablak ok yunej, xan a bay takin tx'otx' tu', xiwil aej ok ajolok. A bay cajan ec' no ok tinani', a tu' ok ch'ibaj te aj c'al an junco.

⁸ A bay tu' ok ec' junok miman be, ok yikcan aj jun be tu', Be eb yetxa Dios. A eb man watx'ok, atac'ala' yalon ley, c'am chi je' yec' eb bay tu'. A eb yobtakwom, man ok je' yikban c'aytok mac chi ec' bay jun be tu'.

⁹ Man ok apnok no coj, tamwal juntzanxa no no' ay is may bay tu'. A bay jun be tu' ok ec' eb colbilxa.

¹⁰ A mactxel max col Cham Jehová, ok bitnok eb yuj tzalojc'ulal, cax ok apnok eb bay Sión. Ayc'al tzalojc'ulal eb yin tojbalk'inal, ok chaloj watx'ilal c'al tzalojc'ulal yuj eb, axa c'ayaj yailal tu', c'al ok'ilal.

Max tit Senaquerib yin Jerusalén

(2 R 18.13-37; 2 Cr 32.1-19)

36 ¹A yet 14 abilxa yoc cham Ezequías yin reyal, a yet tu' max oc cham Senaquerib reyal Asiria yin yak'on owal yin masanil conoblak yet Judá tol watx' yayji oc is murallail, cax max ayc'ay juntzan conob tu' yuj. ²A bay Laquis ayic'ok max chekontok jun is comandante yetok jun miman bulan soldado, yuj toj yilon eb cham rey Ezequías bay Jerusalén. A bay chi el a' bay a' miman najab ayoc bay yiban, bay be chi toj bay chi tx'ajlay k'apej, a bay tu' max watx'nej cham comandante tu' is campamento. ³Max eltek Eliaquim c'ajol Hilcías k'anjab yetok cham comandante tu'. A Sebna ajtz'ib yayji yin ley, c'al Joa, c'ajol Asaf ayoc yetok. A Joa tu' yajtz'ibal yabixal cham rey. A Eliaquim tu', mayordomo yayji bay yatut cham. ⁴Axa jun comandante yet Asiria tu' max alon axca ti': —Alek bay Ezequías juntzan is k'anej cham miman reyal Asiria, tol binajbil. Chi yal cham axca ti': ¿Tzet ayoc yipok a c'ul? ⁵Chi mi ala' tol ay a jelanilal, c'al epalil yin ak'oj owal, palta toc'al chala'. ¿Mactxel chaoc yipok a c'ul, xan cheaj can a ba ayin? ⁶A chi yun wiloni tol a conob Egipto chaoc yipok a c'ul. Palta a Egipto tu', lajan wal axca junok aj pojiltakxac'al. Ta ay junok mactxel

chi oc lacan yin, palanxac'al toj yul k'ab. Caywal tu' yayji jun reyal Egipto tu' bay mactxel tol a' chi yaoc yipok c'ul. ⁷Ta che yal ayin: A Jehová co Diosal chi jaoc yipok co c'ul, quex chi, tokwal maj yak' Ezequías yowalil juntzan altar bay can ayajok bay chi oc eb anima ayilal bay jun e Diosal tu'. Max yaloni tol junxanej altar bay chi oc eb aj Judá, c'al eb aj Jerusalén yin ayilal. ⁸Bek alon axca tu'. Co watx'nej junok trato etok. Ayin ti' chekbej in cham reyal Asiria, chi je' wak'on 2,000 no chej ayach, palta tokwal chi tz'aknaj a soldado chi aj yiban no', ⁹xan tokwal ok je' a tec'ban a ba satak junok bulan eb soldado aj Asiria ti', cax chito wal a na' tol a eb aj Egipto ok je' yak'on chej, c'al carruaje yet owal ayach. ¹⁰Yetok c'apaxok, tokwal yul wet chin jayoc yin wak'on lajwok jun nación ti'. A Jehová ayoc wetok. A Cham max in chekontek yin wak'on lajwok ayok, xi cham rey, xi cham comandante tu'.

¹¹Axa tak'wi Eliaquim tu', c'al Sebna, c'al Joa bay jun comandante tu' axca ti':

—Yuj wal dios ayach, a yin arameo chach k'anjab, ayon ti' chi jabej. Palta manchak ach k'anjab ayon yin hebreo, yujtol a masanil eb anima ayajtok bay yiban muralla, lanan yaben eb masanil, xi eb.

¹²Palta max tak'wi jun comandante yet Asiria tu', max yalon axca ti':

—Mannejnak bay e yajawil, tamwal asan ayex ti' max in cheklaytek ul wala'. C'amak; palta a reyal Asiria max chekon wal bay eb anima lanan yaben bay yibanlak muralla tu', yujtol a eb tu', ok lo eb is tza', c'al yuq'uen eb is txul e yetok ayex ti', xi cham.

¹³Yuj wal tu' xan max aj lecan jun comandante tu' max aj yaw yin ipejal, max k'anjab yin hebreo:

—Chi cam wal e yaben tzet yetal chi yal cham rey mimanbil, a ton reyal Asiria: ¹⁴Manchak e yak' e ba etnelay yuj Ezequías, yujtol a jun tu' maj je' yuj ex colon elok, xi cham rey. ¹⁵Tatol chi yochej Ezequías tu' chi yak' e c'ul tol asan yin Jehová che yaoc e c'ul, cax chi yalon ayex axca ti': Wal yel a Jehová ok on colon elok, man ok cha' ayc'ay Cham jun co conob ti' yul k'ab reyal Asiria, ta xi, ¹⁶manchak e cha e yabej, yujtol a cham reyal Asiria max in chekontek, yet chi ul wal ayex tol chex oc yin junc'ulalil yetok, che yaoc e ba yul k'ab, yet watx' ok e lo' sat e yuva, c'al e loon sat e yigo, c'al e yuq'uen e yuc'bala' watx'nebil e yuj. ¹⁷Lajwi tu', cax ok ex yiontok bay junxa tx'otx' lajan wal axca e yet ti', tol chi je' ixim trigo c'al uva, yet watx' ok e watx'nej e pan c'al e vino. ¹⁸Tatol ok yal Ezequías, tol a Jehová ok ex colonok, manchak e yak' e ba etnelay yuj. Tokwal ay junok juntzan diosal juntzanxa conoblak max je' yuj colon is conob yul k'ab cham reyal Asiria. ¹⁹¿Baytal ayoc is diosal conob Hamat, c'al yet conob Arfad? ¿Baytal ayoc is diosal conob Sefarvaim? Tokwal ay junok max colon Samaria yul k'ab cham reyal Asiria. ²⁰¿Mactxel junok juntzan diosal juntzan nación tu' max je' yuj colon el is conob yul k'ab cham reyal Asiria? ¿Tzet yuj xan che na' tol a Jehová ok je' yuj colon el Jerusalén ti' yul k'ab cham? xi cham comandante tu'.

²¹Toxac'al max tz'injican el eb, c'am junok belan k'anej max paktzej eb, yujtol maxax yal cham rey Ezequías bay eb, tol c'am chi paktzej eb junok k'anej. ²²Caw wal max tacaj c'ul Eliaquim yetok Sebna, c'al yetok Joa. Max tzilontok eb tilak is pichil yuj bilc'ulal, max meltzoy eb toj yalon bay Ezequías masanil tzet yetal max yal cham is comandante eb aj Asiria tu'.

Max col-lay Judá bay eb aj Asiria

(2 R 19.1-37; 2 Cr 32.20-23)

37 ¹A wal yet max yaben cham rey Ezequías juntzan k'anej tu', max tzilontok ti' is pichil, max yaon oc el pichilej, yuj tx'oxon el is bilc'ulal, cax max toj txajlok bay templo Jehová. ²Max chektok Ezequías Eliaquim is mayordomo, yetok Sebna tz'ibom ley yayji, yetokc'al eb sacerdote ichamtak winakxa, yuj toj yil-lay cham Isaías is chekbej Dios, is c'ajol Amoz; max yaon c'apax oc eb el pichilej. ³Max yalon eb bay axca tzet max yal cham rey bay eb: A wal tinani', caw wal ayon oc yin bilc'ulal, c'al yin yailal, yetokc'al yin yaynakilal; axca wal junok ix ix chi yab yail unewal, cax chi cancan yin tol c'amxa yip. ⁴Matawal max yab Jehová co Diosal, Cham chak' serbil, juntzan k'anej max yal jun comandante chekbiltek yuj reyal Asiria, yujtol caw wal yob tzet max yal yin Cham iquisc'al. Chok wal jayoc yailal yiban yuj Jehová co Diosal, yuj tzet max yal tu'. A tinani' xin, ak' wal junok a txaj juj ayon chonto cancan ti', xi eb chekbej tu'.

⁵A yet max lajwi k'anjab eb chekbej cham rey Ezequías bay cham Isaías is chekbej Dios, ⁶max yalon cham Isaías bay eb, tol chi yal eb bay is yajawil: Axca wal ti' yalon Jehová: Manchak ach xiw bay juntzan yobal k'anej max yal is chekbej reyal Asiria tu' win. ⁷Ayin ok watok junok abix xol eb. A yuj jun tu' ok meltzoy reyal Asiria bay is conob yetok masanil is soldado. A bay tu' ok wak' mak'lay camok, xi Jehová, xi Isaías.

⁸Axa max yaben jun comandante eb aj Asiria tu', tol a cham reyal Asiria mayal el bay conob Laquis, xan max el c'apax bay Jerusalén. Max toj k'anjab bay cham reyal Asiria yet lanan yak'on cham owal yin conob Libna. ⁹A bay tu' max yabej, tol mayal tit Tirhaca aj Etiopía yetok jun miman bulan soldado yak'on owal yin. Axa max yun xin, max chekonpaxtek cham reyal Asiria is chekbej bay Ezequías, reyal Judá, yet chi toj yal axca ti': ¹⁰A a Diosal chaoc yipok a c'ul, tol a' ok ach colon el yul in k'ab. Palta manchak ak' a ba etnelay yuj. ¹¹Max ab wal tzet max yun juntzan eb reyal juntzanxa nación juj on, ayon reyal Asiria on ti', masanil max lajwican ayok. ¿Tom achto wal ok ach colchajcan elok? ¹²Tokwal max colwaj juntzan dios tu' yetok juntzan conoblak max yak' lajwok ay eb wichmam, axca Gozán, Harán, Resef, yetokc'al eb anima aj Bet-edén, a ton eb cajan bay Telasar. ¹³Naektek tzet max utlay eb reyal Hamat, Arfad, Sefarvaim, Hena c'al yet Iva, xi cham rey, xi jun chekbej tu'.

¹⁴Max chaon c'apax ec' cham rey Ezequías jun tx'an carta max yak' eb chekbej tu', max yawteni. Lajwi tu', max toj bay templo, max jenbantok

jun carta tu' satak Jehová, ¹⁵cax max txajli axca ti': ¹⁶Mamin Jehová co Diosal, Yajaw ach yin Masanil, a tu' ayajtok a trono nan xol eb querubín, asannej ach oc Dios ach bay masanil yiban tx'otx' tx'otx' ti'. Ach max a watx'nej satcan c'al sat tx'otx' ti'. ¹⁷Taynej wal ab xin Mamin, cha abej. Ila wal juntzan k'anej max tz'ibejtek Senaquerib ti' ayin. Masanil juntzan yobal k'anej ti' chi yal en, ach Dios tol iquis achc'al. ¹⁸Yel ton wal Mamin Jehová, a eb reyal Asiria tu', max yak' lajwok ay juntzan nacionlak tu', yetokc'al is tx'otx'al eb max yicanok. ¹⁹Max yak'on tz'a masanil is diosal eb, yujtol a juntzan tu', wal yel man diosok, palta te', ma ch'en watx'nebil yuj anima. Yuj tu' xan max je' yak'on lajwok. ²⁰A tinani xin, Mamin Jehová co Diosal, col on el bay yul k'ab jun tu', yet watx' masanil nacionlak chi yojtaknej elok tol asannej ach tol Dios ach, xi cham Ezequías.

²¹Max lajwi tu xin, max yalontok Isaías bay Ezequías axca ti': Axca wal ti' yalon Jehová co Diosal ayon Israel on ti': Mayal wab a txaj max al ayin yuj Senaquerib reyal Asiria, xi Cham.

²²Tix wal max yun yalon Jehová ayin yuj reyal Asiria tu':

A eb ix k'opoj aj conob Sión, c'am elapnok yul sat eb, toc'al chi tzewi eb en, ach Senaquerib. A eb aj Jerusalén, toc'al chi yak' bil eb jolom yin buchwaji, yet chach meltzoy entak.

²³¿Mactxel max a baja', c'al a buchoni? ¿Mac yin tol canxac'al max ot yul a nuk', cax tol ayxamay max ot a sat yin? A ton wal win ayin Diosal in Israel tol Asanxanej in Ocok.

²⁴Max a chek eb a chekbej yalon yobal k'anej win axca ti': Yetok wal in carruaje yet owal xiwilxa bisil ti' max in ajtok bay jolomlak witz, c'al bay yinlak c'ul witzal Líbano. Max in k'akay te c'ute' mimek tel, yetok te taj manxa watx'ilok. Max in ajtac'al apnok bay jolomlak witz yelxac'al can ay ajok, yetokc'al bay k'aktelak tol lajanxac'al yili axca junok awbejal te'.

²⁵A bay tx'ok nacional max jot eb in soldado uc'bala', max yuq'uen a' eb. Max on ec'c'al tok yulak is k'ablak a' aej bay Egipto, axca tol tannak aj a', cachi.

²⁶Tokwal man ojtakok xin, tol ayin Jehová in max in nabalnej el juntzan tzet yetal ti'. Yettaxc'al payxa max in nabalnej elok, tol caytu' ok yunej; ato wal tinani' chi yi' ba. Yuj tu' xan ach ti' chak' lajwok ay conoblak tol watx' yayji oc is murallail, toxac'al chi aj can bulan is pojilal oj.

²⁷A masanil eb cajiyo bay tu', c'amxa yipalil eb, toxac'al max xiwcan aj eb, c'al q'uixwi can aj eb. Lajanxac'al max yuncan eb axca an ac'un, c'al an yax ac'un, axca an ac'un chi ch'ibaj bay yibanlak na, tol chi takaj an yuj cak'ek' chi tit bay yichcan.

²⁸Wojtakc'al bay chach eq'ui, c'al tzet chonej. Wojtak wali tol max tit owal win.

²⁹ Yujtol wojtak yowal a c'ul, c'al a ch'aanil, xan axca tol ok waoc junok ch'en argolla yin a txam, c'al junok freno yin a ti', cax ok ach wak'on meltzoy bay yul be bay max ca a tita, xi Cham, xi Isaías.

³⁰ Lajwi tu xin, max yalon Isaías bay Ezequías axca ti':

A yet jun abil ti', c'al yet junxa abil ok e lo' ixim trigo tol toc'al ok yalne aj ba, axa yet is yox abil xin, okxa je' e yawon e yet. Axa e wajon sat e yawoj tu'; ok e yaw an uva, cax ok e loon sat an. A jun ti' tx'oxbanilej yayji, tol

³¹ a eb okto wal iquisbokcan bay Judá ti', lajan wal ok yun eb axca junok awoj chi toj xe', tol ayman chi yun satni elok.

³² Yujtol a eb okto cancan bay Jerusalén, a ton eb okto colchajcan el bay tzalan Sión, ok ak'on pax nojil yul nación ti'. Axca ton wal tu' ok yun yuj is miman camc'ulal Jehová, Cham Yajaw yin Masanil.

³³ A pax yin reyal Asiria xin, caywal ti' max yun yalon Jehová:

Man ok oc bay Jerusalén ti', tamwal ok jul wal el junok is julbal.

Man ok yak' owal yin, tamwal ok watx'nej aj is walub bay yinlak murallail conob ti'.

³⁴ Ac'ala' bay yul be bay max ca tita, ac'ala' tu' ok meltzoy paxok. Man ok oc bay jun conob ti'.

³⁵ Ayin ok in taynej jun conob ti' cax ok in colon elok, yujc'al in mimanbilal, c'al yuj in camc'ulal yin in chekbej David, xi Cham, xi Isaías.

³⁶ Axa cham yángel Jehová max toj mak'on cam 185,000 soldado bay campamento eb aj Asiria. Axa yet max k'inibi aj yet junxa c'ual, mayal cam masanil eb soldado tu'. ³⁷ Yuj tu xin, a Senaquerib reyal Asiria, max yuchaj is campamento, max meltzotok bay conob Nínive, max cancan bay tu'. ³⁸ Axa yet jun c'ual xin, max toj txajlok bay templo is diosal chi yik Nisroc, axa Adramelec c'al Sarezer, a ton eb is c'ajol, max toj eb mak'on cam cham bay tu'. Lajwi tu' max elaj eb, max tojcan eb yul yet Ararat. Axa Esarhadón is c'ajol Senaquerib tu', max occan yin reyal is q'uexelok.

Max jay c'ul cham Ezequías

(2 R 20.1-11; 2 Cr 32.24-26)

38 ¹ A yet jun tiempoal tu', caw wal ow max yun yabi ay Ezequías. Axa cham chekbej Dios chi yik Isaías, c'ajol Amoz, a max bet ilonok, max yalon bay axca ti':

—Caywal ti' yalon Jehová: Alxac'al canok, tzet ok yun cancan ekbej c'al yetok masanil tzet yetal ay ayach, yujtol ok ach camxac'al, cax manxa ok jay a c'ul, xi Jehová, xi Isaías.

² Axa Ezequías xin, max meltzoy octok acan bay yich is tx'at, max txajli bay Jehová axca ti':

³Chin tewi ayach Mamin, natek tzet max yun ach wak'on serbil wal yin masanil in c'ul, max wunc'al tzet yetal max cha a c'ul, xi. Cax max jichchaj c'ul yok'i.

⁴Axa yalon Jehová bay cham Isaías tu' ⁵tol chi toj yal bay Ezequías junelxa axca ti': A Jehová Cham is Diosal echmam David chi yal axca ti': Mayal wab a txaj, mayal wil c'apaxok, tol chach ok'i, yuj tu' xan ok wak' junokxa olajoneb abil a k'inal. ⁶Ok ach in col yetok conob Jerusalén ti' yul k'ab reyal Asiria. Ayin wal ok in colc'al jun conob ti', xi Jehová, cachi.

⁷Max tak'wi cham Isaías axca ti':

—A ton jun yechelej ok tx'ox Jehová ti', tol yel ok yun tzet max yala':

⁸A yin is reloj Acaz ok yak' meltzoz Jehová lajonebok makan yenel c'u tol mayal ec'ayok, xi Isaías.

Yuj tu' xan max meltzoz lajonebok makan yenel yakan c'u mayal ec'ay tu'.

⁹A yet mayal jay c'ul cham Ezequías reyal Judá, max watx'nej cham jun bit ti'.

¹⁰Ayin ti' max in na' tol yin in tec'anil chin cami. Maxax al-lay ayin tol chin toj bay yul makbej camich, c'amxa chin na tol okto tz'aknaj wabilal.

¹¹Max in na' tol majxac'al wil en Mamin Jehová bay yulyibank'inal ti'; manxa ok wil c'apax yin junok mactxel cajan bay yulyibank'inal ti' waloni.

¹²A wiquisal t'inan chi lajwi ayok axcac'al yuchlay ay mantiado yet eb ilom calnel, ma axcac'al chi yun lot'lay el an tx'al yet chi lajwi chemlayi. Chi wabc'al yail oj yet chi ec' c'u, c'al yet chi ec' ak'bal.

¹³Caw wal chi el waw chi ec' ak'bal, axcac'al tol lanan c'uxon poj no coj in bakil. Caw wal chi wabc'al yail oj chi ec' c'u, c'al yet chi ec' ak'bal.

¹⁴C'ojanc'ulalxac'al yel waw axca no q'uisom satcan, chin k'akwi axca no paloma. Caw wal chi c'unbixac'al in sat waj t'anan bay satcan. Mamin, caw wal ok'bal in c'ul chi wabej, tak'wan ayin, quin chi.

¹⁵Axa tinani' xin, ¿tzetto wal ok wut walon yuj diosal? Max yun wal bay max ak' a ti'. Yinxac'al yaynakilal ok yun wec' tinani' yet mayal ec'tok jun in yailal ti'.

¹⁶Mamin Wajawil, chi je' yiquisbi ec' eb anima yuj tzet chonej, a wanimail chi iquisbi ec' oj.

Ach max ak' in cawil, c'al ak'on meltzoz wiquisal.

¹⁷Ilabi max jayoc jun yailal ti' wiban yuj in watx'ilok. Max el yin a c'ul tol max in a colcan el bay c'aybanilal, yujtol max tojcan in yobtakilal c'ayc'ulal oj, axca tol max a k'okcantok entak.

¹⁸A mactxel ayxa ec' bay mukbanil camnak, c'amxa chi je' yalon watx' k'anej ayach. A eb camnak tu', c'amxa chi je' ach yion aj can. A mactxel mayal aytok bay yul olan, c'amxa chi yaoc eb alben yipok is c'ul.

¹⁹ Asan mactxel iquis chi je' yalon watx' k'anej ayach, axca wal chi yun walon ayach ti' tinani'. A eb mamej txutxex, chi yal eb bay yuninal tol a tzet chala', a ton chonej.

²⁰ A Jehová ayic' wetok yuj in is coloni, xan ok co txalek co arpa, cax chon bitniek bay is templo yak'ban iquis on ec'ok, xi cham Ezequías.

²¹ Max chek cham Isaías watx'nelay jabok te higo, cax max alay oc yin sat bay ayoc jun yailal tu' yin cham rey. Caytu' max yun jay c'ul cham.

²² Lajwi tu' max k'anej Ezequías bay cham Isaías:

—¿Tzet wal ok yun nachaj el wuj xin, tatol ok je' in toj junelxa bay templo Jehová? xi.

Max jay eb chekbej aj Babilonia

(2 R 20.12-19; 2 Cr 32.27-31)

39 ¹A yet jun tiempoal tu', a Merodac-baladán, reyal Babilonia, is c'ajol Baladán, max yab yal-layi, toláb max yabi ay Ezequías; palta mayal pax jay c'ul, xan max chektek juntzan eb is chekbej ul yak'on junok carta yetok sabalej bay. ²Caw wal max tzaloj aj Ezequías yuj max jayoc eb. Max tx'oxon masanil is beyomal bay eb, axca ch'en plata yetokc'al ch'en oro, perfume, c'al aceite caw wal watx', yetokc'al bay wajan masanil mitx'k'abej yet owal, yetokc'al masanil tzet yetal ay bay is c'uanbal. C'amxa jabok tzet yetal ay bay is despacho, c'al masanil tzet yetal ay bay yul is makbej tol maj tx'ox bay eb. ³Lajwi tu xin, max toj cham Isaías chekbej Dios yilon cham rey Ezequías, max k'anlen bay axca ti':

—¿Baytal max titoc juntzan winak tu'? ¿Tzet max ul yal eb ayach? xi bay.

Max tak'wi cham Ezequías, max yalon axca ti':

—Max tit eb bay jun conob caw wal najat, a ton bay Babilonia, xi bay.

⁴Max tak'wi cham Isaías bay:

—¿Tzet yetal max yil eb bay yul a despacho ti'? xi.

Max yalon Ezequías:

—Max yil eb masanil tzet yetal ay yul, c'amxa junok tzet yetal wajan ec' ti' tol maj in tx'ox bay eb, xi.

⁵Max yalon cham Isaías bay cham rey Ezequías axca ti':

—Ab wal tzet yetal chi yal Jehová Cham Yajaw yin Masanil: ⁶Ok apnok c'ual, tol a masanil tzet yetal wajan ec' bay a despacho ti', yetokc'al masanil tzet yetal max wajbajcan eb echmam, masantac'al yet jun c'u ti', ok ilaytok bay Babilonia, cax c'amxa tzet ok canok. ⁷Toltax eb enatil, ok ilaytok eb bay Babilonia tu', ok ilay el yetbeyom is winakil eb, cax ok oc eb yak'omalok serbil cham rey bay yatut, xi bay.

⁸Max naon Ezequías: Ti wal a yul tiempoal iquis in ec' ti' ay junc'ulal, c'amc'al tzet chin oni, xi, xan max tak'wi bay cham Isaías:

—A jun k'anej max chek Jehová al ayin ti', watx'c'al wal yayji ocok, xi.

Chi mimanc'ulnelay Jerusalén

40

¹ Chi yal co Diosal axca ti: Mimanc'ulnejek in conob.

² Watx' che yut k'anjab e ba bay Jerusalén, che yalon bay, tol majxa oc eb mosejal, mayal tojchaj el is yob unben eb, tol mayal cha' eb is yailal ayin yin is mojalil, yuj masanil is yobtakil, xi Jehová, quex chi.

³ Ay jun mac chi awji chi yaloni: Watx'nejek junok is be Jehová bay tz'inan tx'otx', t'inek junok be bay co Diosal, junok be t'inan bay takin tx'otx'.

⁴ Ak'ek noj masanil jobelak; ak'ek pananbok masanil witzlak, c'al tztalanlak. Ak'ek watx'jok jun tx'otx' tol caw wal witzlak c'al jobquiltak, pananxac'al, cax jichanxac'al che yutcanok.

⁵ Catatu' bian ok tx'oxon Jehová is mimanbilal. Masanil eb anima ok yil eb yin. A caw Jehová max aloni, xi jun mac chi awji tu'.

⁶ Awjan, xi jun mac max awji. Axa in k'anlen tu': ¿Tzet k'anejal ok wal yin jun aw tu'? quin chi. Max tak'wi: Alilok tol masanil anima, lajan eb axca an ac'un. Ayman chi etax el is watx'ilal eb axca wal chi yun yetax el an xumac bay xolak ac'un.

⁷ A an ac'un chi takcan el an, axa is xumaquil an chi pukilok yet chi eq'uel is cak'ek'al Jehová xol an. Yel wali, axca ton tu' eb anima.

⁸ A an ac'un, chi ton takcan el an, cax chi pukay is xumaquil an; palta axa pax wal k'anej co Diosal xin, ayc'al ec' yin tojbalk'inal, cachi, xi.

⁹ Ex aj Sión, ajanektok tac'al jolom junok witz. Yin wal ipejal chex awji, yet watx' ok e yal junok watx' abix. Ex aj Jerusalén, manchak ex xiwi. Alek bay conoblak yet Judá: Ilab co Diosal lanan jayocok, quex chi.

¹⁰ Lanan jayoc Jehová Cham Jajawil yetok is yipalil. Yuj yipalil is k'ab xan chi yiay ba masanil bay, ibil oc yuj tzet max yi' q'uexelok is mulnajil.

¹¹ Axca wal ilom calnel chi yun jayi, chi chelon aj no yune' calnel, cax chi taynej no txutxey tolto max jay yune'.

C'am mac axca Diosal Israel

¹² ¿Mactxel mayal echen a' mar yetok yul is k'ab, c'al yechen satcan yin k'uchubneni? ¿Mactxel mayal yechej is pokokal tx'otx' tx'otx' yul junok echbalej? ¿Mactxel mayal yechej yalil masanil witzlak c'al tztalanlak yulyibank'inal?

¹³ ¿Mac junok maxax ak'on cuenta Yespíritu Jehová, ma xin, mayal cuylay yuj?

- 14 ¿Mac junok max ak'on is c'ul Cham, ma xin, max yak' jay is nabal?
¿Mactxel junok max cuyon yin nabalej c'al jelanil?
- 15 A yul sat Jehová, a mimek conoblak, lajan eb yetok junok t'ujan aej,
axca wal jabok pokok yul libra. A mimek conob bay sataktok a'
mar, lajan eb axca c'ajch'en.
- 16 Man k'okbilok masanil no no' bay Líbano yet chi oc xajanbalil bay Jehová.
Man k'okbilok masanil teal Líbano tu', yoc sialok yet xajanbal tu'.
- 17 Masanil mimek conob yulyibank'inal, tokwal ay yelapnok eb yul sat
Cham, c'am wal jabok yopiso eb.
- 18 ¿Mac yetok ok e lajbaj Dios tu'? ¿Tzet yechelej tol lajan yetok?
- 19 A jun watx'nem yechelej, chi watx'nej jun yechelej yul molde, axa
jun watx'nem ch'en chi bonon yetok oro, cax chi watx'nen plata
cadena is yuok.
- 20 A mac c'am chi tzakay is tumin, a te te' caw k'a'i, a' chi saya', cax
chi sayon junok josom te' tol jelan, yet chi watx'nej jun yechelej
tu', chi waban ajok, yet watx' c'am chi ayc'ayi.
- 21 ¿Tom man e yojtakok ayex ti'? ¿Tom c'am mac max alon e yab
yettaxc'al yichbanil? ¿Tom c'am chi nachaj el e yuj mac max esnen
aj yulyibank'inal?
- 22 ¿Mantok tol a Dios ay is trono yibantok yaxil satcan? A satcan tu'
nojan ay yiban jun tx'otx' ti'. Cax chi yilontok Cham eb anima,
axca no tzac' yili eb. A Cham chi jenbantok satcan tu' axca junok
k'apej, cax chi watx'nen axca junok mantiado chi oc cajlobalil.
- 23 A Cham chi q'uexontok eb mimek winak yin tol c'am yelapnok, cax
chi c'aycan aj eb yajaw sat tx'otx' ti' yuj.
- 24 Lajan eb yajaw tu' axca an unin ac'un tolto chi awlayi, tol c'amto is
xe' chi toj yul tx'otx'; ta wal chi xutok Dios is cak'ek' yin, chi takcan
ajok, cax chi ilaytok yuj caxxuchum axca yilaytok matz'il trigo.
- 25 A Cham Dios Asanxanej Ocok chi k'anleni: ¿Mac wal yetok ok in e
lajbaj tinani'? ¿Mactxel lajan wetok? ¿xi Cham.
- 26 Ajanektek t'anan satcan ti': ¿Mactxel max esnen aj masanil juntzan
ti'? ¿xi Cham. A Jehová max watx'neni, a' chi ion eltek, cax chi
bison waycan tu', cax yin is bi junjun chi yawten eltek. Yujtol
miman yayji oc is yipalil Cham, c'am junok chi c'ayaj yul k'ab.
- 27 Ex Israel, is conobal Jacob, ¿tzet wal yuj xan chex alxi? ¿Tzet wal yuj
xan che yala': A Jehová c'am chi yiltek co cawxinakil, tokwal chi
oc il con yiloni? quex chi.
- 28 Tokwal tol man e yojtakok. Tokwal tol c'am che yabej tol a Jehová,
Cham Dios yin tojbalk'inal, Cham Yesnemal aj yulyibank'inal ti', c'am
is lajub, c'am chi el yip, tamwal chi c'unbi. C'am yalbanil is bak'satilal.

- ²⁹ A Cham chi ak'on yip mac c'unbinak, chi yac'al oc yip mac c'un jabinak.
³⁰ Toltax eb ach'ej chi c'unbi c'apax aj eb, chi buyay el eb, c'al eb tol
 xiwil yip, chi telc'oj eb.
³¹ Axa pax eb asan Jehová chi yaoc yipok c'ul, chic'al yi eb yip. Ok je'
 bey eb axca no águila, ok yak'on eb yanej, c'am chi el yip eb, man
 ok buyay el eb yuj beyil.

Chi yak' Dios is ti' tol ok col Israel

- 41** ¹ Chi yal Dios axca ti': Abek xin, tz'in quex chi in satak, ex conob
 bay sataktok a' mar; tec'bajek e ba ex mimek conob. Titanek, tol
 ok jaltek jun k'anej ti':
² ¿Mactxel Cham ok ak'on txecloj bay yichcan jun rey tol ok yak'c'al
 ayc'ay owal? ¿Mactxel ok ak'on mimek conob yul is k'ab jun rey Ciro
 tu', cax ok yaon ay ba eb rey bay? A yetok is yespada, c'al is julbal
 Ciro ok coc'axtok eb, cax ok tiñontok eb xol cak'ek' axca matz'il trigo.
³ Ok elaj eb rey is satak, palta a Ciro tu xin, yinc'al masanc'ulalil ok
 yunc'al bey toji, yuj yayc'ay conoblak yuj. A yet ok beyc'al toj tu',
 axca tol man ok ay yakan sat tx'otx'.
⁴ ¿Mactxel max ak'on yun juntzan ti'? ¿Mactxel max nabalnen el
 masanil tzet ok uj yintax yichbanil? Ayin Jehová in chi wak' yun
 jun ti'. Asan in Dios in yet yichbanil, masantac'al lajub.
⁵ Ok yil eb mimek conob bay sataktok a' mar, cax ok xiwcán aj c'ul eb. Ok
 bilaj eb conob cajan tilak tx'otx' tx'otx', cax ok wajbantek ba eb, xi Cham.
⁶ Junjun watx'nem yechel comon dios chi yikbaj yet mulnajwomal.
⁷ A nak josom te' chi ikban nak bonom yechelej yetok oro, a nak watx'
 chi yut yaon oc oro yin yechelej tu', a chi iptzen nak mak'om oc
 lawuŕ, cax chi yaloni, tol watx' co soldadura, xi. Cax ayman chi
 oc lawuŕal yechelej tu', yet watx' c'am chi ayc'ayi.
⁸ Chi yal Jehová axca ti': Ayex israel ex ti', abxalwanek. Ex conobal
 Jacob, in chekbej ex toni, ayex ton max ex in siq'uilok, conob tol
 yinatil ex wamigo Abraham.
⁹ Ayin ton max ex witek bay tilak el tx'otx', bay najat elok. Max walon
 ayex, tol in chekbej ex. Ayin max ex in siq'uilok cax c'am bay chex
 wintaknej elok.
¹⁰ C'amc'al chex xiwi, ayin ec' e yetok. Manchak ex oc il, ayin ton e
 Diosal in. Ayin chi wak' e yip, ayin chex in colo'. Ayin chex wila',
 chex in mitx'waayok yetok wipalil chin k'anbalnej yin tojolal.
¹¹ A masanil mactxel tol c'am chex ocheni, ok cancan eb yin
 q'uixawc'ulalil, c'al yin yaynakilal. A eb chi ak'on owal e yetok,
 ok c'aycan el eb.

- 12 Ok e say eb ajc'ul oc e yin, cax man ok chaloj eb e yuj, a eb chi yak' owal e yetok, ok yuncan el eb axca tol c'amc'alta' eb.
- 13 Yujtol ayin ti', ayin ton Jehová e Diosal in. Ayin max ex in quetz beyok. Ayin ton max wal ayex: Manchak ex xiwi, ok ex in colo', quin chi, xi Cham.
- 14 Chi yal Jehová: Ex israel, conobal Jacob, caxc'al txennej e bisil, cax c'amto e yip, palta manchak ex xiwi. Ok in oc e yetok. Ayin ton e Diosal in tol Asanxanej in Ocok, e Colomal in.
- 15 Ayex ok ex waoc axca junok mak'bal trigo tol ac', watx' ye. Ok e mak' poj mimek witzlak, coc' ok e yutcantok yin pokokal. A nacionlak ok e yutcantok axca c'ajil yakan trigo.
- 16 Ok e tixcantok xol cak'ek', axa cak'ek' ok iontok. A caxxuchum ok saklemnencantok. Catawal tu' bian, ok tzaloj aj e c'ul win, ayin Jehová in ti'. Ok e maynej e ba wuj, e Diosal in, tol Asanxanej in Ocok.
- 17 A eb anima meba' cax c'am tzet ay, chi say eb aej, c'am chi chaloj yuj eb. Lanan cam eb yuj takintial. Axa in ayin Jehová in ti', ok wiltek eb, man ok in bekcan eb, ayin e Diosal in ayex israel ex ti'.
- 18 Ok wak' ajol mimek aej bay witzlak yet takin tx'otx'lak, c'al coc'lak nuk' aej bay nanlak ac'al. A takin tx'otx' tu' ok wutcantok yin chic'a'lakil. Axa bay takin tx'otx' tu' ok ajol mimek aej.
- 19 A bay tz'inan tx'otx' tu' ok waw te c'ute', c'al te acacia, c'al te arrayán, c'al te olivo. A bay takin tx'otx' tu' ok wak' ch'ib te k'uk'taj, te taj, c'al te q'uisis,
- 20 yet watx' chi yil masanil anima, cax chi nachaj el yuj eb, tol ayin ton Jehová in max in watx'nej juntzan ti' yetok wipalil; tol ayin e Diosal in, tol Asanxanej in Ocok, max wak' yi ba juntzan ti', xi Cham.

C'am tzet chi je' yuj juntzan yechelej

- 21 A Jehová, Cham reyail eb yinatil Jacob, chi aloni: Sebaxek ex yechelej, tx'oxek e nabal, titanek cax che tx'oxon e colwal.
- 22 Sebaxek, ul alek ayon, tzet ok uj yet yajtok tu', cax ok jaben e k'anej tu'. Cax che yalon c'apax jabej yuj tzet max uj yet yalantok, ok ton co cha jab xin, yet watx' ok jil tzet ok yun yelapnok. Alek jabix yuj tzet ok uj yet bak'in.
- 23 Ta yel wali dios ton ex, alek ayon tzet yetal ok uj yet yajtok tu'; unek tzet yetal chi je' e yuj xin, unek watx'il c'al yobal, yet watx' chi xiwcán aj co c'ul, yujtol ay e may.
- 24 A wal ayex ti', caw wal c'am e yelapnok, tok ay tzet chi je' e yuj. Moj chi intaknelay el mac chi yiay ba ayex.
- 25 Ok wak' txecloj jun anima bay chi ajol c'u, tol ok yal ba ayin, cax ok jay bay norte ti'. A ok tec'on ay eb yajaw conob, axca tec'lay tz'otz'ew, axca tec'on nak tz'aklom is tz'akbejal tx'otx'.

- 26 ¿Mactxel max alon el yabixal jun ti' tax yet yichbanil, yet watx' chi jab yabixal on? ¿Mactxel max alon yin ayoktoc'al yet payxa tu', yet watx' chi jala' tol yel chi yala'? Tokwal ay junok ex yechelej ex ti' max e yal tzet ok uj yet yajtok tu', tokwal ay anima max aben e yaloni.
- 27 Yettax yichbanil, ayin max wal jun abix ti' bay Sión, chi cam e yaben tzet max wal tu'. Ayin ton chin chektok jun in chekbej bay Jerusalén yin yalon el watx' abix.
- 28 Chin makwaji, tokwal ay junok comon dios chi jayi, tamwal ay junok chi je' yuj yak'on jabok co nabal, tamwal ay junok chi je' yuj tak'wi bay in k'anlebal ti'.
- 29 C'am junok ay yelapnok, tokwal ay tzet chi je' yuj watx'neni, xan nabac'al juntzan yechelej tu', xi Cham.

A chekbej Jehová

42 ¹ Chi yal Jehová: Tix jun in chekbej ti', a ton jun ti' chi wiaj can, ayin max in siq'uiloc, ay ton wal in tzalojc'ulal yin. Maxax wacan oc Wespíritu yin, yet watx' chi beyc'ulnej masanil mimek conoblak yin tojolal.

² Man ok aj yaw k'anjabi, man ok ablay yel yaw yulak calle.

³ Ay eb caw ok'bal c'ul, axca wal te pojil aj, ma axca an mecha yet tzeztebal toxa chi tani, caytu' eb. Palta a ton ok colon el eb, man ok yak' low yin eb, tutun ok yak' tojolal yin yel.

⁴ Man ok xewok, tamwal ok cabax aj c'ul, masantac'al chi beybalnelay tojolal bay sat tx'otx' ti'. A conoblak bay sataktok a' mar, ok taynej yab eb cuybanilej ok yak'a', xi Cham.

⁵ A Jehová Dios max esnen aj satcan cax max jenbantok. A' max watx'nen tx'otx' tx'otx', c'al masanil tzet yetal chi ch'ib yiban. A' chi ak'on cawil eb c'al is cak'ek' eb. A' chi alon bay is chekbej axca ti':

⁶ Ayin Jehová in ti', max ach wawtej, cax max waon oc ep yet watx' chak' yun tojolal bay sat tx'otx' tx'otx'. Ach ok ach wak'balnej yet ok wak'on in lajti' yetok eb anima, cax chach occan yin sakk'inalil bay eb tx'ok conobal.

⁷ Chi yochej in c'ul cha jak sat eb c'am chi ilwi, cax cha jakon eltek eb aj preso yulak cuartolak bay c'am sakk'inal.

⁸ Ayin ton Jehová in, a ton in bi ti', man ok in cha' al-lay watx' k'anej bay junokxa yuj tzet max wunej, man ok in cha' ilay aj can yechelej tu' in q'uexelok.

⁹ Ilek wali, masanil tzet max wal yet yalantok maxc'al yunej. Axa tinani', ay juntzanxa c'amto chi wala' ok wal ayex. Yin ayoktoc'al chi walon ayex yak'ban c'amto chi yunej, xi Cham.

Bit yet aloj watx' k'anej bay Dios

- 10 Bitnejek junok ae' bit bay Jehová; mac ex najat ayex, alek e watx' k'anej bay, ma wal ayex chex ec' yiban a' mar, c'al no no' cajan bay tu', c'al conoblak cajan bay sataktok a' mar tu'.
- 11 Tzalojokab eb conoblak cajan bay tz'inan tx'otx', c'al eb cajan bay campamentolak Cedar. Eb aj conob Sela, bitnokokab eb yin tzalojc'ulal. Yiokab aj can eb is nuk' bay jolomlak witz.
- 12 Yalokab eb conoblak tilak a' mar watx' k'anej bay Jehová.
- 13 A Cham ok yak' yip axca junok ak'om owal, ok aj yaw yak'on owal, axca junok soldado, axa yayc'ay eb ajc'ul tu' yuj.
- 14 A Jehová chi aloni: Najatil max quin tz'inayi, max quin numayi, max quin oc c'aanok. Axa wal tinani xin, ok el waw axca ix ix lanan yalji yune', chi k'akwi, cax chi jay c'ul.
- 15 Ok wuchcan ay witzlak c'al tzalanlak, cax ok wak'on tak masanil te te', cax ok wak' tancan el a' mimek aej; axca tz'inan tx'otx' ok yuncanok, ok wak' tancan aj a' najablak.
- 16 A eb c'am chi ilwi, ok witok eb bay juntzan be tol man yojtakok eb. A k'ekk'inal, ok wutcantok yin sakk'inal satak eb. Axa bay k'equiltak, pananxa ok wutcantok yin pananlak. A ton juntzan ti' yowalil ok wak' yunej.
- 17 Yin q'uixwilal ok tokcan eb chi yaoc yechelej yipok c'ul, c'al eb chi alon bay mentes: Co diosal ex, xi eb.

A eb israel c'am chi cha yabej

- 18 Ex c'am che yabej, abxalwanek, c'al ex c'am chex ilwi, ilwanek tinani'.
- 19 Tok ay mactxel junelnej c'am chi ilwi axca in chekbej sic'bil el wuj, tok ay mactxel junelnej tol chacan axca yalomal el in k'anej chekbil wuj.
- 20 Ex israel, caw ayc'al tzet che yila', palta c'am che camc'ulnej e yiloni; chi je' e yabeni, palta c'am che cha e yabej, xi Jehová.
- 21 Max yochej c'ul Jehová max colwaji, xan max yak' cuybanilej caw wal watx' bay is conob.
- 22 Palta a jun conob ti' chi elk'anelaytok is tzetak yetal yuj eb ajc'ul, chi ilaytok eb preso, chi makchelay octok eb yul calaboso, chi ayc'ay eb, cax c'amxa mac chi colon el eb. Chi elk'anelaytok eb, c'amxa mac chi ion ec' eb bay eb elk'om tu'.
- 23 ¿Palta mac ex wal txel bekan e c'ul e chaon e yab tzet ok wal ti'?
¿Mac ex wal txel bekan e c'ul e chaon e yab tzet ok ujok?
- 24 ¿Mactxel max bekon Israel is yinatil Jacob, yet chi ilaytok is tzet yetal? ¿Man mi tok tol a Jehová xin? Yujtol a eb max oc mul bay

Cham. Maj yal c'ul eb max tzakloj yintak is beybal Cham tol tx'oxbilcanok, tamwal max yikej eb cuybanilej max yal Cham.
 25 Yuj wal tu xin, xan max tit yowal Cham, cax max yaon oc yailal yiban eb. Owat max oqui axca wal yaj chulnaj xak junok k'ak'ej, axca tu' max yun yin eb, palta tamwal yuj tu' max na ba c'ul eb jabok.

Asan Jehová Colwajwom

- 43** ¹ Axa tinani' ex conob Israel, yinatil ex Jacob, abek wali. A Jehová, Cham max ex ak'on pitzc'ojok chi yal axca ti': Manchak ex xiwi, ayin max ex in colo', wet ex, ayin max ex wawtej yin wak'on binaj e bi.
² Ta chex eq'uel yul a', ayin ec' e yetok bay tu'. Ta ok e k'axponej mimek aej, man ok ex jik'bok. Ta ok ex eq'uel xol k'ak'ej, man ok ex tz'atok yuj k'ak'.
³ Tol ayin Jehová in, e Colomal wayji, ayin ton Cham e Diosal tol Asanxanej in Ocoq, ayin ok wak'balnej Egipto, Etiopía c'al Sabá e manbanilok.
⁴ Ok wak' conoblak yin tz'akanil e q'uexelok, yet watx' chex colchajcanok, yujtol chex wochej, miman e yelapnok yul in sat.
⁵ Manchak ex xiwi, ayin ec' e yetok, ok in wajbaj aj eb e yet conob bay chi ajol c'u, c'al bay chi tojcan c'u, ok wak' meltzojtek eb.
⁶ A bay conoblak bay norte ok wala': Bekek meltzojtek eb. Axa bay conoblak bay sur ok wala': Manchakxa cancan eb e yetok. Iektek eb in c'ajol, c'al eb in cutz'in ayic' bay najat tu', bay lajub yulyibank'inal,
⁷ yujtol ayoc in bi yin eb. Ayin max in pitzc'onej aj eb, cax max in watx'nej eb yuj wilay aj can yuj eb, quin chi.
⁸ Iektek in conob cayti', tol ay is sat eb, palta c'am chi ilwi eb, ay txiquin eb, palta c'am chi yab eb.
⁹ E masanil ex conob, wajbajek oc e ba; ex nacionlak, sebaxek c'apax cayti'. ¿Mactet e diosal ayex nacionlak ex ti' chi je' yalon yin ayokto tzet ok ujok? ¿Mac junok juntzan tu' max alon yet yalantok tzet yetal lanan yuj tinani'? Yiokabtek is testigo tatol yel, yet watx' chi yal juntzanxa nación tol axca ton tu', xi Cham.
¹⁰ A Jehová chi aloni: Ayex israel ex ti', in testigo ex, in chekbej ex, sic'bil ex el wuj, yet watx' chin e yojtaknej elok, cax chin e yaon oc yin e c'ul, cax chi nachaj el e yuj tol asannej in Dios in. C'am junokxa dios max ec'lej yet yalantok, tamwal junokxa ok pitzc'oj aj yet yajtok tu'.
¹¹ Asan in Jehová in, tokwal ayto mactxel chi je' colwaji, xi Cham.
¹² A Jehová chi aloni: Ayin ton max walilok tol ok ex in colo', cax mayal yunej. Ayin caw max wal yet yalantok, manak junok comon dios tx'ok yeli max aloni. In testigo e yayji ayex ti'.

- 13 Toc'alta' Dios in ayin ti'. C'am mactxel chi je' colon el ba yul in k'ab, c'am mactxel chi je' tenon el in nabal yin tzet chin watx'nej, xi Cham.
- 14 A Jehová Cham co Diosal ayon Israel on ti', Cham Asanxanej Ocok, Cham chon ak'on bekchajok, a chi alon axca ti': A ok ex wut in colon el ayex ti', tol ok watok anima bay Babilonia, cax ok wak'on yunej tol ok elaj eb caldeo, ok tokcan eb yul barco. A juntzan barco tu' ayoc is tzalojc'ulalok eb yet payxa.
- 15 Ex israel, ayin Jehová in max ex in pitzc'onej ajok. E Diosal in, tol Asanxanej in Ocok; e Rey al in c'apaxok, xi Cham.
- 16 A Jehová max watx'nén jun be yul a' mar, a ton jun be max eq'uel nan xol a'.
- 17 Max yak' eltek jun miman bulan eb soldado ibil oc carruaje c'al chej yuj eb, palta maxc'al ayc'ay eb masanil yuj. Max ayc'ay eb masanil, majxa je' yaj wan eb. Max tanxac'al el eb axca tan k'ak'al an mecha.
- 18 A tinani' chi yal Cham bay is conob axca ti': C'amxa che na' tzet mayal ec'tok, c'amxa che na' yuj tzet max uj yet yalantok.
- 19 Palta ilek tzet yetal ok wunej, tol lananxa yuneni. Ilek wali, txequelxa. Ay wal jun be ok in jak bay takin tx'otx', cax ok ajol mimek aejlak bay takin tx'otx'c'alta'a.
- 20 Ok in ilay aj can yuj no xolakilteal no', no mimek ok, c'al no avestruz, yujtol ok wak' pitzc'oj aj a' aej bay takin tx'otx'. Mimek aej ok el yakan bay takinc'alta'a, yet ok e yuc'a' ex in conob tol sic'bil ex el wuj,
- 21 watx'nebil ex wuj, yuj e yalon watx' k'anej win.
- 22 Palta ayex israel, yinatil Jacob ex ti', majxac'al in e yawtej e yetok, a ti' e yet, tol max in ispay el e yuj.
- 23 Majxac'al e yak' tz'a no calnel yin xajanbalil ayin, tamwal ayto welapnok yul e sat yetok e xajanbal tu'. Maj in k'anc'al ofrenda ayex, maj c'apax in tewokc'al oc ayex, yin in k'anon incienso.
- 24 Tokwal max e man te te' sumumi yoc jabil yin e yak'on tz'a ayin, tokwal che yak' tzalojbok in c'ul yetok sumumial seboal no no' chi ak'lay yin xajanbalil. A ti' e yet, tol asanc'al mulej che yunej; mayal ispay el wuj, xiwil chin e tx'em yuj jantakxa e yobtakil che yaocok.
- 25 Axa ayin ti xin, yuj wal in mimanbilal, xan chin joc'ay e yobtakil cax c'amxac'al bak'in ok in natek e yobtakil tu'.
- 26 Ta ay wal tzet chi je' e yalon win xin, ocok on yin beyc'ulal tinani', alekto waltek, tzetbil e yayji oc tu', cax ok jiloni ta yel c'am e yobtakil.
- 27 A eb e yichmam max oc is yobtakil eb yettax yichbanil, axa eb e mextol max caktzaj oc eb win.

28 Yuj wal tu xin, xan ayin ok wak' q'uixwan eb yajawilal e templo ex conob Israel, ex yinatil Jacob, cax ok ex in bekoncanok, yet watx' chex c'aylay elok, c'al e yetaxi, xi Cham.

Asan Jehová Dios

- 44** ¹ Axca ti' yalon Jehová: Abxalwanek ayin ex conob Israel, ex yinatil Jacob, ex in chekbej tol sic'bil ex el wuj.
- ² Ayin Jehová in ti' max ex in pitzc'onej ajok. Ayin max ex in watx'nej yet c'amto chex alji, ayin chin colwaji. Manchak ex xiw Jesurún, ex yinatil Jacob tol in chekbej ex, cax sic'bil ex el wuj.
- ³ Tol ayin ok wak' el yakan aej bay takin tx'otx', tol ok bey wal nuk' a' bay tu'. Ayin ok wak' Wespíritu bay eb e yinatil, cax ok wak'on in watx'c'ulal yiban eb.
- ⁴ Axca wal ch'ib an ac'un tol ayoc yal, axca tu' ok yun ch'ib eb, axca ch'ib te bakmam bay tilak a' aej chi el yakan.
- ⁵ A xol juntzan tx'ok conobal, ay mac ok alon axca ti': Ayin ti' yet in Jehová, xi; axa junokxa xin, ok yaoc bi Jacob yin. Ay pax junxa xin, a wal caw ok tz'ibenok. Yet in Jehová, xi, cax ok yaon oc Israel jebilok is bi, xi Cham.
- ⁶ A Jehová Cham Rey chi ak'on bekchaj el Israel. A ton Jehová, Cham Yajaw yin Masanil chi alon axca ti': Ayinc'alta' ec' yettax yichbanil, ac'ala' ayinc'al ec' yet lajubal, asannej in Dios in, cax c'am junokxa.
- ⁷ ¿Mac junok lajan wetok? K'anjabokabi cax chi watx' alnen ayin. Tok ay junokxa mactxel max aloncan tzet max uj yettax yichbanil, c'al tzet ok uj yet yajtok tu'. Ta ay xin, yalokab tzet yetal toxa ok ujok.
- ⁸ Manchak ex xiw xin, tokwal maj wal jun ti' ayex yettaxc'al payxa. In testigo ex ayex ti'. ¿Tokwal ay junokxa dios c'al junokxa colwajwom? Ayin ti', c'am junokxa wojtak, xi Cham.

Ay yowal c'ul Dios yin comon dios

⁹ C'am yelapnok eb watx'nem yechelej. Tokwal ay tzet chi oc juntzan yechelej chi camc'ulnej eb tu'. A eb chi oc ayilal bay juntzan tu', axca tol c'am chi ilwi eb, c'am is nabal eb. Yuj tu' xan toxac'al ok q'uixwok can aj eb yuj. ¹⁰ A mac chi watx'nen aj junok ch'en yechelej, cax chi oc yin ayilal bay axcaxac'al tol dios yaloni, a jun tu', nabac'al is mulnajil. ¹¹ Ilabi masanil eb tol ayoc c'ul yin yechelej, ok q'uixwokcan aj eb, yujtol animac'al wal eb chi watx'nen yechelej tu'. Ta chi waj ba eb masanil, cax chi tx'oxon ba eb in satak, yet chi beyc'ulnelay el eb, q'uixawtakxac'al mi chi yuncan eb, cax chi xiwcen aj eb.

¹² A tinani', ok jil wal tzet chi yut mulnaj ba nak tenom ch'en: Tol chi yiaj is mitx'k'ab, yet mayal tz'a ch'en ch'en tu' yuj bay xol tzak'ak', cax

chi mak'on yetok martillo, axa yalon ba yoc yin yechelej tu'. Yetok wal yipal is k'ab cax chi watx'neni. Chi tit wajil, axa c'unbi aj mulnaj tu'. Ta c'am chi yuc' a' chi pax yip.

¹³Ok jil c'apax tzetbil mulnaj junok josom te': Chi yechej yetok junok echbalej, chi yaon oc yechel yetok tz'ibbalej, c'al yetok compás, axa mulnaj yetok tz'ukub tu', axca tu' chi yut watx'nen junok yechelej, axcaxac'al watx'il yili junok anima chi yutej. Axa chi yun xin, chi yaon octok eb yul junok templo.

¹⁴A junok josom te' chi toj k'akaj junok te c'ute', cax chi watx'nen junok yechelej. Ma xin, chi satnej junok te q'uisis ma junok te ji' xolak k'akte' yin yaliñal, masantac'al yet chi oc te' miman teal, cax chi watx'nen yin diosal. Ma xin, acaw jun winak tu' chi awon junok te k'uk'taj, axa nab chi ak'on ch'ibok. ¹⁵Lajwi tu', cax chi k'akon aj te' yin sial, chi yiontok janic'ok te' yet chi k'añni. Cax chi k'anon c'apax te' yet chi taj is lobej c'al yoc is pat. Ac'ala' yetok jabokxa te', chi watx'nen aj junok yechelej is diosalok. Lajwi tu' chi c'oli yay nojan yin ayilal bay.

¹⁶Ilab xin, a bay jun k'ak' tu' chi bol is chibej, cax chi lowi, watx'xac'al chi yun noj c'ul yetok bolbil chibej tu'. Chi lajwi tu' cax chi k'añni, c'al yalon axca ti': Caw wal watx'xac'al in k'añni bay ti k'ak' ti'. Caw wal mayal in k'añnaj aj chi wabej, xi. ¹⁷Ac'ala' yetok jabokxa te te' tu' chi watx'nej pax aj junok yechelej chi oc is diosalok, cax chi c'oli yay nojan satak. Chi tewi oc bay axca ti': Col in elok, yujtol in diosal ach, xi bay.

¹⁸A wal juntzan anima chi yun axca tu', man yojtakok eb, c'am chi nachaj el yuj eb. Axca wal tol mutz'an sat eb, c'am chi je' yilon eb, makan el is nabal eb, c'am chi je' nachaj el yuj eb. ¹⁹C'am chi cam naon eb, yujtol caw wal c'am is nabal eb, xan c'am chi nachaj el yuj eb yalon axca ti': A nanok jun te' ti' max wak' tz'aok, a bay tu' max oc in pat, a bay tu' max in bol c'apax in chibej, cax max in lowi. ¿Tom in moj wal chin watx'nej junok dios tol yajbejtak yetok janic'okxa te ti'? ¿Tom in moj wal chin oc ayilal bay jun k'ojal te' ti'? man xiok. ²⁰A mactxel chi yaoc juntzan dios tu' yipok c'ul, lajan wal axca tol a tik'ak'il tan chi lotok eb. Yujtol etnebil is nabal eb, xan chi c'ayxac'altok eb, c'amxa chi je' colon ba eb yalon axca ti': A jun tzet yetal ayoc yul in k'ab ti', toc'al chin yetnej, man xiok eb.

A Jehová Cham Tz'unwajwom c'al Colwajwom yin Israel

²¹Max yalon Jehová: Ex aj Israel, is conobal Jacob, naektek tol in chekbej ex, ayin max ex in tz'unu', yet chex oc in chekbejok, xan c'amokab chin toj c'ayc'ulal e yuj xin.

²²Ayin max wak' c'ayaj e yobtakil c'al e mul, axca wal chi yun c'ayaj asun. Sebaxek ayin junelxa, yujtol ayin max ex wak' bekchajok, xi Cham.

²³Awjokokab satcan yin tzalojc'ulal yuj masanil tzetak yetal max yun Jehová. Awjokokab mimek jobelak sat tx'otx' tx'otx'. Elokab

c'apax yaw mimek witzlak, yetokc'al k'aktelak yin aloj watx'
k'anej. Yujtol a Jehová mayal tx'ox is mayk'ak'al yin yak'on
bekbanilal bay Israel, a ton is conobal Jacob.

- 24 Cay wal ti' yalon Jehová, Cham max on ak'on bekchajok: Ayin max
ex in watx'nej yet c'amto chex alji. Ayin Jehová in max wesnej aj
masanil tzet yetal. Ayin max in jenbajtok satcan, ayin max in jenbaj
c'apaxtok tx'otx' tx'otx' ti', c'amc'al junok mac max colwaj wetok.
- 25 Chi wetnejtok is k'anej eb ajtxum, cax chi wak'on nachaj el yuj anima
tol c'am nabal eb naom el k'anej yaloni. Chi wak'on somchaj el
nabal eb aj nabal, cax suc'al nabalejxac'al chi yuncan el is nabal eb.
- 26 Ayin chi wak' yun is k'anej eb in chekbej, yet watx' watx'c'al chi yun
yeloc is k'anej eb tu'. Ayin ton chi wala' tol a Jerusalén ok cajlay
junelxa, cax ok ca watx'nelay aj conoblak yet Judá. Ayin ok wak'
watx'nelay aj junelxa bay max etaxtok.
- 27 Ayin ti' chi je' walon bay a' miman aej: Tanan ajok. Ok wak' tanaj a'
mimek aejlak chi el yakan, quin chi.
- 28 Ayin chi wal bay Ciro: Ach ayach oc yilomalok wuj. Ach ok a watx'nej
masanil tzet chi wochej, quin chi, xan ach ok al yin Jerusalén: Ok ca
watx'nelay ajok, ok alay c'apax ay is cimiental templo, cachi, xi Jehová.

Ayoc ikbej yul k'ab Ciro yuj Jehová

45 ¹A Jehová ok sic'on oc Ciro yin reyal, a wal caw ok ak'on yip is
watx' k'ab, yet watx' chi yak' ayc'ay nacionlak, c'al yion el yikbej eb
rey. A c'apax Jehová ok ak'on jakchaj is puertalakil mimek conob satak Ciro,
tamwal ay junokxa ok je' makcheni. Axa tinani', chi yal Jehová axca ti':

- ² Ayin wal caw ok in babjok a satak, ok wak' pananbok be bay
jobq'uixtak, cax ok in mak'on poj puertalak tol bronce, c'al in
coc'bijnentok ch'en hierro ayoc yijulok.
- ³ Cax ok wak'on ayach juntzan beyomal tol c'uban el bay ewantak, yet
watx' chojtaknej elok, tol ayin ton Jehová in, Diosal in Israel, max
ach wawtej yin wak'on binaj a bi.
- ⁴ Yuj wal in camc'ulalil yin eb in chekbej yinatil Jacob, a ton conob
Israel sic'bil el wuj, max ach wawtej yin wak'on binaj a bi. Caw
miman a binaj wuj, caxc'al man ojtakbilok in oj.
- ⁵ Asannej in Jehová in, c'am junokxa. C'am junokxa Dios, asannej in.
Ayin ok wak' ep, caxc'al man in ojtakok,
- ⁶ yet watx' chi ojtaknelay el yuj masanil anima, tac'al bay yichcan, masantac'al
bay yayub c'u, tol asannej in Jehová in, cax c'am junokxa Dios.
- ⁷ Ayin max wesnej aj sakk'inal, c'al k'ekk'inal, ayin chi wak' pitzc'oj
aj junc'ulal, cax ayin chi wak' c'apax pitzc'oj aj yatakilal. Ayin
Jehová in chi wun masanil juntzan ti'.

Yelxac'al ec'ban is yipalil Dios

- ⁸ Ayokabtek tojolal bay satcan, axca chi yun tit nab xol asun. Chaokab tx'otx' tx'otx' jun tu', yet chi aj can colbanilej, c'al tojolal axca ch'ib an ac'un. Ayin Jehová in ok wak' yun axca tu', xi Cham.
- ⁹ Ok'bal wal c'ul mactxel chi yak' owal yetok Cham is watx'nemal. A jun cambejal anima tu', lajan wal yayji axca tz'akbejal tx'otx' c'un poji. Tokwal chi yal tx'otx' tz'akbejal tx'otx' bay mac chi tz'akon tu' axca ti': ¿Tzet yetal chonej? Ach ti' man ojtakok chach mulnaji, man xiok.
- ¹⁰ Ok'bal wal c'ul mac chi yal bay is mam, ma bay is txutx: ¿Tzet yuj xan caytu' max in e yut axca ti'? ta xi.
- ¹¹ A Jehová Cham Diosal Israel tol Asanxanej Ocok, a ton Cham is tz'unumal chi alon axca ti': ¿Tom ay tzet ok e yal win yin tzet ok wun yetok eb wuninal yet yajtok tu'? Tokwal ayex ok e yal tzet ok wunej.
- ¹² Ayin max wesnej aj tx'otx' tx'otx' ti', yetokc'al masanil mac cajan bay. Ayin max in jenbajtok satcan ti', cax max waloni tol chi pitzc'oj aj masanil waycan.
- ¹³ Ayin ok in jak nabal Ciro yet chi yun tojolal, cax ok in jichlonej masanil be satak. A ok ca watx'nen aj in conob Jerusalén cax ok yak'on bekchaj el in conob tol preso yayji, yin tol c'amc'al tojol, tamwal paktzebal ok ak'lay bay, xi Jehová Cham Yajaw yin Masanil.
- ¹⁴ Chi yalon Jehová bay Israel axca ti': A jantak beyomal eb aj Egipto, c'al eb aj Etiopía, e yetc'al ocok. A eb winak aj Sabá tol mimek is tel, ok yaoc ba eb yul e k'ab, cax ok occan eb e chekbejok. C'alan eb yetok cadena, yet ok tok eb e yintak, ok ay jajan eb e satak, cax ok yalon eb axca ti' ayex: Wal yel ayic' Dios e yetok ayex ti', c'am junokxa Dios, palta asannej oc Cham, xi eb, xi Jehová bay Israel.
- ¹⁵ Yel ton wali ach ton Dios ach, tol c'am chach nachaj el juj, ach Dios co Colomal ach ayon Israel on ti'.
- ¹⁶ A masanil eb chi watx'nen juntzan yechelej tol dios yalon eb, q'uixawtaxxac'al eb, ayoc eb yin somc'ulal, ok elcan besesok eb.
- ¹⁷ A pax Israel xin, a wal caw Jehová ok colon yin junelnej. C'am yechel tol yaynakil ok yunej, tamwal q'uixwi ajok.
- ¹⁸ A Jehová Dios max esnen aj satcan, a max watx'nen tx'otx' tx'otx' ti', caw wal watx' max yutej. Max watx'nej, man yujok tol toc'al ayic'ok, palta a yuj cajlayi. A' chi alon axca ti': Asannej in Jehová in, c'am junokxa Dios.

- 19 Ayin ti' man yinok ewantakil chin k'anjabí, tamwal bay
 k'ekk'olinakil yulak c'ul tx'otx' tx'otx'. C'amc'al tzet max wal bay
 eb yinatil Jacob axca ti': Awtej in ec' yin nabac'al, man quin chiok.
 Ayin Jehová in ti' a tzet yetal jichan, c'al yel, a chi wala', quin chi.

Jehová yetok juntzan yechelej bay Babilonia

- 20 Chi yal Jehová axca ti': Wajek e ba cax titanek, mac ex elnak ex aj bay
 e conob, a ton ex c'am e nabal tol te' chi oc e diosalok, che batxon
 ec'ok, cax chex oc ayilal bay juntzan dios tol c'am chi je' colwaji.
 21 K'anjabanek cax che yalon e nabal, jun lajan chi yun e lajtinen e ba.
 ¿Mactxel max alon el juntzan ti' yettaxc'al yichbanil? ¿Mac max alon
 el yettaxc'al payxa? ¿Mayin mi nak Jehová in max wal juntzan ti'?
 C'am junokxa Dios in satak. Tok ay junokxa Dios tojol chi colwaji.
 22 Meltzojanektek ayin. Ayin ok ex in colo', jantak ex cajan ex bay
 tilakil el tx'otx' tx'otx', yujtol asannej in Dios in, c'am junokxa.
 23 Ayin caw chi wala' cax chi wak'on in ti'. Yel tzet chi wala', man ok
 in q'uex in k'anej. Tol ok ay jajan masanil anima in satak, cax
 masanil eb ok yak' ti' ayin.
 24 Ok yalon eb masanil win axca ti': Asannej Jehová tojol, cax ay yipalil,
 xi eb. Axa masanil eb yob c'ul win, toxac'al ok q'uixwok can aj eb.
 25 Asan win ok yi' eb yinatil Israel tojolal, ok yak' tzalobjok eb c'ul, xi
 Jehová.

46 ¹ Mayal ay paknaj dios Bel, axa Nebo mayal ayc'ayi. Yujtol a
 juntzan dios tu', ikbil chi yun toj yuj no chej; caw wal al juntzan
 tu', cax chi yikon no iktzom no' tol c'unbinakxa.

- 2 A juntzan yechelej tu', chi ay telanok cax chi ayc'ayi, tamwal ay
 jabok yipalil yin colon el ba. Ajun juntzan tu' chi ilaytok preso.
 3 Axca ti' yalon Jehová: Abxalwanek ayin, ex yinatil Jacob, jantak exto
 max ex cancan bay conobal Israel, tol ibil exxac'alta' oc wuj yet
 c'amto chex alji; tol ayin lacnej ex ocok yet mojbil exto yuj e txutx.
 4 Ac'ala' caytu' ok wunc'al e yetok yet icham anima exxa ti', ayinc'al
 oc e yetok, caxc'al sakxa xil e jolom. Ayin max ex in watx'nej, ok
 ex in taynejc'al. Ok in occ'al e yetok, cax ok ex in colonc'al.

- 5 ¿Mac yetok chi je' quin e lajban tinani'? ¿Mac yetok lajan wayji e
 naoni?
 6 Ay mac chi yiajteq oro yul is tx'uy, cax chi yechen plata yul echbal,
 cax chi sayon junok tenom ch'en yuj watx'ji junok is diosal, axa
 yay nojan satak tu', cax chi txajli bay.
 7 Chi yaon ajtok jolom xic' chi yiontok. Lajwi tu', chi yaon ajtok yiban
 junok meña. A bay tu' chi cancan k'ean junelnej, tokwal chi bili.

Caxc'al chi el yaw jun ay yet tu' chi k'anon colwal bay, palta c'am chi je' tak'wi, tamwal chi colwaj yetok yin is yailal.

⁸ Naektek jun ti' ex tenomtak, chi cam e naon yin tzet max wunej.

⁹ Naektek tzet max uj yet payxa tiempo, tol asannej in Dios in, c'am junokxa, tok ay junokxa dios chi je' lajlen ba wetok.

¹⁰ Ayin max walcan el lajubal yettaxc'al yichbanil. Max walcan el tzetak yetal tolto ok ujok yettaxc'al yalantok. Chi wala' tol ok uj tzet nabalnebil wuj, ok wun tzanc'al tzet chi yochej in c'ul.

¹¹ Mayal wawtejtej jun winak bay yichcan, najatac'al ok tit axca junok tx'acbj. A jun tu' ok wak' yun masanil tzet yetal nabil wuj, axca wal max wut waloni, caywal tu' ok wutej.

¹² Ex anima pit, abxalwanek ayin, mac ex najat ayex el yin tojolal.

¹³ A in tojolal cawilxa ayic' wuj, manxa ok mayjok. Ayman ok in colcan el conob Sión, caw wal mimanbil ok wut Israel, xi Jehová.

Yayc'aybal Babilonia

47 ¹ Axca ti' yalon Jehová yin Babilonia: Ayokabtek bay trono, ayokab chotan xol pokok. A yet payxa lajan axca junok ix k'opoj c'amtoc'al mac max yajawbi yin. Axa tinani' manxa ok al-lay yin tol unin k'opoj ya yili. A tinani' mosejalxa.

² Ocokab yin ch'en molino, cax beokab ixim trigo, yiokab el makil sat, jitzokab aj is pichil yin xub cax taxokab a' aej.

³ Il-layokab is mimanil tol t'iran el tu', txequelokab is mimanil tol q'uixwiltak yili. Ok in paktzej bay, c'amc'al junok xol eb bay ok cusoc in c'ul yin, xi Jehová.

⁴ A wal Cham chon ak'on bekchajok, co Diosal tol Asanxanej Ocok, Cham chi yik Jehová, Cham Yajaw yin Masanil, a' chi alon axca ti':

⁵ Ex aj Babilonia, ayanek chotan yin tz'ininial xol k'ekk'inal, tol c'amxa bak'in ok ex binaj yin yajawilal yin mimek nación.

⁶ A yet aytek wowal yin in conob, max wut wal eb axca tol man in conobok, max in bekon oc yul e k'ab, c'amxac'al jabok max cus e c'ul yin eb, toltax eb icham anima, ya' max ec' eb e yuj.

⁷ Max e yalon c'apax axca ti': Ayon ti' yajaw on yin tojbalk'inal, quex chi. C'am wal jabok max e na', tamwal max nachaj el e yuj tzet ok yun yeloc jun ti'.

⁸ A tinani' ex aj Babilonia, abek wal jun ti': Lajan ex axca junok ix ix tol asan yin yob ochwanilej ayoc is nabal, tol watx'xac'al e yay chotan bay trono che yabej, cax che naon yul e c'ul tol c'am junokxa lajan axca ex tu'. Che naon c'apaxok tol c'am yechel ok ex can yin tol c'am ichamilejal, tamwal yin c'am une'al.

- ⁹ Caxc'al yajawil ajtxum ex, cax tz'akan ay e c'ul, palta yin wal junnej c'ual tz'akan ok tit cab tzet yetal ti' e yiban. Ok ex can yin c'am ichamilejal c'al yin c'amxa e yune!.
- ¹⁰ Che na' tol watx'xac'al e yayji ec' yin e yobtakil tu', cax che naon c'apaxok tol c'am mac chex iloni. A tzet e yojtak c'al e jelanil, a chex etneni. Cax che naon yul e c'ul tol asannej ex ocok, cax c'am junokxa.
- ¹¹ Palta ok jay wal oc jun uchlejbabel e yiban, tokwal okto je' e tenon oc wanaj yetok tz'akanil e c'ul tu'. Ok jay wal oc jun uchlejbabel e yiban; majxac'al je' e tojlaneni yet c'am chi ec' jun miman yailal tu' e yiban. A yet man naanok e yuj, lem xic'al ok jayoc e yiban.
- ¹² Beybalnejekc'al e yajtxumal, c'al tz'akanil ay e c'ul tu', a ton juntzan tu' max e cuy yintax e k'opojal. Ok jila' ta okto oc yopiso e yuj, ok jila' ta okto xiw eb anima ayex yuj.
- ¹³ Xiwil eb ak'om nabalej max wajbaj oc ba e yetok, toxac'al max ispay el eb e yuj. Jayokab eb e ilom waycan tu' tinani', eb tol a yet chi yilon waycan, cax chi je' nachaj el yuj eb yaloni, eb chi je' bison xajaw cax yojtak eb tzet yetal ok jayoc e yiban yaloni. Jayokab eb quex ul colon tinani'.
- ¹⁴ Palta a eb tu', lajan wal ok yun eb axca yakan trigo, k'ak'ej ok ak'on tz'a eb, tokwal ok je' colon el ba eb bay xak k'ak'ej tu'. A jun k'ak'ej tu', man lajanok axca k'ak'ej chi je' jay chotan k'añnok c'atan, palta yelxac'al ow ok yunej.
- ¹⁵ Caywal tu' ok yun yelcan apnok eb e colwajwom tu' ayex, a ton eb bay max e k'anlejc'al e nabal yet max ex beyc'altek. Ok ex beklaycan yuj eb masanil, cax junjunxac'al eb ok tokcan yin c'aynakilal, tokwal ayto junokxa mactxel ok ex colonok, xi Jehová.

A Jehová chi yalil tzet ok ujok

48 ¹ Axca ti' yalon Jehová: Abek wal jun ti xin, ex yinatil Jacob, ex tol che yik Israel, tol yinatil Judá ex c'apaxok. Che locbaj in bi ayin Jehová in ti', cax che yaloni tol chex oc yin ayilal ayin e Diosal in ayex aj Israel ex ti'. Palta man yelok che yala'. Yinc'al cabsatil chex k'anjabí.

² A ton ayex che yala', tol aj conob ex bay in conob, cax chin e yaon oc yipok e c'ul, ayin Jehová e Diosal in, Yajaw in yin Masanil.

³ Ataxc'al yet yichbanil max walon el ayex tzet yetal lanan yuji. Ayin wal caw max wak' e yojtaknej elok, yin wal jun bekal max wak' yunej, cax max yion ba.

⁴ Wojtak tol caw wal pit ex, c'am che yiay e ba, tamwal chex q'uixwi jabok in satak.

⁵ Ayxatax waloncan el ayex tinani', a yet c'amto chi yunej max waloncan ayex. Yuj tu' xan maj je' e yalon axca ti' yin e yechelej tol te' ma ch'en: A co diosal ti' max naon jun ti', cax a' max ak'on yunej, man quex chiok.

- ⁶ Ayex ti' max cam wal e yaben masanil juntzan tzet max wal tu'. Chi cam wal e naon yin, cax yowalil che cha e yabej tol yel toni. Axa tinani' xin, ok walcan el juntzanxa tzet yetal ayex, tol ewan c'uan yayji, tol man e yojtakok.
- ⁷ A ton tzet yetal tol ato wal tinani' chin chaoc waloni, man albilok yettax payxa, juntzan tol c'amc'al bay max e yab k'umal yal-layi masantac'al tinani'. Yuj tu' xan man ok je' e yaloni, tol e yojtakxa jun tu'.
- ⁸ Yel toni, a jun ti' c'amtoc'al bay max e yabej, tamwal ayxa bay max e yojtaknej elok, toltax tinani', c'amtoc'al che yabej. Yujtol wojtakc'alta'a tol man yikemok ex, tenomtak ex yettaxc'al max ex alji.
- ⁹ Yet watx' man yobok chi al-lay win, xan chin mitx'oc waan yowal in c'ul ayoc e yiban. Yet watx' watx' chi yun in binaji, xan c'am chex wak' lajwok yin aymanil.
- ¹⁰ Ayin max ex in sakbanej elok, palta man axcaok chi yun sakbanelay el ch'en plata xol k'ak'; palta tol max ex wak' porobal yetok yailal.
- ¹¹ Yuj in mimanbilal xan axca tu' max wutej, yet watx' c'am chin al-lay yobal. ¿Tom ok cha in c'ul tol a aloj watx' k'anej tol wetc'alta' yayji, axa bay comon dios ok al-layok? ñi Jehová.

A Jehová ok colcan el is conob

- ¹² Axca ti' yalon Jehová: Ex israel yinatil Jacob, abek wal tzet ok wala': Ex tol max ex in sic'can elok. Asannej in Dios in, ayinc'alta' ec' yet yichbanil, c'al yet lajubal.
- ¹³ Ayin max in watx'nej tx'otx' tx'otx' ti', ac'ala' ayin max in jenbajtok satcan, axca tol max in k'uchubnej. Toc'al max wak' binaj juntzan ti' max pitzc'ojajok.
- ¹⁴ Wajbajek oc e ba e masanil, abek wal tzet ok wala': ¿Mac wal junok juntzan yechelej max je' yaloni tzet yetal toxa ok ujok, tol a jun winak sic'bil el wuj, a' ok watx'nen masanil tzet max in na' yin Babilonia, axa is yipalil ok ak'on ayc'ay eb caldeo?
- ¹⁵ Ayin max wala', ayin max wak' titok, xan max jayocok. Yuj wal tu' xan ok occ'al beal masanil tzet ok yunej.
- ¹⁶ Jitzektek e ba in cawilal, abek wal tzet ok wal ti': Ataxc'al yet yichbanil, c'am tzet max wal yin ewantakil, axa yet max yuneni, ayinc'alta' ec' bay tu', ñi Jehová. (A tinani' xin, a Jehová Cham Yajaw max in chekontek yetok is Yespíritu.)
- ¹⁷ Axca ti' yalon Jehová Cham Dios Colomal Israel, tol Asanxanej Ocok: Ayin Jehová e Diosal in. Ayin chin tx'ox ayex tzet yetal tol ok oc e watx'ilok, ayin chin tx'ox be ayex bay moj chex tojc'al.

- 18 Matawal max e yikej in chekbanil, axca wal mi a' mimek aej c'am chi tani, caytu' yayji e junc'ulal tinani', axca mi wal yajc'al pomnaj sat a' mar, cay mi wal tu' yayji e tojolar.
- 19 C'amxam chi bischaj jantak e yinatil, lajanxac'al mi eb axca yarenail a' mar. Tok mi wal max ex wak' c'ayilok, tamwal max ex wiel yul in sat, xi Jehová.
- 20 Elanek bay Babilonia, elanek xol eb aj Caldea. Alek el yabixal jun ti' yin aw yet tzalojc'ulal, cax che yak'on ojtaknelay elok masantac'al bay lajubal tx'otx'. Alek axca ti': Mayal on yak' bekchaj el Jehová, ayon yinatil on Jacob is chekbej, quex chi.
- 21 A yet max eq'uel Israel bay takin tx'otx'lak yuj Jehová, maj yab yail takintial. A Cham max ion ay nan ch'en mimek ch'en, cax max elol secnaj mimek aej tol max bey yakan.
- 22 A pax eb yobtakwom xin, c'am jabok watx'il yet eb, xi wal Jehová.

A is chekbej Jehová sakk'inal yayji bay nacionlak

49 ¹ Axca ti' yalon Cham is chekbej Jehová: Ex conoblak bay tilak a' mar, abek tzet ok wala'. Ac'ala' ex nacionlak, tol najat ayex, taynejek e yabej. A Jehová max quin awten yet c'amtoc'al chin alji. Max yalcán el in bi yet mojbil intoc'al aj yuj in txutx.

² A in k'anej max yutcan aj axca wal espada el yayji ye, max in is c'ubaj cawilal is k'ab. Max in yuten axca junok julbalej tol lupupixac'al, cax max in is c'ubaj yul tz'umal is julbal.

³ Max yalon ayin axca ti': Ach ti' Israel tol in chekbej ach, yujtol oj wali, xan ok in al-lay watx'il, xi Jehová ayin.

⁴ Palta max wala' tol nabac'al max in mulnaji, c'am jabok tzet max wi' yin. Nabac'al max el wip, tokwal ay tzet max wi', quin chi. Asan xin, ti wal txequel wayji satak Jehová, a in paktzebal yin jun ti', yul k'ab Cham ayic'ok.

⁵ Axa tinani' xin, mayal in cha' in mimanbilal satak Jehová in Diosal, ac'alta' Cham chi ak'on wip. A Cham max in ak'on ch'ib yin in txutx yet chin oc is chekbejok, yuj wion meltzoj Israel is conobal Jacob junelxa bay.

⁶ Max yalon Cham ayin: In chekbej ach toni, palta man asanok yuj a ca watx'nen pax aj yinatil Jacob, cax cheon meltzoj eb iquisto bay Israel, palta yuj c'apax ach waon oc yin sakk'inalil bay juntzanxa nación, masantac'al bay lajubal tx'otx', yuj eontok colbanilej chi wak'a', xi Cham ayin, xi is Chekbej Jehová.

⁷ A Jehová Cham Dios chi ak'on bekchaj el Israel tol Asanxanej ocok, a' chi alon axca ti' bay jun tol intaknebil elok, c'al tol yajbil yuj

masanil nacionlak, a ton jun chekbej yayji bay eb rey: A yet ok ach yilon eb rey, ok aj wan eb, axa yay nojan eb a satak tu', yujtol ayin Jehová, Diosal in Israel, Asanxanej in Ocoq, max ach in siq'uilok, cax chi wunenc'al bay max wak' in ti', xi Cham.

Is ca watx'nebilal Jerusalén

- 8 Max yalon Jehová axca ti': A yet max ajapnok tiempoal in tx'oxon in watx'c'ulal, max waben a tewilal. A yet max ajapnok c'ual colbanilej max in oc etok. Ok ach in taynej, ok ach waoc yuj ak'on yi ba in trato yetok in conob, yet chi ca watx'nelay aj jun conob tu', yet watx' chi yi pax is satak bay tx'otx' tz'ininixac'al max yuncanok,
- 9 yet watx' chal bay eb presowom axca ti': Elanektek, cachi; c'al bay eb cajan ec' bay xol k'ekk'inal: Elanektek bay sakk'inal, cachi. A eb in conob, lajan ok yun eb axca no calnel chi ec' il-lay low tilak be, c'al bay jolomlak witz bay c'am teal.
- 10 C'amxa wajil c'al takintial, c'amxa yail ok yab eb yuj k'ak'al yakan c'u, yujtol a Cham ay camc'ulal yin eb, cax ok ikbelaytok eb yuj, bay nuk'lak aej.
- 11 Ok in pojtok jun be bay jolomlak witz, caw wal watx'xac'al ok yun in watx'nen beal in conob, xi Cham.
- 12 Ilek wali, tol a bay najat, ay mac chi tit bay norte, ay c'apax juntzanxa chi tit bay yayub c'u, yetok c'apax juntzanxa chi tit bay conob Asuán.
- 13 Awjokokab satcan yin tzalojc'ulal. Nojokab el tx'otx' tx'otx', c'al weklabiokab witzlak yin tzalojc'ulal, yujtol a Jehová lanan mimanc'ulnen is conob; mayal cusoc c'ul Cham yin, yujtol ayoc is conob tu' yin yailal.
- 14 Chi yal Jehová: Axa eb aj Sión xin, chi yal eb axca ti': Max on beklaycan yuj Jehová, max on tojcan c'ayc'ulal yuj Cham Jajawil, xi eb.
- 15 Palta xin, ¿xin ta wal chi toj c'ayc'ulal yune' junok xal txutxey yuj? Caxc'al chi toj c'ayc'ulal yuj xal xin, palta in ayin ti' man ok ex tok c'ayc'ulal wuj.
- 16 Axca tol tz'ib yayji bi conob Sión yul in k'ab, xan naanc'al jun conob tu' wuj.
- 17 Yin wal aymanil ok jay eb, ok ca watx'nen aj murallail conob tu', a pax eb ajc'ul chi uchon ay tu' c'al c'ayon elok, lananxa yelaj eb.
- 18 Ilekto Waltok bay e yinlak, cax che yiloni tol lanan wajon ba eb tojnak yin presoal yet chi jayoc eb ayex.

Ayin Jehová in tol ayinc'al ec' yin tojbalk'inal, chi wak' in ti' ayex, tol ok e maynej e ba yuj eb e yet conob chi jayoc ayex, axca chi

yun maynen ba junok ix ix watx'xac'al yoc yelbub is pichil yet lanan toj nupayok.

19 Yujtol a conob caw wal uchchajnaktok, tz'ininixac'al yayji canok. Axa tinani' xin, manxa ok yab tx'otx' bay ok caway anima. A eb max uchon lajwok tu', najattac'al ok tokcan eb.

20 A eb e yuninal max alji bay tx'ok conobal, ok yal eb ayex axca ti': A chon caway ti', yelxac'al txennej ayon, ak' mimanbok co satak bay chon ayji, xi mi eb.

21 Axa ayex ti', ok e na yul e c'ul axca ti': ¿Mac ay yuninal juntzan ti'? Yujtol a eb jet max lajwi ayok, c'amxa juninal chi jay ayon ti', tol uktebil on elok, ec'jabwom on bay junxa conob. ¿Mac wal txel max ilon ch'ib juntzan eb ti' xin? Yujtol bekbil on can co tx'oklil. ¿Baytal max ca titoc juntzan eb ti'? quex chi mi.

22 Ayin Jehová in, ok wal bay nacionlak, cax ok wion aj in bandera yil eb, axa yiontek eb eb e winak unin tu'; axa eb e ix unin, jolomxic'nebil ok yun tit eb ix.

23 A eb cham rey ok ilon ch'ib eb e yuninal, axa eb xal reina ok ikon ec' eb; ok ay nojan eb yajaw tu' sat tx'otx', yelxac'al yaynakil ok yun eb e satak. A yet tu' ok e yojtaknej elok tol ayin ton Jehová in. A mac chi yaoc c'ul win, man ok cancan yin q'uixawc'ulalil, xi Cham.

24 ¿Chi mi je' yilay ec' bay junok winak tol caw wal tec'an, tzet yetal max yi' yin owal? ¿Chi mi je' yilay ec' junok aj preso bay junok yajaw yelxac'al ow?

25 A Jehová chi alon axca ti': A bay junok winak tec'an, ok ilay ec' junok aj preso, a bay junok yajaw tol ow, ok ilay ec' tzet yetal max yi' yin owal. Yujtol ayin ok in oc satak eb ajc'ul oc e yin. Ayin wal caw ok in colcan el eb e yuninal tu'.

26 Ayin ok wak' yunej tol ok mak'lej cam ba eb chex etneni, axcaxac'al uq'uem an ok yun eb yuj is chichonc'ulal, axca tol ok yuc'lej eb is chiq'uul. Yuj tu xin, masanil anima ok ojtaknen elok tol ayin ton Jehová e Colomal in, ayin chex wak' bekchajok. Ayin ton is Diosal in Jacob, tol chi je' wuj masanil, xi Jehová.

50 ¹Max yalon Jehová axca ti' bay Israel: Tatol max in pojlej in ba yetok e txutx, ¿baytal ay junok un yet pojlejbail chi alon tinani'? Tatol ayin max ex in txontok yin mosejal, ¿mactxel bay ay in jec, xan tol max ex in txonilok? Ayex ti' max ex ilaytok yin mosejal; palta yuj e mul, c'al yuj e yobtakil tu' xan max ex uktelaytok.

² ¿Tzet yuj xan a yet max in jayi, c'am mactxel max ilchaj wuj, axa yet max ex wawteni, c'am mactxel max tak'wi? ¿Chi mi e na' tol c'am chi je' wuj ex in coloncan elok? ¿Chi mi e na' c'apaxok, tol man ok je' wuj

ex wak'on bekchaj elok? K'okbile'al asan junok k'anej chi wala', cax chi tanaj a' mar, cax tz'ininixac'al chi yuncan a' mimek aejlak. Axa camcan el no txay yuj takintial tu', cax chi k'atok no', yuj c'amxa aej.
 3 Ayin chi wak' k'ekbok el satcan tu', cax toxac'al cusiltak chi yun yili, xi Jehová.

Yikemal Cham Chekbej Jehová

- 4 Axca ti' yalon Cham Chekbej Jehová: A Jehová Cham Yajaw max quin ak'on jelanbok yin in k'anjabi, yet watx' chi je' wak'on yipc'ulal eb ayoc yin c'unbilal. Junjunc'al k'inibalil chi yak' Cham wochej aj wabeni, tzet ok yak' in cuyu'.
 5 A Jehová max jakon in nabal, maj in oc yin tenomtakilal, tamwal max quin el acan bay.
 6 Max wacbjtok wichin yet chin is mak'on eb ajc'ul, bekan in c'ul jatzon el eb xil in ti'. Maj in c'ubaj el in sat bay eb chin buchoni c'al tzubli oc eb yin in sat.
 7 A Jehová Cham Wajawil chi colwaj wetok. Yuj tu' xan maj cabax aj in c'ul yuj tzet max in yut eb. Yuj tu' xan tec'anc'al in waay axca junok miman ch'en, wojtak wali tol man ok el in q'uixwil.
 8 A Cham chin coloni, cawilc'al ayic' in c'atan. ¿Mac wal txel ok je' in yak'on queja? Toj jil-lej oc co sat satak Cham juez, ¿Mactxel jun ajc'ul oc win tu'? Titokab in c'atan ti', cax chi yaloni.
 9 A ton Jehová Cham Yajaw chi colwaj wetok. ¿Mactxel ok je' yak'on low win? A masanil eb ajc'ul oc win, ok lajwok ay eb axca icham pichilej tol ijtakxac'al, xi Cham Chekbej Jehová.
 10 A mac ex tol ay yelapnok Jehová yul e sat ti', cax che yaben tzet chi yal is Chekbej: Tatol chex bey xol k'ekk'inal yin tol c'am jabok e tzeztebal, aek oc Jehová yipok e c'ul cax ayjanekc'al oc yin Cham.
 11 Axa mactxel ex che yaoc k'ak'ej, c'al e watx'nen e tzeztebal yul e yet, beyanek yetok e tzeztebal tu xin. A Jehová ok aontek jun paktzebal ayex; toxac'al ok ex aycan telan xol miman yailal yuj.

K'anej yet mimanc'ulnebilal Jerusalén

- 51** 1 Axca ti' yalon Jehová: A mac ex che yochej chex beytok yin tojolal, c'al e jayoc ayin, abek wal tzet ok wala': Ilek wal bay max quex tita, tzetbil wal yayji e yichmam.
 2 Ilab e yichmam Abraham, c'al e txutx ixnam Sara, c'am yuninal eb yet max wawten Abraham tu', palta max wak' yaxilal bay, xan xiwil max yun yinatil.
 3 Ok wak' in watx'c'ulalil bay Sión, a ton eb cajan bay conob uchbil ayok. A masanil takin tx'otx'lak, lajanxac'al ok yuncan el wuj axca wal junok

awoj manxa watx'ilok, axca wal jun awoj max waw bay Edén. A bay tu', asanxanej tzalojc'ulal ay, asanxanej bit c'al aloj watx' k'anej ayin, ok ujok.

⁴ Ex in conob, taynejek e yab tzet ok wala': Tol ok walil chekbanilej, c'al cuybanilej ok ikban conoblak.

⁵ Cawilxa ay c'ual wak'on paktzebal, a ton c'ual yet chin colwaji. A yetok masanil wikbej ok in yajawbok yiban conoblak. A conoblak ayic' bay tilak a' mar, ok yaoc nabal win. A in mayk'ak'al ok oc yipok c'ul eb.

⁶ Ajanektok t'anan bay satcan, cax ayanek t'anan c'apax sat tx'otx' ti'. A satcan tu', ok c'aycan aj axca wal c'ayaj mub, axa sat tx'otx' ti' ok ichambok axca chi yun yichambi pichilej, cax ok c'aylay c'apax el eb anima bay yiban tx'otx' ti' axca no us. Axa ayin ti' ok ex in col yin junelnej. A in colwal tu', c'am yechel ok lajwok.

⁷ A ayex e yojtakxa tojolal, ex che ya wal oc in chekbanil yin e c'ul, abek xin. C'am chex xiwaj yuj eb chi buchwaji; manchak cabax aj e c'ul yuj yob k'anej chi yal eb,

⁸ yujtol ok lajwok el eb axca junok icham pichilej tol ijtakxac'al, axca lana pichilej chi c'uxlaytok yuj no ij. Axa in tojolal, c'al in colwal ayc'al yin tojbalk'inal, xi Jehová.

⁹ Ajan wan Jehová, ajan wan yetok a mayk'ak'al, yetok wal masanil epalil, axcac'alta' chon yet payxa. A yet payxa tu', ach max ak' lajwok Rahab, max ak' yasjok no dragón tu'.

¹⁰ Ach max ak' c'apax tanaj a' mar, c'al a' aej tol najat yich, axa bay najatil yich a' mar tu', axcaxa be max otcantok yet chi ec'tok eb colbil el oj.

¹¹ Axca ton wal tu' ok yun meltzoj eb colbilxa el oj Mamin Jehová. Chi bitni eb, cax ok jayoc eb bay Sión, toxac'al ok tzetzon eb yuj tzalojc'ulal; axa ok'ilal c'al bilc'ulal ok c'ayajok.

¹² Axca ton ti' yalon Jehová: Ayin toni, ayin chex in mimanc'ulnej, ¿macto wal bay ok ex xiwok? ¿A mi bay eb winak tol cambejal yayji, tol lajanc'al eb axcac'al an ac'un?

¹³ Ayin Jehová e watx'nemal in. Ayin max in jenbajtok satcan cax max in watx'nej ay tx'otx' tx'otx' ti'. ¿Tom mayal in tojcan c'ayc'ulal e yuj, xan che yak' xiwaj e c'ul bay mac chex etneni, yet lanan nalayi tol ok ex c'aylay elok? ¿Tzetto wal chi oc yowal c'ul jun etnewom tu'?

¹⁴ A mac chi yab yail bay chi etnelay tu', ayman ok col-lay elok. Man ok cam yul preso, tamwal ok majax is lobej.

¹⁵ Ayin Jehová e Diosal in, a in bi tu' a ton Jehová Cham Yajaw yin Masanil. Ayin chi wiaj can sat a' mar, cax chi wak'on bil a'.

- 16 Ayin max in jenbajtok satcan, c'al in watx'nen ay tx'otx' tx'otx' ti'. Ayin chi wak' e yalil in k'anej, cax chex in colon el yetok wipalil, cax chi walon bay Sión: Ayex ti' in conob ex, quin chi bay, xi Jehová.
- 17 Iek el e wayan ex aj Jerusalén, ajanek wanok. Mayal e yab yail is yowal c'ul Jehová, axca wal mac chi uq'uen an, masantac'al chi c'aycan el c'ul yuj.
- 18 A xol jantak eb e yuninal, c'am junok eb max ex ikban ec'ok. C'al masanil eb unin max e yil ch'ibok, c'am junok eb max ex nic'oni.
- 19 A ton cab tzet yetal max tit e yiban ti': Tol max uchlay lajwok e conob ti', c'al wajil max on cam eb cajyom bay yuj owal. ¿Macto ok cusoc c'ul e yin? ¿Macto ok ex mimanc'ulnenok?
- 20 Mayal pax yip eb e yuninal, mayal ayc'ay eb axca no tx'ucchej chi can yul tx'an yal, toxac'al max cancan teljab eb bay txiquinlak calle. Yastakxac'al eb yuj yowal c'ul Jehová, yuj is yak'bal cuenta Cham.
- 21 Ex aj Jerusalén, etnejc'ulal e yayji, axcacac'al tol uq'uem ex an, palta man yujok vino. Chi cam wal e yaben tzet ok yal Cham.
- 22 Chi yal axca ti': Ayin Jehová e Diosal chex in colo', ayin ton chi wal axca ti': Ok wican ec' yechbalil yowal in c'ul yul e k'ab, cax majxa e yuc' junelokxa.
- 23 A bay eb max ex etneni, a tu' ok wak'a', a ton eb max alon ayex axca ti': Ayaneq telan sat tx'otx', tol ok on eq'uel e yiban, xi eb. Axa e yay telan sat tx'otx' tu', max ex tec'ontok eb axca pokok, quin chi, xi Jehová.

Chi al-lay el bekbanilal Jerusalén

52 1 Iek el e wayan ex aj Sión, ajanek wanok, tec'bajek e ba ex aj Jerusalén, tol conob ex Dios. Tx'oxek el e yikbej ak'bil ayex yuj Dios, c'amxa yechel ok octok eb tx'ok conobal tol tx'ok is diosal bay e conob ti' yin ex yak'on ayc'ay junelxa.

2 Ajanek wan xin, ex aj conob Jerusalén, mak'ek el pokok e yin, iek e yikbej yin e yak'on yajawilal, ex cajyom bay Sión. Iek el e c'albanilal ayoc yin e nuk'.

3 Chi yal Jehová axca ti': C'am tumin max in cha e yin yet max quex ilaytok yin mosejal. Ac'ala' tinani', c'am c'apax tumin ok wak' yet chex wion paxtek junelxa, xi Cham.

4 Yujtol axca wal ti' yalon Jehová Cham Yajaw: A in conob ti', max tojcan bay Egipto yet payxa, cax max ayji ec' eb bay tu' yinc'al ec'jabwom animail. Axa yintakilal max etax eb yuj eb aj Asiria yin tol c'am yujal.

5 Axa tinani' xin, ¿tzet yetal ok wun cayti'? Yin wal c'am tzet yujal max ilaytok in conob bay Babilonia. A wal eb chi yajawbi yiban tu', chi buchwaj eb, c'amc'al chi bek eb quin buchoni.

- ⁶ Yuj wal tu xin, ok ajapnok c'ual, cax ok in yojtaknen el in conob ti', tol ayin ton Jehová in max in k'anjab bay, cax ayin ec' yetok, xi Jehová.
- ⁷ A wal yet chi jilon bay chonlak tzalan, xiwil watx'il yili yet chi jayoc nak chi alon watx' abix, a yabixal junc'ulal ibil oc yuj, a ton chi alon el yabixal bekbani'al, cax chi yalon axca ti': Ex aj Sión, a e Diosal ayxa oc yin Rey'al, xi.
- ⁸ Abek, a eb taynemal e conob, chi el yaw eb. Jun lajan chi yun yaj bulnaj eb yel yaw yuj tzalojc'ulal, yujtol a wal caw eb chi iloni, tol mayal meltzoy pax Jehová bay Sión.
- ⁹ Bitnane'k yin tzalojc'ulal ex cajan ex bay Jerusalén, tol uchquiltakxac'al yayji, yujtol a Jehová mayal wal cus c'ul yin is conob, mayal yak' colbanilej bay Jerusalén junelxa.
- ¹⁰ Mayal tx'ox Jehová is yipalil tol Asanxanej Ocok bay satak masanil nacionlak. Masanil yulyibank'inal ok yojtaknej elok tol a Dios max on coloni.
- ¹¹ Elanek, elanek bay Babilonia ex iney oc mitx'k'abej yet Jehová. Manchakxa e mitx' tzetak yetal tol man watx'ok, c'amxa che yatok e ba xol yobtakil.
- ¹² Man yinokxac'al aymanil ok yun e yeli, man toc'alok ok ex elajok, yujtol a Jehová e Diosal babel e satak, tzakan c'apax e yintak, cax taynebil ex yuj.

Yailal is Chekbej Jehová

- ¹³ Axca ti' yalon Jehová: A in chekbej ok ujç'al yuj, yelxac'al miman ok yun yilay aj can.
- ¹⁴ Xiwil mac ok c'ayaj c'ul yin, caw wal tol tx'okxa yili ok yil eb, manxa animaok ok yun yili, yuj tzet ok utlayok.
- ¹⁵ Axa yet yajtok tu', xiwil nacionlak ok c'ayaj c'ul yuj. A wal yet ok yilon oc eb rey, c'amxac'al tzet ok yal eb yuj, yujtol ok yil eb, c'al nachaj el yuj eb tzet yetal tol c'amc'alta' bay max yab eb k'umal, xi Jehová.
- 53** ¹ Ok yal Israel axca ti': ¿Mactxel max yaoc c'ul yin k'anej max al-layi? ¿Mactxel max nachaj el mulnajbal Jehová yuj, yin jun k'anej ti'? xi mi eb.
- ² Max yochej c'ul Jehová tol max ch'ib is chekbej, axca ch'ib junok wolej chi tit yin junok xeej bay takin tx'otx'. Man wal ochbejtakok yili, tamwal ay is may chi jilokok, c'am wal chi tzaloj co c'ul jilon ocok.
- ³ Buchbil el Cham, intaknebil el yuj yet animail; winak wal tol max yabc'al yail, k'ajanxa yin yetnen c'ul. Axca tol manxa is mojalok chi il-lay oc yin, max jintaknej elok, c'am yelapnok yul co sat.
- ⁴ Max co na' ayon ti' tol a Dios max ak'on yasjok, yin yaon oc yailal, c'al yuten yin yaynakil. Akxa xin, ti' tol a jilya' ayoc yiban, lanan yaben yail co q'uexelok.

- ⁵ Max yasjitok yuj co tenomtakil, max yaben c'apax yail yuj co yobtakilal. A wal yailal max yab tu', a' max ion jay co junc'ulal. Yuj wal is yas Cham tu', xan ay co cawil ayon ti'.
- ⁶ Co masanil max on saklemcantok axca no calnel, junjun onxac'al max on tojcan bay chi cha co c'ul; palta a wal caw Jehová max aoncan oc co mul co masanil yiban Cham, xi eb Israel.
- ⁷ Caw wal max buchlayi, palta yaynakilc'al max yut ba, maj paktzej. Max ilaytok axca chi yun yilaytok no calnel bay chi mak'lay camok. C'amc'al tzet max yala'. Tz'inc'al xi axca no calnel yet chi tzuklayi.
- ⁸ Max ilaytok preso, c'al beyc'ulnelay yin man is mojalilok yuj yilay el is k'inal. Tokwal ayto mac xol eb yetconob max naoni, tol max ilay wal el bay sat tx'otx' tx'otx' ti' yujc'al co yobtakil, ayon t'inan chi jab yail.
- ⁹ Caxc'al c'am wal junok yobtakil max yunej, tamwal ay junok lek'tial k'anej max yala', max na eb mukon bay mukan eb yobtakwom. Axa max yun xin, tol a yet max cami, xol eb beyom max cani.
- ¹⁰ Max mak'lay k'aj Cham xol yailal yuj Jehová, axca wal is naoni. Lajwi yak'on ba Cham yin xajanbalil yuj yak'lay tan mulej, cax ok iquisbokc'al. Ok yilon Cham yinatil. A yin Cham ok yuncan el tzet nabil yuj Jehová.
- ¹¹ A yet mayal lajwi ec' xiwil yailal yiban, ok tzalojbok aj c'ul yiloni, tol man nabac'alok max yab yail. Axca ti' yalon Jehová: A in chekbej tojol, xiwil mactxel ok yaoc yin watx'il, chi yal elapnok, a ton eb chi ojtaknen wal elok, yujtol a ok ion el is yobtakil eb.
- ¹² Yuj tu' xan caw wal miman yikbej ok wak' bay xol eb yajaw. Ok wak' yunej tol ay yalon yet xol eb tec'an, yujtol max yak' ba yul k'ab camich, cax max utlay axca chi utlay eb yobtakwom. A ti' yet xin, tol max yikcan aj is yobtakilal xiwil yobtakwom, cax max tewi yuj yak'lay tan is mul eb tu', xi Jehová.

Is camc'ulal Dios yin Israel

54 ¹ Axca ti' yalon Jehová: A Jerusalén, lajan wal axca junok ix ix tol c'amc'alta' yune', bekbilcan yuj yichamil. Axa tinani', moj tol chi awji, chi bitni yin tzalojc'ulal, yujtol xiwilxa yune' ok yila', yintak junok ix ix c'amc'al bay max beklaycan yuj yichamil.

²⁻³ Axca chi yut leon junok ix ix yul is mantiado, chi jokbanej is tx'anil, caw chi yutay yestacail, axca tu' moj chi yun conob Jerusalén, tol miman ok yun yel leeok bay is watx' c'al bay is q'uexan. A eb aj conob ok yican eb is tx'otx'al xiwil naciónlak, cax ok cajon eb juntzan conob bay c'amxa anima.

⁴ Ex aj Jerusalén, manchak ex xiwi. Manxa ok el e q'uixwil, manxa ok ex utlay yin yaynakilal. Manxa ok e natek q'uixwilal max yun e conob yet payxa, yet max in e bekoncanok, axca junok ix ix c'amxa yichamil.

- ⁵ Yujtol ayin e watx'nemal in ti', axca ichamilej wayji e yuj. A in bi Jehová Yajaw in yin Masanil. E Colomal wayji, e Diosal in, tol Asanxanej in Ocok. Ok al-lay win tol is Diosal in masanil yulyibank'inal.
- ⁶ Lajan wal yayji e conob axca junok ix k'opoj ix tol bekbilcan yuj yichamil, tol ayoc yin cusc'ulal, caytu' yayji. Axa tinani', chi awtelay junelxa yuj yichamil tu'.
- ⁷ Ex aj Jerusalén, yin txennej tiempoal max ex in bekcanok, axa pax tinani' xin, yin mimek camc'ulalil chex in chaon paxok.
- ⁸ Junnej wal txolan max tit wowal, majxa in tx'ox in sat ayex; palta ayin ton Jehová e Colomal in chi wala', tol chi ok' pax in c'ul e yin, yin ex in camc'ulnen yin tojbalk'inal.
- ⁹ Axca wal max yun wak'on in ti' bay Noé, tol c'amxa yechel ok yak' junokxa owal aej mukwajwom yin yetnentok tx'otx' tx'otx', axca wal tu' chi yun wak'on in ti' tinani', tol manxac'al ok tit wowal junelxa e yin, tamwal okto ex in tzu' junelxa.
- ¹⁰ Ayin wal caw Jehová in, ay in camc'ulal e yin, xan chi wala' tol caxc'al chi q'uexchaj bay ayic' mimek witz, cax chi ay bulnaj tzalanlak, palta a in camc'ulal e yin, manxa ok lajwok, tamwal ok lajwok in trato e yetok, palta tol ayc'al junc'ulal co xol.

Ac' Jerusalén

- ¹¹ Ok'bal ex c'ul ex aj Jerusalén, ya' max ex ec' yuj mimek yailal, tokwal ay pax mac chex mimanc'ulneni. Axa tinani', ok wacan ay yich e conob yiban ch'en ch'en watx' yili.
- ¹² A yetok ch'en rubíes ok in watx'nej aj is torreal, axa ch'en berilo ok waoc yin satlak murallail bay chi oc puerta, axa masanil ch'en ch'en caw wal watx' yili ok waoc yin is murallail.
- ¹³ Ayin ok ex in cuy e masanil ayex ti', tol watx' ok ex eloc e masanil wuj.
- ¹⁴ Yujtol ok e beybalnej tojolal c'al watx'ilal, a yuj tu', caw wal tec'an ex, c'amxa xiwc'ulal, tamwal ayto mactxel ok ex etnenok, xan manxac'al ok ex xibtelay yuj.
- ¹⁵ Ta ayto mac ok yak' yowal e yin, mayinxanak ay wet jun tu', palta ok ayc'ay jun mac chi yak' owal e yin tu' e yuj.
- ¹⁶ Ilab xin tol ayin max in watx'nej nak tenom ch'en, chi yaoc k'ak'al tzak'ak', cax a yetok k'ak' tu' chi watx'nej mitx'k'abej yet owal. Ayin max in watx'nej c'apax nak chi je' mitx'k'abnen ch'en ch'en yet owal tu', yuj yak'on lajwok masanil.

17 Palta c'am junok mitx'k'abej yet owal ok je' yak'on low e yin. A eb chex ak'on queja, tok ayto tzet ok yal eb e yuj. Ayin chi wut axca tu', yuj e watx'ilok ex in chekbej. Ayin ok ex in colilok, quin chi, xi Jehová.

Awtebal yuj Jehová

55 1 Axca ti' yalon Jehová: Masanil ex ay e takintial, titanek yet chi ul e yuc' a' aej. A mac ex c'am e tumin, titanek ul e yi' e lobej yin sabejal, iektok e vino c'al e leche yin tol c'am is tojol.

2 ¿Tzet wal yuj xan che yak' e tumin is q'uexelok tzet yetal tol man lojok? ¿Tzet wal yuj xan che c'ayil e tumin yin tzet yetal tol c'am chi noj e c'ul yuj? Ta chi cam e yaben xin, che yiken tzet ok wala', watx' loj ok e lo', tol ok e yak' tzalobjok e c'ul e loon tzet yetal tol caw wal watx'.

3 Sebaxek, watx' che yut e taynen e yabej c'al e yikeni, yet watx' chex aj can junelxa. Ok in watx'nej junok in trato e yetok tol ayc'al yin tojbalk'inal. Ok wak' ayex watx'c'ulalil max wak' in ti' wak'on bay cham rey David.

4 Ayin max waoc David tu' yin testigoal bay masanil nacionlak yin ikbajwomal, c'al yin sat yajawil xol conoblak.

5 Ex aj Jerusalén, a yet yajtok tu', wal yel ok e yawtej eb conob tol man e yojtakok, a eb anima man ojtakbilok ex yuj, yinxac'al aymanil ok yun jayoc lemnaj eb ayex. Ayin Jehová e Diosal in ayex Israel ex ti', tol Asanxanej in Ocok, ok wak' yun juntzan ti', yujtol ayin max wak' e mimanbilal, xi Cham.

6 Aek oc e ba yul k'ab Jehová, yak'ban chito je' ex chaoni. Awjanek bay, ilab tol cawil ayic'ok.

7 Ayex yobtakwom ex ti', bekekcan e yobtakil tu', a ex yob e nabal ti', bekekcan e yob nabalil tu'. Meltzojanek yul k'ab Jehová, axa Cham ok yak' yabenc'ulal e yin. Meltzojanektek bay co Diosal, a ok ak'on tan e mul, yujtol yelxac'al watx' c'ul Cham.

8 Axca ti' yalon Jehová: A tzet chin na', man lajanok axca tzet che na' ayex ti', c'al tzet chi wunej, man lajanok axca tzet che yunej.

9 Axca wal satcan, najat ay aj bay yiban tx'otx' tx'otx' ti', axca wal tu' yayji oc in nabal, c'al tzet chi wunej, yelxac'al miman yayji yintak e yet.

10 A yaxnab, c'al sakbacom chi aytek bay satcan, man toc'alok chi meltzoji, palta tol chi ch'acay el tx'otx' yuj, xan chi ajol masanil sat awoj ayay bay tx'otx', yet watx' chi yak' inat yet chi je' yawlay junelxa, chi yak'on c'apax is lobej eb anima.

11 Axca c'apax tu' in k'anej, man ok meltzoj ayin yin tol c'am tzet ok watx'nej, palta tol ok yi ba yuj, axca chi wochej.

- 12 Yin tzaloje'ulal ok yun e yel bay ayex ec' yin presoal, yin junc'ulalil ok ex meltzoy bay e conobal. Masanil witzlak, tzalanlak, yetok te te', c'al yetok masanil tzetak yetal ay e cawilal, axca tol caw wal ok tzaloj aj masanil e yuj.
- 13 A te k'uk'taj ok ch'ibaj q'uexelok te q'uix, axa te arrayán ok ch'ib c'apax aj q'uexelok an cak q'uix. A juntzan ti' ok wun yuj in mimanbilal, yuj in nalaytek yin tojbalk'inal, xi Jehová.

Paktzebal bay mac chi iken is trato Dios

- 56** ¹ Axca ti' yalon Jehová: Beybalnejek wal tojolal, asannej watx'ilal che yunej, yujtol janic'xanej cax ok wak'on e bekbaniilal. Yin aymanil ok in tx'ox wal in mayk'ak'al yin in colwaji.
- ² Caw wal tzaloje'ulal yet eb anima chi yikej juntzan chekbanilej ti' yin bayc'al ijanil, tol miman yelapnok c'ual xewilal yul sat, c'am chi yetnejtok. Tol chi taynej wal ba, c'am wal junok yobtakilal chi yunej, xi Cham.
- ³ Ta a junok tx'ok conobal chi yaoc ba yul in k'ab, c'am jabok tzet chi yal axca ti': A wal Jehová c'am chin is chaoc yin ayilal xol is conob, man xiok. C'am c'apax chi je' yalon eb winak ibil el yetbeyom is winakil axca ti': Ayin ti' lajan in axca junok takin te', man xiok.
- ⁴ Ayin caw Jehová in chi wal axca ti': Tatol miman yelapnok c'ual xewilal yul sat eb winak man tz'akanok is mimanil tu', cax chi yiken eb tzet chi wochej, chi yaon wal oc eb in trato yin is c'ul,
- ⁵ a watx'ilal ok wak' bay eb, ec'ban yelapnok yintak c'ajolej c'al cutz'inej. C'am yechel ok c'ayil binaj eb bay in templo, c'al xol in conob. C'am bak'in ok jolayc'ay is bi eb tu'.
- ⁶ Chi wal c'apax bay eb tx'ok conobal chi yaoc ba yul in k'ab, yuj in yak'on serbil, c'al yoc eb yin ayilal ayin yin came'ulal, ta man ok yetnej el eb in c'ual xewilal, cax tec'an wal ok yut ba eb yin in trato,
- ⁷ ayin ok witek eb bay jun in tzalan ti', cax ok wak'on wal tzalojbok c'ul eb bay nail bay chi oc txaj ayin. A is xajanbal, c'al is yofrenda eb ok in cha bay eb yiban waltar ti', yujtol a in templo ti', ok al-lay yin tol nail txaj yayji yuj masanil conoblak.
- ⁸ Ayin Jehová Yajaw in chi wal bay eb israel wajanxa ec' wuj: Aytoc'al juntzanxa eb man yetbiok ba e yetok, ok in wajbaj oc eb e yetok quin chi, xi Cham.

Is job nabalil eb yajawil conob

- ⁹ Titokab conoblak axca no chiwajwom no'. Titokab eb axca chi yun tit no chiwajwom no' ay xolak te' yuj chilay aytok no calnel.

10 Yujtol a eb taynemal in conob, axca tol c'amxa chi ilwi eb, c'amxa jabok chi je' nachaj el yuj eb, lajan wal eb axca junok tx'i' tol c'am chi chiwaji. Asan tol telanc'al aj eb chi ec' c'u. Asan wayan chi yochej eb chi yunej.

11 Lajan eb axca tx'i' ayc'al wajil, c'am yechel chi noj c'ul eb. A eb yilomal in conob tu', c'am jabok chi nachaj el yuj eb. Asanc'al tzet chi yochej c'ul eb, a' chi say eb.

12 Chi yalon eb axca ti': Tonek co say vino, a wal an caw wal ow ok juq'uej, cax chon uc'wic'al an; ac'ala' axca tu' chi jun pax yet yecal yab axca ti', ma xin yelxac'al ok ec' yiban juq'uen yecal tu', xi eb.

57 1 A yet chi cam eb anima watx' nabal, tokwal ay mac chi oc il yuj eb. A eb watx'c'ul, toc'al chi c'ayaj eb. Tok ayto mac chi nachaj el jabok yuj, tol a yet chi cam eb, c'amxa yalon yet eb yin yailal.

2 A eb asan watx'ilal max beybalnej, chi xew eb yuj camich, cax chi apni eb bay c'amxa bilc'ulal.

Ay yowal c'ul Dios yin ayilal bay yechelej

3 Axca ti' yalon Jehová: Titanek ayin yet watx' chex in beyc'ulnej ex yobtakwom, lajan e beybal yetok eb tz'akan ay c'ul, yetok eb ajmul winak, c'al eb ajmul ix.

4 ¿Mac yin chex buchwaj ayex ti'? ¿Mac yin chex etz'waji? Ayex ti' tenomtak ex, lek'ti' ex.

5 A bay yichlak te ji' bay xiwil xak te', a wal bay tu' che yun ajmulal yuj e yion can e diosal, cax che yak'on eb e yuninal yin xajanbalil xolak ch'en ch'en bay tilak aej.

6 Chi yal Jehová: A wal ayex ti' ex aj Israel, caw wal chi cha e c'ul chex oc yin ayilal bay ch'en ch'en ay yulak aej. A juntzan tu' max e sic'can el e diosalok. A wal bay che secay vino yin xajanbalil, c'al e yak'on masanil satlak awoj bay, ¿chi tom laj e na' tol okto ex wak' mimanc'ulal?

7 A bay jun witz caw wal can ayaj is tel, a tu' che watx'nej e wayub, a bay tu' chex aj c'apaxtok e yak'on e xajanbal.

8 A bay yetc'ulal e puerta, a tu' che yaoctok e diosal yajbejtak. A pax ayin xin, chin tojcan c'ayc'ulal e yuj. Che t'irban el e ba bay tu', chex ay telan bay jun e miman tx'at. Che yak'on e trato yetok eb nak winak chi yochej e c'ul chi yun mul e yetok tu', cax chex oc t'anan yin is winakil eb nak tu'.

9 Che bon e ba yetok aceite c'al perfume, cax chex toj lemnaj bay jun yechelej chi yik Mélec. Che chektok eb e chekbej najat, yet chi toj saylaytek juntzanokxa e diosal. Toltax che yak' sayic' eb xol pixan eb camnak.

10 Toxac'al chex c'unbi aj yuj chex toj najat, palta c'am wal jabok chi nachaj el e yuj, tatol c'am jabok yopiso tzet che yun tu'. Chi ilchaj e yuj tzet chi yun e yion e yip junelxa, xan c'am chi ispay el e yuj.

- ¹¹ ¿Mactxel juntzan dios bay chex xiwi, c'al miman yelapnok yul e sat tu', tol max quin e bekcanok, xan chin tojcan c'ayc'ulal e yuj? ¿A mi yujtol ayxa tiempoal c'am tzet chi wala', xan c'amxa welapnok yul e sat?
- ¹² Axa tinani' ok in tx'oxil juntzan e beybal, tol caw wal watx' e naoni. C'am tzet ok e yi' yin juntzan e diosal max e watx'nej tu'.
- ¹³ A yet ok el e yaw e k'anon colwal, colwajokab jun bulan e diosal tu' e yetok. A masanil juntzan tu', toxac'al ok xulay bey eb yuj cak'ek'. Toc'al ok xulay c'ayaj eb. Axa pax mactxel chi yaoc c'ul win xin, ok cajayc'al ec' bay jun conob ti', cax ok ayjokc'al ec' bay in tzalan bay chi oc ayilal ayin, xi Jehová.

Mimanc'ulnebilal eb chi na ba c'ul

- ¹⁴ Ok ablay yal-lay axca ti': Watx'nejek junok be, caw wal panan che yutej, iek el tzetak yetal ayoc yul, yet watx' chi ec'tok in conob, xi.
- ¹⁵ Yujtol a Cham Axac'al Ocok, Cham tol iquisc'al ec' yin tojbalk'inal, a ton Cham chi yik Asanxanej Ocok, a chi alon axca ti': Ayin ti', cajan in bay yelxac'al can ayajok tol wet yayji ocok; palta ayin c'apax ec' yetok eb tol yaynakil chi yut ba, a ton eb chi na ba c'ul; cax chi wak' is tec'anil eb.
- ¹⁶ Manxa owok in bay in conob ti', tamwal tol ow inc'al yin, talaj chi cabax aj c'ul eb anima ti' win, tol ayin max in watx'nej eb.
- ¹⁷ A yuj is mul Israel tol asan yet yul yet chi saya', xan ow in yin jun tiempoal. Max waoc yailal yiban, max in bekoncanok, palta max pitnejxac'al ba yin tojxac'al bay chi yochej c'ul.
- ¹⁸ Max cam wal wilon is beybal, palta xin, ok wantej. Ok wikbaj cax ok in mimanc'ulnen eb chi cusc'ul yuj is yobtakil.
- ¹⁹ Cay wal tu' ok yun yalon eb watx' k'anej ayin. Ok walon axca ti': Ayokab e junc'ulal mac ex najat ayex ec'ok, yetokc'al mac ex cawil ayex, quin chi. Ayin ok wantej in conob, quin chi.
- ²⁰ A pax eb yobtakwom xin, lajan wal eb axca wal chi yun yaj wan sat a' mar, tol c'amxa chi je' yoc wanajok, cax chi yionc'altek jantak tzet yetal tz'iltak.
- ²¹ A eb yobtakwom, c'am jabok watx'il yet eb, xi in Diosal.

A caw c'ajbanc'ulal

- 58** ¹Max yalon Jehová ayin axca ti': Awjan yetok masanil ep, c'am chi aytek yul a nuk', che wal aj can yul a nuk', axca wal yok' junok trompeta. Ak' yojtaknej el in conob, a ton eb yinatil Jacob, is tenomtakilal.
- ²Chi occ'al eb ayilal ayin junjun c'u. Chi yalon eb tol xiwil chi yochej eb chi yojtaknej el in beybal, c'al yiken eb in ley. Chi yalon eb, tol chi yochej eb chin oc yetok eb yin in beyc'ulal yin tojolal, ay wal tzalojc'ulal eb yoc ayilal ayin yaloni.

- 3 Yuj tu' xan chi yal eb ayin: Nabac'al chon oc yin c'ajbanc'ulal, palta c'am chon ela'. Nabac'al chi jiay co ba, palta c'am jelapnok yul a sat, xi eb. Yel toni, yujtol a yet c'ual c'ajbanc'ulal, yelc'ulal che yun tzet chi cha e c'ul, c'al e yetnen eb anima chi mulnaj ayex.
- 4 A yet c'ual c'ajbanc'ulal, axa teyelejbaile c'al owal che yunej, cax yelc'ulal tol che mak'lejtaj e ba yin yobc'ulalil. ¿Chim e na tol ok in cha' e txaj yin e yoc yin e c'ajbanc'ulal axca tu'?
- 5 A yet ayex oc yin c'ajbanc'ulal tu', ayexc'al oc che yetnej e c'ul, toxac'al chi ay coxan e nuk' axca junok te aj, chex ay telan yiban coxtal, cax nojnak el yiban yuj tik'ak'il tan. ¿Tom a wal juntzan tu' e c'ual c'ajbanc'ulalil ayex ti'? ¿Chi mi e na' tol ok cha' in c'ul juntzan tu'?
- 6 Palta man watx'ok axca tu'. A jun c'ajbanc'ulal tol chi cha in c'ul ayin ti', yowalil tol axca ti' che yunej: Tol che yiel c'albanilej ayoc yin eb chi etaxi, c'amxa che yaoc mulnajil man axcaok leyalil yiban eb anima, che bekon el eb ayoc yin etnejc'ulal.
- 7 Che pojon c'apax ec' e lobej yetok eb ay is wajil; a eb c'am yatut, che yak' posada eb bay e na, che pichon eb c'am is pichil, cax c'amc'al che bek e mimanc'ulnen eb e yetconob.
- 8 Ta axca tu' che yunej, a in watx'c'ulal ok tx'oxil ba e yin yin aymanil, axca chi yun k'inibi ajok. Yin aymanil ok e yi' e cawil. Ayin ton e tojolal wayji, babel in toj e satak; axa in mayk'ak'al tzakan oc e yintak ex tayneni.
- 9 A yet chex awji ayin, ok in tak'wok ayex, a yet che k'anon in colwal: Tix inc'al ti', quin chi. Tatol che c'aycan el masanil etnewomal, c'amxa che tx'em junokxa mactxel, tamwal che naaj k'anej yin e yet animail,
- 10 tatol che yak' e ba yin e yak'on serbil eb ay is wajil, cax chex colwaj bay eb ayoc yin majilal, a k'ekk'inal ayoc e yinlak, ok yut ba yin sakk'inalil axca yet chuman c'u.
- 11 Ayin ok ex wikbajc'al beyok. Xiwilc'al loj ok wak' ayex, caxc'al a bay takin tx'otx'. Ok wak'on yipalil e mimanil, lajan wal ok e yun axca wal junok awoj tol ayc'al oc yal. Lajan ex axca junok aej tol chi ajol nuk', tol c'amc'al chi tani.
- 12 Ok e ca watx'nej aj e conob uchbil ay yettax payxa, a ton yiban yich watx'nebil yettaxc'al payxa tu'. Ok al-lay e yin tol ca watx'nem ex aj muralla c'al na tilak calle.

K'anej yin c'ual xewilal

- 13 Tatol che na' tol a c'ual xewilal wet yayji e yuj, xan c'am che watx'nej e tzet yetal yul e yet yet jun c'ual tu', ta chex tzaloji, yujc'al ay yelapnok jun c'ual wet yayji tu' yul e sat, xan c'am chex toj yin junok viaje, ma e watx'nen tzet yetal chi yochej e c'ul, tamwal che yal k'anej c'am yelapnok,
- 14 ta axca tu' ok e yunej, ok ilchaj tzalojc'ulalil e yuj win. Ayin ok ex wut yin tol ay e yelapnok bay yulyibank'inal, cax ok wak'on

tzalobjbok e c'ul yin tx'otx' tx'otx' max e cha e satakok yuj e yichmam Jacob. Ayin Jehová in chi wak' in ti' yin jun ti', ãi Cham.

Is yailal Israel yuj is yobtakil

- 59** ¹ Tokwal c'amxa yipalil Jehová colwaji, tokwal mayal chacanbi, xan c'amxa chi yab e tewilal.
- ² Palta a e yobtakil ayoc e nan e xol yetok Dios, a e mul tu' chi oc jenan e nan e xol yetok Cham, yuj tu' xan c'amxa chi yochej Cham chi tak'wi ayex.
- ³ Yujtol bacan chic'takxac'al e k'ab yuj e mak'om cam animail, c'al yuj e yak'on yasjok anima. Asanxanej lek'tial c'al yobtakil che yala'.
- ⁴ C'am junok ex che watx'nej el junok e k'anej bay juzgado yin tojolal. Tokwal che watx'nej yin bayc'al ijanil. Che na wal tzet chi yun e yak'on ayc'ay eb yetok k'anej c'am yelapnok, c'al lek'tial. Che na e yak'on yobc'ulalil, cax che yunenxac'al.
- ⁵ A wal tzet che na' e yunen tu', lajan wal axca jos no bakne labaj, yujtol a junok mac chi loon juntzan jos tu', tojolc'al cami. A yet chi mak'lay poj no jos tu', labajxa chi elol yul.
- ⁶ Axa tzet che na yuj yoc e watx'ilok yul e yet, lajan wal axca tx'anil yal ti' no xim, tokwal chi je' watx'nelay juntzan tu' yin pichilejal yuj yoc e makilok. Asanc'al yobtakil, mak'wal, c'al elk'an che yunej.
- ⁷ Jun wal bek chex toj lemnaj yin yobtakil, yin aymanil chex toj e mak'on cam eb c'am is mul. Asan yin yobtakil ayoc e nabal, tzanc'al bay chex eq'ui che yetnejcantok, c'al e yak'on lajwok ay tzetak yetal.
- ⁸ Asanc'al owal che yunej, c'am jabok tojolal yin e beybal. Junelnej tol man watx'ok e beybal. A mactxel chi tzakloj e yintak, c'am jabok junc'ulal chi yi eb.
- ⁹ Axca ti' yalon eb conob: A wal tinani' chi nachaj el juj, tzet yuj xan c'am chon col-lay el yuj Dios bay eb chon etneni. Chito wal jechbanej sakk'inal; palta c'amc'al, asanxanej k'ekk'inal ayoc jinlak. Chitoc'al jechbanej co bekbanilal, palta ac'ala' jetaxi.
- ¹⁰ Toxac'al chi co matxtenej ec' co ba bay chon eq'ui, axca wal yet tol c'am co sat. Chuman wal c'u chon telc'ojtok, axca wal tol ak'balil. Axcaxac'al eb toxa chi cami, axcaxac'al tu' jayji xol eb conob tec'an waayi.
- ¹¹ Ay bay chi tit jowal axca no oso, cax axa pax yet jun bek xin, chon k'akwi axca no paloma. Chi jechbanejc'al colbanilej, palta c'amc'al chi jayi. Chi jechbanejc'al co bekbanilal, palta c'am bak'in ok on bekchajok.
- ¹² Mamin Jehová, yelxac'al max jaoc co mul ayach. A yuj co mul tu' xan max titcan jiban. A tzetak max jun tu', c'am chi toj c'ayc'ulal juj, cax jojtak wal jantak yayji oc co mul on.

- 13 Caw wal tenomtak on ayach, tokwal chi jochej chon tzakloj entak, ach co Diosal. Caw wal chi jaoc yailal yin jet animail, tenomtak on ayach. Asannej wal yin etnej anima ayon oc yetok co k'anej.
- 14 A beyc'ulal yin tojolal c'amxa yopiso juj. A wal k'anej yel, tokwal chi chalay ablay bay juzgado. A bay tu', c'am yelapnok bayc'al ijanilal.
- 15 A watx' beybalejal mayal c'ayajok, axa mac c'am chi yun yobtakil, c'amxa chi col-lay yuj ley, xi eb conob. Chi yil wal Jehová juntzan ti', caw wal c'am chi cha c'ul Cham tol c'am chi beyc'ulnelay yin tojolal.
- 16 Toxac'al chi c'aycan aj c'ul Cham, yujtol c'amxa junok chi colon eb chi etaxi. Yuj tu' a wal caw Cham ok yaoc ba watx'nen elok. Yetok wal yipalil ok colwajok.
- 17 Ok watx'nej ba Cham axca junok soldado chi toj yin owal. A is tojolal Cham, axca ch'en makil txamc'ulej yayji. Axa colbanilej, lajan wal axca ch'en toctor. Axca jayoc junok soldado ayoc pichilej yet owal yuj, axca tu' ok yun jay Jehová yetok yowal is c'ul, yuj paktzen yuj eb chi etaxi.
- 18 A ok paktzen bay junjun, atac'ala' is yunben; ok ya wal oc yailal eb ajc'ul oc yin. A bay mac chi chichon oc c'ul yin, ok paktzej wal bay axca wal is mojalil, mawal eb conoblak cajan bay junxa k'axepal a' mar.
- 19 Masanil eb anima bay yulyibank'inal bay yichcan, masantac'al bay yayubc'u, caw wal miman yelapnok Jehová yul sat eb, yet ok yilon oc eb yin is mayk'ak'al. Yujtol ok jay Cham, axca wal junok elom aej tol chi xulaytek yuj caxxuchum cak'ek'.
- 20 A wal caw Jehová chi aloni tol ok jayoc Cham, cax ok yak'on is bekbaniilal conob Sión, a ton eb yinatil Jacob tol chi na ba c'ul yin is yobtakil.
- 21 Axca ti' yalon Jehová: Tix in trato chin watx'nej e yetok ti' cax chi wak'on in ti' yin. A Wespíritu ayoc e yin, c'al in cuybej max wak' ayex, c'amxa yechel ok el e yin, tamwal yin eb e yinatil yin tojbalk'inal, xi Cham.

Is mimanbilal Jerusalén yet yajtok tu'

- 60** 1 Axca ti' yalon Jehová: Ex aj Jerusalén, ajanek wanok, caw watx' e yet yujtol a in tzekekial ayoc e yiban.
- 2 A juntzanxa nación, ok makaycantok yuj k'ekk'inal, axa ayin Jehová in ok ex in tzektanej, caw wal miman txequel in tzekekial e yin.
- 3 A juntzanxa nacionlak tu', ok jayoc eb bay sakk'inal tu', yetokc'al eb rey, ok jayoc eb ul yilon e tzekekial lanan txecloj tu'.
- 4 Ajanek t'ananok, cax che yilon bay e yinlak. Masanil eb e yet conob, chi wajbaj ba eb, cax chi jayoc eb ayex, axa eb e c'ajol ok tit eb bay najat, c'al eb e cutz'in, lacbil ok yun tit eb.
- 5 A wal yet ok e yilon axca tu', caw wal ay e miman tzalojc'ulal, caw wal ok ex aj can yin tzalojc'ulal. Ok yitek eb ayex jantak beyomal nacionlak; toltax juntzan nación bay k'axepal a' mar, ok yi c'apaxtek is beyomal.

- ⁶ Ok nojcan el masanil sat e tx'otx' ti' yuj no camello chi tit bay Madián c'al bay Efa. Ok jay c'apax oc masanil eb aj Sabá, ibil oc oro c'al incienso yuj eb, cax ok yalon el eb yabixal wunben c'ayubtaxac'al yoqui.
- ⁷ Masanil no calnel ay bay Cedar, e yet ok yuncan no'. Yetokc'al masanil no' ay bay Nebaiot, ocokab yopiso no' e yuj yet che yak'on no' yin xajanbalil ayin, yin ofrenda tol chabejtak. Ok wut axca tu' yuj yilay aj can in templo.
- ⁸ ¿Tzet yetal juntzan axcaxac'al asun chi ec' tu', axcaxac'al toj no paloma bay is wayub?
- ⁹ A juntzan tu', barco chi tit bay k'axepal a' mar, babel juntzan chi tit bay Tarsis. Chin yaoc juntzan nacionlak tu' yipok c'ul, yuj tu' ibilxa oc eb e yuninal yuj eb, yetok oro c'al plata, yuj wilay aj can ayin Jehová e Diosal in, tol Asanxanej in Ocok, yujtol ayin ok wak' e mimanbilal.
- ¹⁰ A anima tx'ok conobal, a ok ca watx'nen aj e muralla; axa eb rey ok ex ak'on serbil. Caxc'al max wak' yailal e yin yetok yowal in c'ul, axa tinani' xin, yetok wal in camc'ulal chi cusoc in c'ul e yin.
- ¹¹ A puertalak e conob ok canc'al jakanok. Manc'al ok makay yet c'ualil c'al ak'balil, yet chi je' yilaytek is beyomal nacionlak ayex, yetokc'al eb is reyal.
- ¹² A juntzan nacionlak tol man ok ex ak'on serbil, ok ak'lay lajwok elok.
- ¹³ A jantak watx'ilal ay bay Líbano ok ilaytek ayex: te taj, te k'uk'taj, c'al yetok te q'uisis, yet ok oc is watx'jubalok yili in templo, axca tu' caw mimanbil ok wut bay ok in ayjok.
- ¹⁴ A masanil jantak is yinatil eb max ex etneni, ok jayoc eb yin ayilal ayex. Masanil eb max ex intaknen elok, ok jayoc eb yin ul yay jajan ayex, cax ok yalon eb e yin tol in conob ex ayin Jehová in ti'; ok yal eb tol aj Sión in conob, ayin e Diosal tol Asanxanej in Ocok.
- ¹⁵ C'amxa yechel ok ex can e tx'oklil c'al yak'lay yobc'ulalil e yin, palta tol ok wak' in watx'c'ulalil ayex yin tojbalk'inal, cax c'amxa lajubal tzalojc'ulal.
- ¹⁶ A nacionlak, yetokc'al eb is reyal ok ex ak'on serbil, axca wal chi yun yak'on serbil junok ix txutxex yune'. Yuj tu' ok nachaj el e yuj tol ayin Jehová e Diosal in, c'al e Colomal in. Tol ayin, ayin oc yipomalok Jacob, ayin chi wak' e bekbamil.
- ¹⁷ A oro ok wak' q'uexelok bronce, axa plata ok wak' q'uexelok hierro. A bronce ok wak' q'uexelok te te', axa hierro ok wak' q'uexelok comon ch'en. Manxa ok ex etax yuj eb e yajawil, yujtol ok wak' yajawbok eb yin tojolal c'al yin junc'ulal.
- ¹⁸ A bay e tx'otx'al tu', c'amxac'al bay ok ablay k'umal mak'lay cam anima. C'amxa mactxel ok uchwajok, c'al yuchon lajwok yul e

makbej ti'. A colbanilej chi wak'a', a ton wal jun tu' a caw e muralla yayji ocok, axa e mimanbilal chi wak'a', a wal caw ayoc e puertaok.

¹⁹ A yet tu', manxa yowalilok tol a yakan c'u ok ex tzektanen yet c'ualil, tamwal tol ato yakan xajaw ok ex tzektanen yet ak'balil, yujtol ayin Jehová in, e sakk'inal wayji yin tojbalk'inal. Ayin e Diosal in ok ex wiaj can.

²⁰ Man ok lajwok e sakk'inal; ok oc yopiso e yuj q'uexelok yakan c'u c'al xajaw, tamwal ok ay tananok, yujtol ayin Jehová in, e sakk'inal wayji yin tojbalk'inal. A yet tu', a tiempoal yet ayex oc yin cusc'ulal, ok lajwokcan ec'ok.

²¹ Masanil anima cajan bay e conob ti', watx'xac'al ok yun is nabal eb, yet-xac'al eb yayji e nación ti' yin tojbalk'inal. Lajan wal eb axca yajol junok awoj tol ayin wal caw max wawa'; a jun mulnajil tu', ayin wal caw max in watx'nej yuj wilay can.

²² A jun makan anima txennej bisil e xol ti', ok aj can is bisil eb, caw wal tec'an ok yun eb axca junok nación. A yet ok apnok tiempoal, ayin wal caw Jehová in ok wak' yun juntzan ti' yin aymanil, xi Cham.

Max al-lay el yabixal colbanil Israel

61 ¹ A Yespíritu Jehová Cham Yajaw ayoc win, a Cham max quin sic'on elok. Max in cheklaytek yuj, yet chi ul walcan el watx' abix bay eb meba', c'al ul wak'on watx'jok c'ul eb ayoc yin yailal, c'al walon el bekbanilej bay eb ibiltok yin mosejal, c'al bekchaj el eb preso yayji,

² c'al walon elok tol mayal jay c'ual jun colbanilej chi yak' Jehová co Diosal, c'al c'ual paktzen bay eb ajc'ul is yobc'ulalil eb. Max in cheklaytek yuj yet chi ul in mimanc'ulnej eb ayoc yin cusc'ulal,

³ yet chi ul wak' bay eb ayoc yin cusc'ulal bay Sión jun corona watx' yili, is q'uexelok tik'ak'il tan chi yajtok eb yin is jolom, c'al tzalojc'ulal q'uexelok ok'il; axa bit yet aloj watx' k'anej chi occan q'uexelok bilc'ulal. Lajan ok yun eb axca junok te ji' tol a wal caw Jehová max awoni. Ok yun eb tojolal yuj yilay aj can Cham.

⁴ Ok ca watx'nej aj eb juntzan conob uchchajnaktok yettax yalantok.

⁵ Ex wet conob, a eb tx'ok conobal ok taynen e calnel, c'al e yawoj uva.

⁶ Axa ayex ti' ok e yik sacerdote yet Jehová yuj eb, chekbej ex Cham co Diosal. Ok tzalojbok e c'ul yetok is beyomal juntzanxa nacionlak, watx'xac'al e yili yuj tzet yetal watx' yili ay bay eb.

⁷ Ayex ti', tz'akanxac'al max yun e yaben yail q'uixwilal c'al e buchlayi; palta axa tinani' xin, tz'akan ok yun e chaon beyomal bay yin e tx'otx', c'amxa lajubal e tzalojc'ulal.

⁸ Yujtol a wal tojolal chi yochej Jehová, caw wal ow yin elk'an c'al yin etnej anima, xan caw wal watx' ok yun paktzen ayex yuj bay max ex etaxi, cax ok watx'nen jun trato e yetok yin tojbalk'inal.

⁹ Caw wal miman ok yun binaj e yinatil xol masanil nacionlak. A masanil mactxel ok ex ilonok, a eb tu' ok nachaj el yuj eb tol a Jehová chi ak'on watx'c'ulalil ayex.

¹⁰ Caw wal max yak' Jehová tzalobjok aj in c'ul, caw wal chi aj can in tzalobjc'ulal yuj in Diosal, yujtol caw wal watx' max in yut yetok colbanilej c'al tojolal, axca chi yun watx'nen ba junok nak ach'ej, ma junok ix k'opoj yet chi toj nupayok.

¹¹ Axca wal tx'otx' tx'otx' bay awbil awoj bay chi yak' ajol tx'otx' inat awbil bay, axca wal tu' ok yun yak'on txecloj aj Jehová Cham Yajaw is tojolal satak nacionlak, yuj yilay aj can Cham.

62 ¹ Axca ti' yalon Jehová: Yuj wal in camc'ulal e yin ex aj Sión, xan man ok in tz'injok. Yuj wal in camc'ulal e yin, ex aj Jerusalén, xan manc'al ok in xewok, masantac'al tol ok txecloj aj e tojolal, axca wal yet chi sakbi; axa e colbanil, ok txecloj aj axca wal chaw junok tzeztebalej.

² A masanil nacionlak ok yil wal eb e colbanil tu', masanil eb rey ok ilon e yibalcanilal, yuj tu' ok oc junxa ac' biej e yin, tol ayin caw Jehová in ok wak' ayex.

³ Ayex ti', lajan ex wal axca junok corona manxa watx'ilok yuj wilay aj can.

⁴ Manxac'al okto e yik Conob Bekbilcanok, tamwal e makbej okto yik Uchbiltok, palta tol ok e yik: Ochebil yuj Dios. Axa e tx'otx'al ok yikcan: Ayxa Yajaw, yujtol ochebil ex wuj. Ok in oc yajawilok e tx'otx'al.

⁵ Axca wal junok ach'ej chi nupay yetok ix k'opoj, tol ayxa is trato yetok, caywal tu' ok wun e yetok ayin e Watx'nemal in ti'; ok in oc e yajawilok cax ok wak'on tzalobjok in c'ul e yetok, axca wal tzalobji c'ul nak tolto chi nupay yetok yistzil.

⁶ Ex aj Jerusalén, a bay e muralla max wacan oc eb nak chi tayneni. Manc'al ok bek in yawten eb yet c'ualil c'al yet ak'balil. A mac ex chin e yawtej, manchak ex tz'inji,

⁷ c'amc'al chin e yak' xew yin quin e yawteni masantac'al ok yal yion ba watx'ji aj Jerusalén wuj, yetok c'apaxok, masantac'al ok al-lay watx' k'anej yin bay masanil yulyibank'inal, xi Cham.

⁸ A Jehová mayal yak' is ti', ok yak'c'alta' yun yuj is yipalil: C'amxa yechel tol okto in cha loaytok eb ajc'ul e trigo, tamwal eb tx'ok conobal ok uq'uen aytok e vino, juntzan tol ayex wal caw max ex mulnaj oc yin e watx'neni.

⁹ Palta tol ayex wal caw ok e wajbaj aj sat e yawoj, cax ok e looni, cax ok e yalon watx' k'anej ayin. Ok e wajon c'apax sat e yuva; ayex wal caw ok e yuc' e vino bay yul yamak'il in templo, xi Cham.

- ¹⁰ Ex aj Jerusalén, elanektok bay yulak puerta, watx'nejek be satak eb e yet conob. Watx' chi yun e yak'on pananbok bay jobquiltak, watx' chi yun e yion el ch'en ch'en yul be. Iek aj an bandera yuj yilon nacionlak.
- ¹¹ A Jehová ok yal bay masanil yulyibank'inal: Alek bay eb aj Jerusalén, tol chi jayoc is Colomal eb, ibil oc yuj tzet max yi' q'uexelok is mulnajil, quex chi, xi Cham.
- ¹² A eb Israel ok ak'lay yik eb conob Dios, a ton eb mayal bekchajcan el yuj Jehová. Axa Jerusalén xin, ok yik Conob Ochebil, C'amxa Yechel Ok Beklaycanok, caytu' yoc is bi.

Paktzebal Jehová bay eb ajc'ul

63 ¹—¿Mactxel jun chi tit bay miman conob Bosra, bay yul makbej Edom, tol ayoc cak pichilej ayxamay yili yuj, cax ayxa may tita? Chi tak'wi Cham axca ti':

—Ayin Jehová in chin jayi, ay wipalil in colwaji. Chi walon c'apaxok, tol tiempoxa yoc beyc'ulal yin bayc'al ijanilal, xi Cham.

²—¿Tzet yuj xan cak yili a pichil, axcaxac'al tol max ach tec'wi uva? quin chi bay Cham.

³Max yaloni:

—A yuj max in tec'ay nacionlak axca tec'lay uva, palta asannej in, tokwal ay mac max colwaj wetok. Ay waltek wowal max in tec'on ay eb wajc'ul, max in tec' wal ay eb yuj wowal, xan max aj xit'labok is chiq'uil eb win, yuj tu' xan max chic'bitok in pichil ti'.

⁴Yujtol max in nabalnej elok tol mayal jay c'ual in colon el in conob, c'al in paktzen is yobc'ulal eb ajc'ul.

⁵Max ec'c'al in sat wiloni, ta ay mac chi colwaj wetok. Palta toxac'al max c'ayaj in c'ul, yujtol c'am mactxel max oc wetok. Yuj tu' xan a wowal max iptzen wipalil, xan max je' wuj in tx'oklil in colon in conob.

⁶Yetok wal wowal max in tec'on ay masanil nacionlak, max wak'on lajwok eb yetok yowal in c'ul, max el wal nuk' chiq'uil eb wuj bay sat tx'otx', xi Jehová.

Is watx'c'ulal Dios bay Israel

⁷Chi wochej chi walil is camc'ulalil Jehová, tol ok in bitnej jantak tzet max yun Cham juj. Caw wal miman is camc'ulal jin, ayon yinatil Israel on ti'. C'am yalbanil tzet max yun Cham jin yuj is watx'c'ulal c'al is miman camc'ulal.

⁸Max yalon Cham axca ti': A juntzan eb ti', in conob eb, wuninal eb, c'am chi je' yak'on tac eb ti' ayin, xi Cham, xan max col-lay el eb yuj.

⁹A yin masanil is yailal eb, a c'apax jun Cham max yab yail, a wal caw Cham max tx'oxaj ba axca ángel yin colon el eb. Yuj is

- camc'ulal c'al yabenc'ulal, xan max col-lay el eb yuj. Max yi aj wan eb, max oc lak'an yin eb, yettaxc'al max beytek.
- 10 Palta yelxac'al pit max yut ba eb bay Jehová. Max yak' cus eb is Yespíritu tol Asanxanej Oco. Yuj tu' xan max oc pax Cham ajc'ulal yin eb, cax max oc owal.
- 11 Lajwi tu', max naontek eb conob juntzan tzet max uj yettaxc'al payxa, yul tiempoal Moisés is chekbej Jehová. Xan max k'anlej ec' eb: ¿Baytal ay Jehová tinani', Cham max on colon el bay a' mar, yetok eb jilomal? ¿Baytal ay Cham max yaoc is Yespíritu tol Asanxanej oco co nan co xol?
- 12 A ton Cham ayc'al oc yipalil yetok Moisés. A Cham max pojón ay nan a' mar co satak, yuj is mimanbilal yin tojbalk'inal.
- 13 Max yion ec'tok is conob bay nan xol a' aej. Majc'al telc'oj eb axcac'al yec' no chej bay ac'al,
- 14 axca chi yun yilay aytok no wacax bay junok ac'al, xi eb. Caytu' max yun yak'lay xewilal eb yuj Yespíritu Jehová. Max ikbelay eb yuj yet watx' chi binaj Cham yin watx'il.

Txaj bay Dios yuj k'anlay is colwal

- 15 Chi yal conob Israel: Watx' elontek Mamin Jehová bay a lugar etc'alta' yayji oco, manxa watx'ilok yili bay ayach ec' satcan tu'. ¿Baytal ayoc a camc'ulal, c'al epalil tu xin? ¿Baytal ay a yabenc'ulal tu'? ¿Tom mayal lajwi a mimanc'ulal jin on xin?
- 16 Ach ti', co Mam ach. Caxc'al man ojtakbilok on el yuj Abraham, tamwal yuj Israel, toc'alta' co Mam ach cax chon a colc'alta'a.
- 17 ¿Tzet wal yuj xan chon ecan el yul a be xin Mamin, cax chak'on pitbok el co nabal yet c'amxa elapnok yul co sat? Tx'ox pax a watx'c'ulalil ayon a chekbej on ti', ayon tribual a conob on, tol et jayji on.
- 18 Ayon a conob on sic'bil on el oj ti', caw wal jayebnej ch'an abil max jion jun tx'otx' ti', axa tinani', a eb ajc'ul oc jin on, lanan tec'on ay eb a templo.
- 19 Axcac'al tol c'am bay chach yajawbi jiban, cay wal ti' jayji ec'ok. Axcac'al tol c'am bay max binaji tatol et on.

- 64** ¹ Matawal chi nic'chaj satcan oj cax chach aytek. Matawal chi el yin a c'ul, cax chak'on bil mimek witzlak a satak,
- ² axca chi yun bil yuki aj a' aej yuj k'ak'ej caw wal ow yoqui. Ayantek yet watx' chach yojtaknej el eb ajc'ul oc en, c'al bilaj nacionlak eb tu' a satak.
- ³ A wal yet max onen tzetak yetal tol c'ayubtakxac'al yoqui, tol man naanok el juj, max ach aytek, a juntzan mimek witz max bilaj a satak.
- ⁴ Yettax yichbanil, c'amc'al bay max ablayi, tamwal ay bay max il-layi, tatol ay junokxa dios a satak tol chi yun juntzan tzet yetal chon ti', yet chi oc is watx'ilok eb chi yaoc c'ul en.
- ⁵ Ach ti' cha cha' eb tol watx'c'al tzet chi yun yin tzalojc'ulal, cax naanc'al yuj eb yuneni, axca wal tzet chochej. A tinani', caw wal

ow ach jin on, yujtol max oc co mul on ayach, ayxataxc'al c'oli yoc co yobtakil on ayach. ¿Chi tom wal je' co colchaji?

- 6 Co masanil ayon ti', lajan on yul a sat axca mac man watx'ok, atac'ala' ley. A masanil co watx' unben jaloni, lajan wal yetok junok tz'il k'apej. Yuj wal co yobtakilal on, xan lajan on wal axca takin xak te' chi xulay bey yuj cak'ek'.
- 7 Tok ayto junok on chach jawtej, tamwal chito co natek co k'anon a colwal. Yuj tu' xan max a c'ubaj el a ba ayon, max on a bekoncan yul k'ab co yobtakil.
- 8 Palta ach ti' Mamin Jehová, co Mam achc'alta'a. Ayon ti' tx'otx'ej on, ach max on a tz'aka'; co masanil ach max on a watx'nej.
- 9 Mamin, manokab yelxac'alok chi tit owal jin on. C'amokabxa cha natek jantak co yobtakil on. Ilab wali tol a conob on.
- 10 A wal juntzan a conob et yayji oc ti', mayal occan yin tz'inanil, mayal uchchajtok Jerusalén, c'amxa mac cajan bay.
- 11 Mayal lajwi ay co templo tz'atok, tol et yayji, manxa watx'iloc yili, bay max oc eb jichmam on yin ayilal ayach. Masanil wal juntzan caw wal ochebil juj on, mayal etaxtok.
- 12 A yet chelon masanil jun ti' Mamin Jehová, ¿tom c'am wal jabok tzet ok onej? ¿Tom ok ach ec'xac'al yiban aon oc yailal jiban on?

Queja yin eb pit

65 ¹Max yalon Jehová axca ti': Ay eb c'am chin k'anlen ec'ok, palta max quin ilchaj yuj eb. Yetok c'apax bay eb c'am chi yal ba ayin, max in tx'ox in ba bay eb. Axa max yun xin, a bay eb tol c'am chin k'anlen ec' tu', a tu' max wala': Tix in ti', quin chi.

- ² Masanil tiempo batxanc'altok in k'ab yin wawten jun conob yelxac'al pit, tol lanan tojcan bay yul jun be yelxac'al yob, asanxanej yintak yochwan chi tzakloji,
- ³ tol in satak wali, cax chi yaonc'al oc eb is mul. Yujtol chi yak' wal eb xajanbal bay juntzan tx'ok diosal xolak awoj, cax chi yak'on tz'a eb incienso yiban altar ladrillo ayoc yin.
- ⁴ Tol chi ay chotan eb xol mukbanil camnak. Chi ec' ak'bal yuj eb bay ewantak. Chi chi eb chibejal txitam, cax chi yak'on wal noj eb is sec' yuj yal no chibej tol man watx'ok yayji, atac'ala' ley.
- ⁵ Cax chi yalon eb axca ti': Watx' ayji bay tu', manchak ach oc lacan jin, tol co pojnaxa el co ba on en, xi. A wal juntzan anima tu', lajan wal eb axca junok k'ak'ej c'am chi tani, cax chi tojc'al mubal yul in txam.
- ⁶ Palta a masanil juntzan is yobtakil eb tu', tz'ibc'al yayji in satak, man toc'alok ok wiloc axca tu'. Ok in paktzej wal bay eb axca wal is mojalil.

7 Mawal axca yuj is yobtakil eb, c'al yuj yet is yichmam eb, tol max yak' tz'a eb xajanbal jolomlak witz, cax max oc is mul eb ayin bay tzalanlak. Babel ok in beyc'ulnej eb, cax ok in paktzen bay eb axca wal is mojalil, xi Jehovah.

Chi yak' is ti' Jehovah yin yak'on watx'ilal

- 8 Max yalon Jehovah axca ti': A yet ay yal junok chaan uva, c'am chi yetnej el eb anima jun tu', yujtol ayto watx'il yin chi yil eb. Axca tu' ok wun yuj is watx'ilal eb in chekbej, man ok wak' c'ayil masanil nación.
- 9 Cax ok wak'onc'al ayjok ec' is yinatil Jacob, yet watx' ayc'al anima cajan bay siquial tx'otx' yul yet Judá. A wal eb sic'bil el wuj, ok ayjok eb bay sat in tx'otx', c'al eb in chekbej ok cajay ec' eb bay tu'.
- 10 Caw wal ok nojil bay jobeal yet Sarón yuj calnel, c'al bay jobeal yet Acor, ok low no wacax, a ton bay is jobbejal no' jun conob ok oc ayilal ayin.
- 11 Palta man cayok tu' ok yun ayex, mac ex tol che pojcan el e ba wintak, cax chi tojcan c'ayc'ulal e yuj jun tzalan bay chi oc ayilal ayin, axac'al bay juntzan dios chi nabalnen tzet ok on junjun anima e yaloni, a ton Gad c'al Meni, a bay juntzan tu', che yak' loj, c'al vino yin xajanbalil.
- 12 Palta ayin chin nabalnej pax el tzet ok ex onok, tol yobxac'al tzet yetal lanan quex yechbaneni, espada ok ex ak'on cam wuj, tol ok ex ay jajanok, cax ok ilay el e jolom. Yujtol max ex wawtej, palta maj ex tak'wok ayin, max in k'anjab ayex, palta c'am che cha e yabej. A ti' e yet tol max e yun juntzan yobtakil in satak, max ex tzakloj yintak juntzan tzet yetal c'am chi cha in c'ul.
- 13 Yuj wal tu', a eb in chekbej ay is lobej eb, axa ayex ti' ok ex cam yuj wajil. Ay tzet ok yuc' eb, palta ayex ti' ok ex cam yuj takintial. Tol ok tzalojbok eb, palta ayex ti' q'uixawtakxac'al ok e yuncantok.
- 14 A eb ti' ok bitnok eb yuj tzalojc'ulal; axa ayex ti', tol ok ex ok' yuj cusc'ulal, c'al yuj yatakilal.
- 15 A eb sic'bil el wuj tu', ok ex yak' binaj eb yin buchon junokxa anima. Ayin ok ex wak' cam ayex ti', palta ok wak' jun ac' bieje bay eb in chekbej yet chi yak' binaj eb.
- 16 Tzanc'al mactxel bay jun nación ti' chi k'an junok watx'c'ulal yiban, a ayin ok k'ana', ayin Dios in, tol chi wun tzet chi wala'. Tzanc'al mactxel tol chi yak' c'apax is ti' yin junok tzet yetal, ayin ok in yak' binajok. A yet tu', a jantak yatakilal maxax eq'uelok, ok tojcan c'ayc'ulal, c'amxa bay txequel ay yul in sat.
- 17 Abek xin, tol ok wesnej aj jun ac' satcan, c'al jun ac' tx'otx'. A jantak tzet yetal ec'nakxa elok, ok tokcan c'ayc'ulal, tok ayto mactxel okto naontek juntzan tu'.

- 18 Tzalojanek yin tojbalk'inal yuj tzet yetal ok in watx'nej ajok, yujtol ok wak' is tzalojc'ulal conob Jerusalén; axa eb anima cajan bay tu' ok tzalojbok c'ul eb wuj.
- 19 Ayin wal caw ok in tzaloy yin Jerusalén tu', caw wal watx'xac'al ok wab yuj in conob tu'. C'amxa bay ok ablay yel yaw eb anima yuj yailal bay tu'.
- 20 A bay tu', c'am eb unin ok cam yin jayeb ch'an c'ual ok ec'ok, tamwal ok cam eb icham anima tol man ok tz'aknaj yabilal. Ta ay mac ok cam yin cien abil is k'inal, unin anima chi yal tu'. A mactxel ok cam yin man ok ajapnok is k'inal yin cien abil, a yuj yailok is yobtakil xan ok pet camok.
- 21 Ok watx'nej aj eb in conob yatut, cax ok cajan ec' eb yul. Ok yaw eb yuva, cax a wal caw eb ok loon sat an.
- 22 Manxa ok yun tol ok watx'nej aj eb is na, cax tx'okxa pax mac chi cajan yul. Ma ok yaw eb yawoj, tx'okxa pax mac chi loon pax aytok sat. A eb in conob tu', caw wal najat ok yun is k'inal eb, axca wal is k'inal te te'. A eb sic'bil el wuj, ok yak' tzalojbok eb is c'ul yetok is mulnajil yin mimantak yabilal.
- 23 A yet tu', man nabaok ok mulnaj eb in conob, man ok cam is yuninal eb yin tol c'amto chi ajapnok c'ual cami. Yujtol a in conob ti', yinatil eb anima tol max wak' in watx'c'ulal yin, ayin Jehová in ti'. Caytu' ok yun c'apax yuninal eb.
- 24 A yet c'amto chin yawtej eb, lananxa in tak'wi bay eb, a yet c'amtoc'al chi lajwi k'anjab eb, mayal wab tzet chi yal eb.
- 25 A no ok yetok no calnel, junnejxac'al ok low no'; ac'ala' no coj, a an ac'un ok lo no' axca no wacax. Yetok c'apax no labaj, a pokok ok lo no'. Ayin wal caw Jehová in chi wala', tol c'am tzet yetal ok yetnejtok juntzan no no' tu' bay tzalan bay chi oc ayilal ayin, xi Cham.

Lek'ti' ayilal

- 66** 1 Max yal Jehová axca ti': A satcan tu' in trono yayji, axa sat tx'otx' ti' axca tol batx'lubal wakan yayji. Yuj tu' xan ayex ti', ¿tsetto wal nail ok e watx'nej aj ayin? ¿Tsetto wal xewbalej ok e watx'nej ayin bay ok in xewok?
- 2 Ayin wal caw Jehová in chi wala' tol ayin max in watx'nej masanil juntzan tzet yetal ti', caytu' max yun pitzc'oj aj masanil.

Palta ayin ok in taynej eb yaynakil tol chi cus c'ul yuj yobtakil, eb tol ay yelapnok in k'anej yul sat.

- 3 Ay mactxel tol a wal beybalej chi cha c'ul, a chi yunej, cax chi tzalojbi wal c'ul yoc yin ayilal tol yajbejtak. Caxc'al chito mak'cam junok no wacax yin xajanbalil, lajan wal yul in sat axca tol a junok anima chi yaoc yin xajanbalil. Ta chi mak'cam no calnel yin xajanbalil, lajan wal axca tol chi pak'il is nuk' junok no tx'i'. Ta chi yak' satlak awoj yin ofrendail, lajan wal axca tol a chiq'uul txitam chi yak'a'. Ta chi yak' tz'a

incienso, lajan wal yul in sat axca tol chi yal watx' k'anej bay comon dios.

- 4 Mayal in nabalnej el yailal ok jayoc yiban eb. A wal tzet chi xiw eb bay, a ok wak' bay eb, yujtol max wawtej eb, palta maj tak'wok eb ayin. Max in k'anjabí, palta maj cha eb yabej; a ti' yet eb, tol max yun eb juntzan yobtakil in satak, max tzakloj eb yintak juntzan tzet yetal tol c'am chi cha' in c'ul, xi Jehová.

Beyc'ulal c'al bekbánilal

- 5 Abek wal is k'anej Jehová, mac ex wal tol ay yelapnok Cham yul e sat: Ay juntzan e yet conob tol chi chichon oc c'ul e yin, cax chi oxcac'al eb ajc'ulal e yin yujc'al tol ayin chin e yawtej e yetok. Cax chi yalon eb axca ti' ayex: Tx'oxokab Jehová tu' is mayk'ak'al yin ex coloni, chi jochej chi jil e tzalojc'ulal, xi eb. Cay wal tu' chex yut buchon eb. Palta a eb tu', toxac'al ok q'uixwokcan aj eb, xi Jehová.
- 6 A wal jun chi bil tit bay conob tu', jun toxac'al nilili bil tit bay templo, a jun tu' a Jehová chi bil tita, yuj yak'on paktzebal bay eb ajc'ul, atac'ala' is mojalil.
- 7 Chi yal Jehová: A conob Sión lajan wal axca junok ix ix jun wal bek max jay yune'. Yet c'amtoc'al yail chi yabej, max jayi.
- 8 ¿Mactxel maxax abeni, ma yilon junok lajan wal axca jun ti'? ¿Tom chi je' yalji aj junok nación yin junnej c'ual? Palta a Sión tu', txennej ok yut yaben yail, cax nacionxa ok yuncanok.
- 9 ¿Tokwal ok in tenoc waan jun aljil tol ayin chi wak' yunej? quin chi ayin Jehová e Diosal in ti'.
- 10 Tzalojanek yetok Jerusalén, a mac ex ay e camc'ulal yetok. Junanejek e ba yin tzalojc'ulalil, mac ex tol max ex ok' yuj.
- 11 Yujtol lajan wal axca junok txutxej, ok ex mimanc'ulnelay yuj, masantac'al chex can yin tzalojc'ulalil yuj is miman yaxilal.
- 12 Yujtol ayin Jehová in chi wala': Ok wi wal aj can tzet yetal tol ok mayjok ayex. A is beyomal nacionlak, ok jayoc ayex, axca wal junok aej tol c'am yechel chi tani. Yuj tu' xan ayex ti', lajan ex axca junok unin chi ak'lay txutxwok yuj is txutx, tol ochebil, cax chelbil.
- 13 Axca wal junok xal txutxej tol chi mimanc'ulnej yune', axca wal tu' ok ex wut in mimanc'ulneni. Cay wal tu' ok yun e yion e mimanc'ulalil bay Jerusalén, xi Jehová.
- 14 A wal yet ok e yilon juntzan ti', toxac'al ok tzalojbok aj e c'ul. Ok ak'lay yip e mimanil junelxa, axca chi yun yaxbi aj an ac'un. Yujtol ok tx'ox wal Jehová is yipalil xol eb is chekbej, axa yowal c'ul ok tx'ox xol eb ajc'ul oc yin.

- 15 A nan xol k'ak'ej ok apnok oc Jehová, a is carro Cham lajan axca junok caxxuchum. Ok yiel yowal c'ul yin eb ajc'ul axca chaw xak k'ak'ej.
- 16 A yetok k'ak'ej, c'al yetok yespada ok beyc'ulnej Jehová masanil anima bay yulyibank'inal ti', cax xiwil mactxel ok cam yuj.
- 17 A wal caw Jehová chi alon axca ti': A mactxel chi yaxac'al oc ba yin yoc yin ayilal bay comon dios xol junok awoj, cax chi tzakloj eb yunen axca chi yun junok mactxel ayoc nan xol eb tu', yin chion eb txitam, c'al chion eb no tx'ow, c'al juntzanokxa no' tol yajbejtak, junelnej ok lajwok el eb tu' masanil.
- 18 Yujtol wojtakxa is nabal eb, c'al is beybal eb, xan ok in jayoc ul in wajban oc masanil conoblak, c'al tiejlak yin in beyc'ulneni, axa jayoc eb ul yilon in mayk'ak'al tu'.
- 19 Ok in tx'oxil in c'ulbal xol eb. Okto elcan juntzanokxa eb wuj xol eb ok beyc'ulnelay tu', cax ok in chekontok eb bay juntzanxa nación. A ton bay Tarsis, bay Libia c'al bay Lidia, a ton eb aj nación tu' caw wal yojtak eb chi julwaji. Axa pax eb bay Tubal, c'al bay Grecia. A juntzan nacionlak ti' najat ayil yinlak a' mar, c'am bay chi ablay in binaji, tamwal ay bay chi yil eb jabok in mayk'ak'al. A eb chekbiltok wuj tu' ok alon yabixal in mayk'ak'al bay xolak nación tu'.
- 20 Ayin wal caw Jehová in chi wala', tol ok tit masanil eb e yet conob bay masanil nacionlak yuj eb. Ok tit eb yiban chej, yul carruaje, c'al yiban batxbalej, yiban mula, c'al yiban camello. Axca wal junok ofrenda ok yun jayoc eb bay tzalan bay chi oc ayilal ayin bay Jerusalén. Axca chi yun yiontek eb in conob junok ofrenda yul junok net caw wal sak bay in templo, axca tu' ok yun yilaytek eb.
- 21 Ayin wal caw Jehová in chi wala', tol a xol juntzan eb maxto elcan wuj, a ok in siq'uil eb ok oc yin sacerdoteal, c'al yin levitail, xi Cham.
- 22 Chi yalon c'apax Jehová axca ti': Axca wal ac' satcan, c'al ac' sat tx'otx' tol ok wesnej ajok, ok ayjokc'al ec' yin tojbalk'inal, caytu' ok yun e binaj ayex ti' yetok e yinatil yin tojbalk'inal.
- 23 Ayin wal caw Jehová in chi wala', tol junjunc'al el yet chi alji xajaw, junjunc'al semana yet c'ual xewilal, ok jayoc masanil anima ul ay jajan ayin.
- 24 A yet ok jay eb tu', ok yilon oc eb mimanil eb camnak, a ton eb max meltzoy oc win yuj tenomtakil. A no patz chi chiontek eb tu', c'am chi camil no', a k'ak'ej chi ak'on tz'a eb, c'am chi tani. Yajbejalxac'al ok yun yili yul sat masanil anima, xi Jehová.